

HAZ.
FLEM

2

TEOLOGIA
LITURGICA

162

G

45.

BIB. NAZ. NAPOLI

BIBL. NAZ.

VITT. EMANUELE III

162


G

45

NAPOLI

67





1000

#29

06

7

2

IO. AVGVSTI ERNESTI

ANTI
MVRA TORIVS

SIVE

CONFVTATIO
MVRA TORIANAE

DISPV TATIONIS

DE REBVS LITURGICIS

AD

SALOMONEM DEYLINGIVM

THEOLOGVM PRIMARIVM

ANNISQVE ET MERITIS VENERANDVM



LIP SIA E

APVD IOANNEM WENDLERVM.

A. MDCCCLV.



V I R O
MAGNIFICO VENERANDO
ATQVE
EXCELLENTISSIMO
SALOMONI DEYLINGIO
S. THEOLOGIAE PROFESSORI
IN VNIVERSITATE LITERARVM
LIPSIENSI PRIMARIO

CANONICO MISENENSI
LIPS. CONSISTORII ASSESSORI PRIMO
DIOECESEOS SUPERINTENDENTI
ET
ECCLESIAE ANTISTITI PRIMARIO
S.



IMO

um Vitebergam quondam studiorum causa venissem, VENERANDE DEYLINGI, vige-
bat etiam tum *Io. Guilielmi Iani*, quamquam aliquot annis ante mortui, memoria, & inter iuvenes, sacrarum literarum studia aemulantes, summa cum laude celebrabatur. Etenim qui supererant ex eius disciplina, nihil eo praedicabant excellentius fuisse, vel in dogmatis theologicis explicandis, vel in historia Ecclesiastica enarranda: neque enim communia modo illa tradidisse, quae ab vnoquoque alio tradi solerent, & e quouis compendio vtriusque doctrinae disci possent, sed multa exquisitiora & reconditae eruditionis copia protulisse, multa de difficilioribus sacrarum literarum, & veterum Ecclesiae scriptorum, locis elegantius observata, multa de monumentis

antiquis, eorumque vel in Theologia vel in historia usu, multa de libris melioribus ac rarioribus; vt facile intelligi posset, si illi diuturnior vita contigisset, quantam vel vrbi celebritatem, vel studiosis vtilitatem allaturus fuisset. Fuit sane vir illé Theologi prope perfecti exemplum. Nam cum dogmatum scientia ea, quae e summis corporibusque doctrinae hauritur, omnium bonarum literarum scientiam coniunxerat. Ab excellenti illa Schurzleischiana disciplina, in qua TU quoque huius TUAE exquisitae & elegantis doctrinae amorem & initia percepisti, profectus, itineribus per Galliam, Britanniam, Batauosque, matura iam aetate atque doctrina, factis excultus & locupletatus, denique ab historica cathedra, in qua aliquot annis cum laude federat, ad theologicam adscenderat: studium autem doctrinae, vel legendo vel cogitando augendae, tantum fuerat, vt nec valetudini, nec imbecillitati corporis parsisse diceretur.

Sed illa veteranorum, de qua dixi, praedicatione, vt alios, ita me quoque memini incendi, vt legere cuperem, quae audire non potuisssem, vt Dictata in *Neumanni Aphorismos*, in *Compendium Historiae Ecclesiasticae Gothanum* & alia. Descripsi etiam *Lectiones de Vnione Ecclesiastica inter Lutheranos & Reformatos* ineunda, quibus nihil plenius & eruditius in illo genere vidi. Atque his legendis fateor tum
esse

esse mihi vel incensum vel auctum studium elegantioris doctrinae Theologicae, comparanti hanc felicem & elegantem copiam cum compendiarum aliorum ieiunitate & elementaria paupertate. Sed cum eodem tempore audirem *Bergerum*, in Institutionibus diplomaticis, quas ille vocabat, omnium publicarum literarum vsum, vel in historiae partibus vniuersis, vel in doctrina quacunque, etiam in Theologia, demonstrantem, adfirmantemque, nullam dogmatum publicorum esse certam historiam, nisi quae a Conciliorum & Liturgiarum, Legum etiam fontibus duceretur: aduertere animum in istis Ianianae doctrinae reliquiis maxime ea, in quibus eum rationem hanc secutum videbam: quod fecerat maxime in loco de Eucharistia, vbi Liturgiarum veterum auctoritate Ecclesiae nostrae sententiam vel illustrarat, vel defenderat; quod eum etiam duobus Academicis libellis fecisse non ignoras. Primum tum mihi cognita sunt *Bonae*, *Renaldotii*, *Bretti* & aliorum Liturgicorum scriptorum nomina, & simul studium iniectum Liturgicae rei, quae, vt fere solent, quae prima aetate adamantur, semper postea prope prae ceteris antiquitatis Ecclesiasticae partibus mihi iucunda fuit. Itaque cum ante aliquot annos L. A. MURATORIUS, clarissimi vir nominis, duo Sacramentariorum veterum volumina, *Liturgiae Romanae Veteris* nomine, edidisset, in quibus essent, quibus adhuc caruissem, cupide emi opus, praefere.

fertim, cui longa disputatio, non modo de istis Sacramentariis, sed de re Liturgica vniuersa adiuncta esset: in qua, spem faciebat fama viri, multa me inuenturum ante incognita, & alibi vix reperienda. Sed cum absoluissem eam disputationis partem, quae ad edita ibi ex antiquis libris Sacramentaria, Leonianum, Gelasianum, & Gregorianum antiquum, pertinerent, ecce beabar alia longe maiori disputatione, quae *Bingamo* maxime opposita, Ecclesiae nostrae doctrinam disciplinamque vehementer oppugnaret, telisque vteretur, non modo e Liturgiæ chartis, sed etiam veterum scriptorum libris, depromptis. Multa ibi reperiēbam indigna nobis, plura indigna viri fama, etiam humanitate & moderatione, quam ipse olim libro proprio Theologis suaserat. Quamquam commouebatur indignitate rei animus, & conatus erat, reprimere hominis impetus: tamen, cum alia in manibus haberem, putaremque, e Theologis aliquem, aetate adhuc vigentem, extitutum, qui hic bonae causae defendendae, & laudis quaerendae materiam sibi datam putaret, continui tum quidem animum, ceterum, cum iam sex anni praeterierint, nec quisquam, quod ego quidem sciam, id negotii susceperit, rediit pristina voluntas, eius libri refellendi.

Atque ego non ignorabam, locum hunc de Eucharistia, quoad in eo nobis cum Romana Ecclesia intercedit controuersia, ita esse & a nostris

noſtris Theologis, in his a TE, VIR VENE-
 RANDE, & a Geneuenſibus, cum alias, tum
 per famoſae illius de perpetua Fide diſputatio-
 nis occaſionem, ita diligenter tractatum, ita
 omnia excuſſa & cum puluiſculo exhauſta, vt
 omnis de eo diſputatio conſumta videretur.
 Itaque ſum admiratus primum, cum eam re-
 coqui a *Muratorio* viderem, ſuſpicatusque, no-
 ua, eaque ſubtiliora ac ſpecioſiora argumen-
 ta ab eo eſſe inuenta, quibus priuare rem pu-
 blicam Eccleſiae Romanae nollet. Quae quan-
 tum me ſefellerit opinio, non eſt, vt hic di-
 cam: res ipſa declarabit. Sed tamen huius
 inſtituti conſilium TIBI, me probaturum con-
 fidebam, ſi non alia de cauſſa, certe hac, quod
 mihi videbatur eſſe verendum; ne ipſum vi-
 ri, doctrinae veteris laude florentiſſimi, & mo-
 derationis ſimulatione probatiſſimi, nomen
 apud parum peritos veritati officeret, eſſent-
 que, qui deſuiſſe magis, qui poſſet, quam, qui
 vellet ac neceſſarium putaret, Muratorianis
 reſpondere.

Atque etiam, quicquid moleſtiae habitura
 erat haec diſputatio apud animum meum, qui
 mallet vera docere, quam falſa refellere, &
 laudare recta, quam praua arguere, id omne
 abſterſit cogitatio TVI, cuius imago identi-
 dem ſcribentis occurfans & obuertiens animo,
 & erectum retinuit ſtudio, & animaduerten-
 di diligentiam acuit, & laetiora mihi omnia
 & hilariora effecit: praefertim, cum haec ſcri-

pferim recenti adhuc gratulatione, quae TIBI facta erat nuper, cum TU annum quinquagesimum explesses, ex quo primum sacerdotii munus obieras. Nondum enim extinctus erat sensus laetitiae illius, quam tum, cum TUA priuatim, tum publice rei Lipsiensis Christianae causa, cum bonis omnibus ceperam. Ac TUA quidem causa laetatus eram, quod doctrinae copia & praestantia, virtutis integritate, meritorum magnitudine, adde benenolentia in me, perfeceras dudum, ut TE & omnibus rebus felicibus dignissimum putarem, & omni parte felicissimum cuperem: rei Christianae Lipsiensis autem causa, quod intelligebam, quantas ei tot per annos, ut alia taceam, vel concionandi perspicuitate & gravitate, vel exempli disciplinaeque domesticae seueritate & sanctitate, utilitates attulisses. Illa quoque cogitatio mirifica voluptate repleuit animum, cum vniuersae rei publicae Lipsiensis in eo genere felicitas occurreret, cui hac nostra aetate contigit, ut tam diuturnos ex iisdem Viris fructus posset percipere. Annus amplius est, cum ornare rem publicam literarum in hac vrbe desiit CHRISTIANVS FRIDERICVS BOERNERVS. Ei ad quinquaginta muneris Professorii, cum magna laude administrati, annos non nisi tres defuerunt. At etiamnum fruitur ciuitas (atque utinam diu fruatur) sapientia & prouidentia IACOBI BORNII, CHRISTIANI LVDO-

DOVICI STIGLITII, IOANNIS FLO-
 RENTIS RIVINI, Virorum Illustrium, quo-
 rum illi quidem breui quinquagesimum sena-
 torii muneris annum, rari exempli felicitate-
 tem, gratulabimur, horum alteri iam ante
 hos quinque annos, alteri ante tres, eundem
 Doctoratus annum gratulati sumus. TU vero,
 VIR VENERANDE, nostra pro illis vota
 precibus TVIS sustentabis: nos interea De-
 um rogabimus, vt TE quoque per multos
 adhuc annos nobis concedat, & huic nuperæ
 lætitiæ addat aliam maiorem, vt post hos
 quinque annos diem illum saluus sospesque
 videas, qui TIBI quinquagesimum Doctora-
 tus Theologici annum expleat: cuius TV no-
 minis, non ad vanitatem, vt fit, sed ad vtili-
 tatem publicam expetiti, dignitatem ita susti-
 nuisti, vt primum probatissimis Obseruatio-
 num libris doceres eruditos homines, mox in
 hanc urbem vocatus, etiam iuuenes, h. e. fu-
 turos rei Christianæ antistites, omni parte
 sacrae disciplinae instructos reddere studeres.

Sed ne TIBI ipsa laudum TUARUM com-
 memorazione molestus sim, qui malis laudes
 mereri, quam audire: veniam ad id, quod
 propositum est, disputationis Muratorianæ
 reprehensionem: quam ita moderabimur, vt
 res, non hominem, præsertim mortuum, &
 multis nominibus bene de literis meritum,
 notemus. *Lucretur furores & Diaboli discipuli* p. 103.
 quibus *Lutheri* nomen polluere ausus est, 241.

&

& similia. Non quid illo, sed quid nobis dignum sit, videbimus. Nec in omnibus acerbum animaduersorem habebit. Non imputabimus in scriptoribus Liturgicis omisos, quos ignorare non debuisse videatur; in his *Thomam Brettum*, Britannum, qui an. 1723 eruditissimum de rebus liturgicis opus, hoc est Corpus Liturgiarum, cum disputatione de Liturgiis Londini edidit: non, quod *Buddleum* Lipliensem Professore, & e duabus *Pfaffii*, V.C. disputationibus vnā fecit &c. Leuia ista esse didicimus, iisque captandis notandisque paruas animas delectari.

Etiam primam libri partem, h. e. septem priora capita, mittemus: in quibus nihil est, quod pertineat ad eam, quam defendere suscepimus, causam. Sunt enim fere historica, pertinentia ad antiquitatem Liturgiae Romanae, & eorum, quae hic proferuntur, Sacramentarium, ad libros denique antiquos, vnde haec exempla ducta sunt: quamquam & in his sunt coniecturae plures, de quibus facile in vtramque partem disputes, etiam quae conuelli ac dissolui possint, *Muratorio* ipso fatente, (pag. 71.) nihil in his certi esse. Itaque etiam cum res bene agi videtur, vt cum de *Gelasiano*, quod vocant, Sacramentario (p. 55. f.) aduersus *I Basnagium* disputat, origines istius ad decimum seculum retrahentem in *Historia Ecclesiae Christianae* (T. II. p. 946.) tamen multa dici con-

con-

contra possunt: in his illud, quod tamen redeant omnia huc, vt ad interpolationes & addimenta posterioris aetatis confugiendum sit, non vetustate eius asserenda. Quo ipso dignitas Liturgiae valde minuitur: cum ea res magnam facultatem det, omnia inde ducta arguta eludendi, & pro interpolationibus repudiandi, quibus in disputando premare

Vnum est caput, de quo, vel exempli causa, contra disputare lubeat, *de origine Liturgiae Eucharistiae vniuersa*, quod est in principio operis. Et primum quidem, quod confirmat, iam ab Apostolis certum primum ordinem, s. Liturgiam Eucharisticam institutam; si ita intellexit, vt ad exemplum Christi, cuius auditores fuerant, preces & *ευχαριστίας* fecerint, nihil est, quod contra dicamus: at si formulam certam ac definitam certis stisque verbis intelligit, longe a vero aberrat. Nondum illis temporibus eadem formula preces factae, neque publice, neque priuatim: formula autem Dominica, velut Compendium quoddam *ευχαριστιῶν* & *εύχων*, omnium preces, cuiusque ingenio factas, concludebat. (Iustin. M. Apol. ad Antonin. p. 131. ed. Grab.) Sed hoc maxime agitur in hoc capite, vt refellatur *Petr. Brunus*, nobilis verum Liturgicarum scriptor, qui defendit, ante quintum seculum scriptas Liturgiarum formulas non extitisse: non quo neget, certis formulis sacerdotes vsos: non hoc sustineat

at crimine se obstringere; sed vt memoriter recitasse, & vsu diurno, h. e. a pueris saepe audiendo, edidicisse, & non omnes stas & constantes fuisse, sed alias ab aliis additas, putet: quam sententiam defendit etiam *Iosephus Pinius* Mosarabicae & aliarum Hispanicarum Liturgiarum editor & illustrator nuperus (*) commemoratis tamen dubitationibus aliorum: cuius libro hic non vsu *Muratorium* miror. Enimvero causa illa haud bene a *Muratorio* acta est. Et initium quidem facit a mirabili *Iustini Martyris* interpretatione, cuius testimonio *Brunus* erat vsus. Antistitem, ait ille, allatis pane, vino, aqua, εὐχὰς καὶ εὐχαριστίας ἀναπέμψεν. ὅση δύναμις αὐτῷ. Haec si pro facultate sua veritas, vicit *Brunus*, siue nos potius, qui liberas preces fuisse putamus. Quid ergo *Muratorius*? Hanc esse vim clamat. Immo vero ὅση δύναμις αὐτῷ esse Italice, per la sua parte, vel seconde che à lui appartient, pro sua parte, scilicet postquam populus stans preces fecerit. Hoc est graece scire & interpretari. Non videbat, illud per la sua parte esse ὁμοίως? ὁ προσεὼς εὐχὰς ὁμοίως καὶ εὐχὰς. α. Illa autem ὅση δύναμις, vt κατὰ δύναμιν, εἰς δύναμιν, nunquam aliter accepta sunt, quam pro modo

(*) In Tract. hist. Chronol. de Liturgia antiqua Hispan C. I. praefixo primum T. VI. Iul. Act. SS. repetito dein Romae 1740. f. & a. I. BLANCHINO ibid. 1736 in Collectione Liturgiarum Hispanicarum.

modo virium, pro facultate, siue etiam, summa
 vi, vbi contextus finat, qui hic non repug-
 nat, vt ἔσεν σθένος & similia, vt paullo ante
 ap. ipsum *Iustinum*, ἔση δύναμις προτρέψασθαι,
 summa ope cohortari. De quo cum dubitari sine
 summa incitia graeci sermonis non possit, cla-
 rum est, certam εὐχῶν καὶ εὐχαριστιῶν in Litu-
 rgia formulam seculo II. nondum fuisse. Qua
 vna re concidunt omnia, quae praeterea ad-
 feruntur in hanc partem, vt ex Apostolica
 traditione accepta & seruata sit certa Litu-
 rgiae formula; ad quae tamen & ipsa separa-
 tim responderi potest. *Cyprianus*, ait, for-
 mulam commemorat sacerdotis, sursum corda,
 & populi, habemus ad Dominum: laudatque li-
 brum de Oratione, qui nullus extat, vt hunc
 locum, sicut alios, id quod modus librorum
 indicandorum declarat, ex alio sumsisse ap-
 pareat. De Oratione Dominica est *Cypriani*
 nobilis & veteribus in primis laudatus libel-
 lus, in quo est locus n. 22. (p. 316. ed. Pamel.)
 de hac formula. At ibi de precibus Eucharis-
 ticae Liturgiae, quas sacerdos pronuntiat, non
 est sermo, sed de iis, quas facit concio stans,
 ante Eucharistiae Liturgiam, auctore eodem
Iustino, l. c. quibus finitis, initium fit pre-
 cum ad Liturgiam pertinentium. Ita enim
Cyprianus: Quando autem stamus ad oratio-
 nem, fratres dit. vigilare & incumbere ad preces
 toto corde debemus - - Ideo sacerdos ante oratio-
 nem praefatione praemissa parat fratrum mentes,
 dicen-

dicendo sursum corda. &c. Non clarum est, hoc pertinere ad illa *Iustini* verba: ἀνσάμεθα κοινῇ πάντες, καὶ εὐχὰς πέμπομεν? Sed tamen facile concesserim, eadem verba & in sacerdotis precibus vsurpata. Nam *Cyrillus*, f. quicumque auctor est, *Catech. Mystag. V.* (pag. 537. ed. *Prenotii*) clare hanc formulam commemorat. At illud certum est, eam in omnibus precibus publicis vsurpata, neque inde quicquam pro *Muratorii* sententia colligi potest. At *Basilus* (de Spir. S. c. 27.) non contentos Christianos dicit iis, quae commemoret Apostolus, aut Euangelium, verum alia & ante & post consecrationem dicere, quae ex traditione non scripta acceperint. Sed quae necessitas est credere, haec de verbis, & non de rebus, generibus, & capitibus precum & supplicationum, intelligenda esse, quae commemorat *Cyrillus* (l. c. p. 538.) Nam si de Muratoriano arbitrio capias, *Basilus* reprehenderetur merito, qui sibi pro Apostolicis illas formulas obtrudi passus sit, quae *Iustini* aetate nullae fuissent. Illud autem plane alienum est, quod iterum *Iustini* verbis abutitur ad Missae certam formulam illi aetati obtrudendam, ἀνσάμεθα κοινῇ πάντες καὶ εὐχὰς πέμπομεν. Quid inde? Nisi iam constitutae fuissent sacrificii orationes & preces, quomodo concors in iis recitandis populus perrexisset? Si autem constitutae, scriptis quoque traditae fuerint oportet. At istae preces nihil coniuncti

mēti habent cum sacrae Coenae Liturgia,
 milesque sunt his, quae apud nos subiiciuntur
 orationibus. Nam lectione librorum sacrorum
 lecta, antistitisque admonitione ad populum fi-
 ita, surgere populum ait, et precari. Atque hae
 sacrae preces si submissa voce factae, nulla for-
 ulae certae necessitas intelligitur; si clara,
 id concesserim facile, cum & *Cyprianus* vo-
 s mentionem faciat, & precantes vetet
mutare preces inconditis vocibus (de Or. Dom.
 3.) non tamen necesse est, ut e scripto dis-
 solitas putemus. Quam multos, credibile
 est, antiquis illis temporibus, cum etiam do-
 s non admodum expeditum esset, scripta
 gere, quam multos ergo de plebe homines,
 iliter in primis, fuisse, qui legere scripta
 non possent, cum hodie tales inueniantur, in
 ita docentium frequentia & discendi facili-
 e. Viua igitur voce docti, aut usu longo
 quotidiano audiendi, edidicere formulas il-
 , neque villo modo scriptura opus fuit. Po-
 re etiam Psalmi Dauidici in communibus
 cibis usurpari: quod mihi maxime placet:
 opterea, quod satis constat, iis veterem ec-
 liam & in canendo & in precando maxime
 : usam, cum mallent diuinitus scripta in
 o colendo, quam humana, adhibere *Hie-*
onymum quidem, cum sacrorum librorum
 sionem latinam veterem, quam vulgo Ita-
 m, nescio an recte, vocant, corrigeret,
 B Psal-

Psalmos intactos reliquisse constat, ne popu-
 lum conturbaret, qui illi veteri interpretatio-
 ni adsuetus esset, eaque in supplicationibus
 publicis vteretur. Laodicensi autem concilii
 Canone 60 cautum est, ne ψαλμοὶ ἰδιωτικαί, in
 Ecclesia recitarentur (λέγονται). Sed ne ni-
 mis omnia contendamus, concedimus vti-
 que, paullatim, quarto quintoque seculo,
 formulas cum ceterarum precum communium,
 tum Eucharisticae Liturgiae factas, a *Basilio*,
 ab *Hilario* Pictaviensi, aliisque disertis &
 πνεύματι εὐχῶν large donatis diuinitus viris.
 Tamen nihil lucratur *Muratorius*. Nam eas
 aut in suos, aut Ecclesiarum suarum, vsus
 facere potuere. Quorsum pertinet illud,
 quod de *Apollinari Sidonio* ex *Gregorio Tu-*
ronensi (Hist. II, 22.) adfert, qui, cum per
 fraudem ipsi ablatus esset libellus, per quem
 sacra facere consueuisset, ex tempore om-
 nia solennia peregit, cum summa admira-
 tione omnium: quae res adeo non fauet
 Muratorianae sententiae, ut ei maxime ad-
 uerfetur. Ut breui complectar, sic rem in-
 telligo. Primis temporibus, cum Spiritus S.
 suggereret εὐχαὶ & εὐχαριστίας, ut Apostolis,
 eorumque ministris & adiutoribus, antisti-
 bus item Ecclesiarum, atque adeo priuatis
 (I Cor. XIV, 16) superuacuae erant for-
 mulae precandi solennes. Cum porro illud
 acre rerum diuinarum studium adhuc caleret,
 essent

stentque multi sancti, & in libris diuinis triti
 omnes, qui vel repente, vel post commen-
 tionem aliquam, preces pronunciare & gra-
 arum actiones possent ad animos commo-
 endos efficaces: (quidni enim potuerint,
 iud Maria femina, tacta beneficii diuini
 agnitudine?) sua sponte precati sunt, vt
 iuatim domi, ita in conuentibus publicis, ὅτη
 ναμὶς ἐκάστω. Cum ille ardor pristinus paulla-
 n refrixisset, in tantaque multitudine eorum,
 ii sacra facerent, propagata longe lateque re-
 gione Christiana, multi reperirentur quo-
 m nimis tenuis δύναμις esset, denique non-
 illiantistitum eloquentiae gloriam nimis ap-
 terent, formularum scriptarum & certa-
 m consuetudo nata est. *Basilii, Hilarii, Chryso-*
ni, Ambrosii, Sidonii aliique docti & disertii ho-
 nes, primum in vsus suos preces configura-
 at domi, quas in sacris faciendis recitarent,
 nde & aliis, qui minus disertii aut doctii
 ent; quibus quisque, vt voluit vsus est,
 sic quoque nemo ab initio eam necessitatem
 i impositam putauit, vt libi non aliquid vel
 lere vel demere licere existimaret. Ipse
 idem *Muratorius* (c. 2.) de vetere Eccle-
 e Rom. Liturgia agens, fatetur, cuilibet
 clesiae, cuilibet Episcopo licuisse, suam
 truerere nouis orationibus, easque vel am-
 icare vel minuere: & (p. 127.) Missam
 ii *Illyrici* attingens, eam nihil esse ali-
 , quam ipsum Ordinem Romanum, va-

iis precum formulis oneratam, quarum tum
usus liber unicuique Sacerdoti fuerit. His magna
 parte similia sunt, quae de precibus in S. Eu-
 charistia peragenda differit *Ianus, ó μαχα-
 ρίτης*, ad *Eusebii Or. de Die Dominica*, p. 27.
 quae si TIBI probata fuerint, VENERANDE
 DEYLINGI, vehementer laetabor.

Iam veniamus ad caput institutae Dispu-
 tationis Antimuratorianae: in quo seruabi-
 mus ordinem a Muratorio ita descriptum,
 ut *primum de Panis & Vini in Corpus & Sangui-
 nem Christi conuersione* e Liturgiis Ecclesiae ve-
 teris Romanae, e. g. Ambrosianae, c. 10. cete-
 rarum Occidentalium, c. 11. Orientalium Grae-
 carum & Syriacarum, c. 12. 13. Aegyptiaca-
 rum c. 14. disputaret, adiuncta velitatione
 cum *Sam. Basuagio*, Annalium Polit. Eccl. au-
 ctore, in qua de Patrum SS. locis conten-
 ditur, c. 15. *deinde Veritatem Sacrificii in S. Mis-
 sa* e Liturgiis Occidentalis & Orientalis Ec-
 clesiae, c. 16. 17. & Patrum scriptis, c. 18 con-
 firmare conaretur: *tertio, Adorationem Eucha-
 ristiae ex iisdem demonstrare*, c. 19. *quarto*,
 quosdam *Liturgiae ritus*, c. 20. 21. *quinto, In-
 uocationem SS. in Liturgia*, c. 22. *sexto denique*,
adseruationem Corporis Christi, peracta Euch a-
 ristia, c. 23. *eique praestitam reuerentiam, ex-
 positionem & circumgestionem*, c. 24. defenderet.
 Erit autem nobis haec in septem capita diui-
 sa disputatio, cum Muratoriana sit sextu-
 plex; propterea, quod eorum, quae de lo-
 cis

is Patrum disperse, per octo capita priora, differit, confutationem, in vnum caput congerere placet.

Primo igitur capite clare, vt opinor, demonstrabimus

I. *Conuerſionem Panis & Vini, quam Romana Eccl. defendat, Liturgiis antiquis non firmari.*

Atque ingreſſus huius demonſtrationis Liturgicae a *Muratorio* factus eſt ab reprehentione Graecorum & Syrorum, quos, cum in ipſo conuerſionis dogmate conſentiant cum Eccleſia Romana, diſſentire in eo, quod negent Conſecrationem Euchariſticam fieri ſolis verbis: *hoc eſt corpus meum.* Non repetam, quae doctiſſimi Theologi, & vque ipſe, *VIR VENERANDE*, dudum in *Obſ. S.* (III p. 194. & 339.) contra ſententiam Eccleſiae Romanae, quae his ſolis verbis conſecrationem fieri decernit, vt falſa & noua, veriſſime pariter atque doctiſſime diſputaſti: quorum tanta eſt euidentia, vt etiam inter Pontificios extiterint, *Renaldetius* & *Tuttacus*, qui agnoſcerent, hanc opinionem cum vniuerſae Eccleſiae veteris ſententia pugnare, eamque adeo a ſua Eccleſia alienam eſſe, credi cuperent. *Muratorius* quidem mirifice ſe expediuit. *Paucis ſe dicturum*, ait, *rectiſſime a Catholicis conſtitutum fuiſſe, Conſecrationem pen-*

B 3

deve

dere duntaxat e Christi verbis (hoc est corpus meum) Dogma namque hoc ex antiquis PP. elici, praefertim ex Io. Chrysostomo, Ambrosio et Augustino. Ad quae forte quis paucis respondeat: istam orationem plane indignam esse Muratorio: meliusque facturum fuisse, si omnem mentionem eius rei e disputatione sua semouisset, cum nihil melius posset afferre. Sed lenius agamus, quando quæstio de consecratione Eucharistica est eiusmodi, ut nostri quoque nec consentiant satis, nec se expediant facile. Formulae Concordiae Auctores (nam in ceteris Confessionum libris nihil est admodum huc pertinnens) ponunt in sola recitatione verborum Institutionis, iisque τὸ εὐλογεῖν peractum iudicant, de quo est apud Paullum, 1 Cor. X. 16. A externam & visibilem actionem Coenae Dominicae pertinent Consecratio, seu verba institutionis, distributio, & sumtio. Declar. Art. Conc. p. 1040. ed. Rein. Itemque in Epit. Art. C. p. 846. commemorato illo Paullino loco: Illa autem benedictio fit per recitationem verborum Christi. Quam rationem Gerhardus & alii superiorum temporum Theologi sequuntur. At alii ab auctoritate formulae istius declinantes paullulum, illis adiungunt preces; quidam etiam distributionem, cum repetitis verbis Dominicis, & sumtionem, totamque adeo actionem Eucharisticam consecrationis verbo complectuntur: quam ad rationem ipsi κοινωvτες partem consecrationis obtinent. Praetereo

terco distributiones consecrationis, ipso sono terrentes. *Chemnitius* autem cum idem illud, quod in Concordiae formula scribi probavit, ante in Tridentini Concilii Examine posuisset, (P. II. p. m. 119.) alio loco (p. 222.) dicit: *quando institutio recitatur & non facimus quod Christus in coena & fecit & facere iussit, non est consecratio, sed tantum historica narratio: quando vero recitamus, & facimus, quod iussit, tunc verbis illis benedicimus pani & poculo: quibus verbis clare, ut opinor, consecratio communicatur cum iis, qui accipiunt panem & vinum. Iam in ipsis verbis institutionis non eodem modo se omnes expedire video, quibusdam, verba Christi vim consecrandi habere omnia, existimantibus, aliis, partem eorum tantum. Quae indicio sunt, laborare doctos homines in consecratione definienda. Chamierius quidem, eruditissimus ille errorum Romanae Ecclesiae aduersarius, quod merito quis miretur, eo redigitur, ut ipsos, quos impugnat, secutus, consecrationem panis, quae quidem effectum Sacramenti adferat, solis verbis, hoc est corpus meum, fieri dicat (Panstrat. T. IV, qui est de Eucharistia, VI, 5 p. m. 153 a.) C. M. Pfaffium autem, copiosissimae doctrinae Theologum (in Disp de Consecratione Euch. Vet. p. m. 405) eorum fauere sententiae, qui consecrationem non in verbis institutionis Eucharisticae, sed in *ἱνχαριστία* & *ἑὺλογία*, h. e. precibus cum gra-*

tiarum actione ponant, quae est *Edm. Albertini*, in clarissimo de Sacramentis Eucharistici opere (I. 4. p. II.) sententia, satis indicat, cum eorum rationes *solidissimas* appellat: quae aliae intelligi, nisi verae & certae, non possunt.

Omnis illa difficultas nata est ab ambiguitate verbi *consecrandi*, qua sublata, rem expeditam fore arbitror. Etenim Scriptores Ecclesiasticos consecrandi vocabulo dupliciter usus reperi: primum sic, ut respondeat Graeco *ἀγιάζεν*, sitque, quamcunque rei sanctitatem ac religionem tribuere, ut profana, aut usus profani ac promiscui, esse destinat; quo modo Paullus cibum quemcunque *ἀγιάζεισθαι* dixit precibus & gratiarum actione: iterum hac sententia, ut vim diuinitus, h. e. praecepto ac promisso diuino, rei aditam significet; quo modo veteres dicunt coniugium a Deo *consecratum* esse, Gen. I, 28. itemque *aquam* abluendis peccatis *consecratam*, hominesque ipsos, ea aqua tinctos, ut Graeci *ἀγιάζεσθαι*, ita Latini *consecrari* dicunt, Christi praecepto & promisso, & Spiritu Sancto, ut loquitur *Ambrosius* de Sacram. I, 5. siue quicumque auctor est. Similisque est *benedicendi* ratio, verbi e Graeco *εὐλογεῖν* facti, significatione Hebraicae consuetudini in verbo *בֵּרַךְ* accommodata: nam bene Graeci & bene Latini tantum pro *laudare* & *recte dicere* usurpant. Cum Deus diem septimum, Christus cibum *ἡκολόγησε*, ea primi generis consecra-

cratio fuit, quae e profanis eximeret: cum nouos idem coniuges *ἡυλόγησε*, ea fuit benigna & efficax promissio, vnde & beneficii vis ei verbo adhaesit, vt in *εὐλογία* Abrahami cum gentibus omnibus communicata, vt in *εὐλογία* Pauli, 1 Cor. xvi. & 2 Cor. x.

Iam si haec ad quaestionem illam Eucharisticam conferamus, liquidum est, consecrationem esse in laudibus diuinis & precibus, si priori sensu accipiatu vocabulum: sin posteriori, in solo praecepto & verbo Christi, & quidem dupliciter: semel, cum ante *κοινωνίαν* recitantur; vnde intelligitur ius & potestas talis rei suscipiendae, pendetque spes, cum pane & vino percipiendi corporis & sanguinis Christi: iterum in ipsa *κοινωνία*, cum panis & vinum ori admoventur & ingeruntur, sacerdosque repetit verba Christi, quorum haec vis est, vt accipiamus corpus & sanguinem Christi. Nam profecto Dominus noster Iesus Christus illa verba, *hoc est corpus meum*, dixit tum demum, cum iam edere inciperent Discipuli: id quod ordo verborum prorsus declarat. Etenim tum demum, cum ederent, poterat hoc dicere. Neque enim ante erat corpus Christi cum pane, quam in ore esset. Homines male faciunt, cum, vt celeriter ista in Euangelio, & vno spiritu ac tenore legunt, *accipite, comedite, hoc est corpus meum*, ita a Christo dicta imaginantur. Nam & illud: *τὶτο ποιῆτε*, &c. in-

teruallo facto, dixit. Cum comedissent reuerenter, & admiratione beneficii percussi, subiecit illud de repetendo & conseruando semper ritu salutari.

Quodsi illud porro quaeratur: quo sensu consecrationem ac benedictionem vetus Ecclesia in hac re vsurpauerit; profecto res cogit fateri, priori modo antiquissimum quemque dixisse, & consecrationem, itemque benedictionem in precibus & *ευχαριστία* posuisse. Id sic planissime demonstrari potest. Primum *consecrandi* verbum in latina Ecclesia haud dubie expressum est e Graeco *ἀγιάζην*, eique prorsus respondet. Huius autem verbi de hac re vsurpandi fundus vnus est Paulli locus, 1 Tim. VI, 5. vbi cibus quicumque δι' *ευχῆς καὶ λόγου Θεοῦ ἀγιάζεται* dicitur, vnde verbum *ἀγιάζεται* ad cibum & potum Eucharisticum est translatum. Id certum fit loco insigni Origenis (Comment. in ss. t. II. p. m. 253. extr. ed. Rhotomag.) in quo istis ipsis Paulli verbis de cibo Eucharistico vtitur. Τὸ ἀγιαζόμενον διὰ λόγου καὶ ἐντεύξεως, ὃ τῷ ἰδίῳ λόγῳ (non per se) ἀγιάζει τὸν χρώμενον· εἰ γὰρ τῷ τοῦ, ἡγιάζειν αὐτὸν καὶ τὸν ἐσθίουντα ἀναξίως τῆς Κυρίου, καὶ ἑδὴς αὐτὸν διὰ τὸ βρώμα τῷ τοῦ ἀσθενὲς ἢ ἄρρωστος ἐγένετο, &c. Etenim hinc clare apparet, non alium *ἀγιασμὸν* s. consecrationem intellectam in S. Coena, quam in alio cibo quotidiano: in quo illi veteres hoc minus errabant, cum & ipsi Apostoli plane iisdem verbis

bis

bis de ἁγιασμῷ Eucharistici panis & vini, h. e. εὐχαριστίας & εὐλογίας, quibus de vulgaris & promiscui cibi ἁγιασμῶ vfi sunt. Quae cum ita sint, ceterique Graeci antiquiores semper, quod ego sciam, verbum ἀγάζειν in ea re dixerint, quippe sic adhuc reperitur in Mystagogicis illis Catechesibus, siue Cyrilli, siue iunioris alicuius: eius autem verbi latina interpretatio sit *consecrandi* vocabulum, necesse est, vt hoc quoque ab initio non aliter dictum & cum *sanctificandi*, minus latino verbo, promiscue vsurpatum credamus. Quod & confirmant loca plurima, dudum e latinis Ecclesiae doctoribus prolata, in quibus aliter consecrandi verbum intelligere non licet, veluti a *Pfaffio*, l. c. p. 407. sqq.

Iam, secundo, *benedicendi* verbum, quod cum *consecrandi* voce promiscue dicitur, vt omnes concedunt, exprimit τὸ εὐλογεῖν. Id autem esse vi ac potestate non diuersum, a τῷ εὐχαρισεῖν, TE quidem ipsum, VIR VENERANDE, innuere video, Obs. III. p. 283. 349, ita autem clare doceri posse arbitror, vt id aut concedendum, aut certissimae interpretandi leges abolendae sint. Quid enim primo certius hoc interpretandi praecepto, vt, quae vocabula de eadem re, in eodem orationis contextu permutentur, ea pro συνώνυμοις accipi, alterumque ex altero explicari debeat? Hoc si quis in dubitationem vocare audeat, nae is ab interpretandi peritis vehementer ridea-

rideatur, omnemque interpretationem aut tollere, aut incertam reddere iudicetur. Nonne vero, quod Matthaeus & Marcus dixere, λαβὼν τὸν ἄρτον, εὐλογήσας, id Lucae & Paullo est λ. τ. α. εὐχαρισήσας ἐκλασε? Et cum iidem in calice Iesum εὐχαρισῆσαι dicant, Paul-
lus dicit εὐλογῆσαι, 1 Cor. x, 16? Atque ego non ignoro, quod obicit *Calonius*: alterum in altero esse intelligendum, in hunc modum: εὐχαρισῆσαι καὶ εὐλογῆσαι. Sed ne dicam, ea exceptione legem illam everti: concedam, hoc ἐλλείψεως genus non esse omnino improbandum, sed tum, si coniuncti utriusque verbi exemplum proferatur, unde ea ἑλλειψις Graecis s. diuinis scriptoribus vsitata, non temere conficta videatur. Nam si ἐλλείψεως in interpretatione adhibendae non hic modus seruetur, e quolibet efficere licebit quidlibet. In Religione Christiana nulli rei aliquam vim tribui nisi τῇ ἀγάπῃ, Paullus ait, Intelligendum hic esse κατ' ἐλλειψιν aiunt τὴν πίσιν, τὴν δὲ ἀγάπης ἐνεργημένην. Recte. Sed eius rei auctoritatem dat & locus alter Paulli, in quo ista coniunguntur, & vniuersa Christianae doctrinae ratio, quae ad fidem refert omnia. At quis diuinorum scriptorum vnquam ista verba coniuncte dixit? Ne scriptorum quidem Ecclesiasticorum antiquorum quisquam, quod ego quidem animaduenterim, aut ab alio animaduersum viderim, ea coniunxit. Immo ποτήριον εὐλογίας agnouere omnes, esse ποτήριον εὐ-
χα-

χαρισίας f. αινέσεως, vt etiam Syrus Paulli interpres vertit, quippe quod est Ebraeis dictum כֹּס הַלֵּל f. כֹּס הַלֵּל, ποτήριον ὑμνήσεως, αινέσεως, vt bene notat *Casaubonus* adu. Bar. p. 456. Vnde non aliter fere consecratum f. benedictum panem & vinum appellant veteres, quam εὐχαριστηθεῖσαν τροφήν, vt *Iulianus* loco supra commemorato (p. 129.) & τὰ εὐχαριστηθέντα, (ibidem p. 123.) quae sunt profecto consecrata, vt vertuntur bene, seu benedicta, si quis hebraica malit. Atque ipsa profecto series rei a Christo gestae, id ita esse, clamat. Etenim illa verba, in quibus volunt esse proprie consecrationem & benedictionem: λαβ. — ἀνάμνησιν, Christus dixit post εὐλογίαν. Quomodo ergo in his potest esse consecratio & εὐλογία, quae iam peracta erat? Sed posterior aetas coepit, in hoc etiam capite, paulatim consecrationis & benedictionis verbo aliter vti, posteriori illa, quam supra declarauimus, vi, non vt priorem & antiquiorem aboleret, sed vt hanc adderet. *Augustinus* quidem, cum in notissimo illo, Epistolae ad Paullinum, loco, (n. LIX. T. II. p. 300. ed. Frob. 1569.) orationes commemorasset, (h. e. preces) quae fiant, cum benedicitur & sanctificatur, & ad distribuendum panis comminuitur, quam statim petitionem vocat, oratione Dominica ab Ecclesia concludi solitam, idem, alio nobili loco, de quo post plura dicemus, (init. c. 2.) panem & calicem in altari dicit sanctificari (h. e. consecrari, be-

benedici) per verbum Christi, & ita esse corpus & sanguinem Christi. Atque haec posterior ratio, in scholasticos libellos recepta, ita in scholis inualuit, vt prior prope oblitteraretur. Itaque & Theologi nostri, cum Formulam Concordiae componerent, hanc maxime secuti videntur. Ea autem vis cum tribuitur verbo, non profecto aliter existimari potest, quam vt consecratio primum fuerit in verbis Christi. non *εὐχαριστῶντος*, sed tradentis ad comedendum bibendumque panem vinumque, & in his corpus suum & sanguinem tradi affirmantis, nunc autem sacerdotis, Christi verba non modo recitantis in coetu Christianorum, quae est narratio potius, quam consecratio, vt *Chemnitius* aiebat, sed etiam, & quidem vel maxime, praecepto eius & permisso eum imitantis, & panem vinumque cum verbis Christi ori cuiusque ingerentis. Haec paullo pluribus disputare libuit, partim ad refellendum adversarii decretum, partim ad tollendam confusionem vulgarium libellorum, quae miras diuisiones consecrationis peperit, meque olim male habuit, & nunc quoque iuuenum animos subinde ancipites tenet. Nunc ad id, quod propositum est, veniamus.

Sed cum disputationis Muratorianae duae partes sint, altera, quae corpus & sanguinem Christi non per figuram quandam, sed vere & proprie exhiberi pugnet, altera, quae
pa

panis vinique μεταμόρφωσιν eiusmodi defendat, qua panis vinumque tollatur: intelligitur, priorem illam nobis praetermittendam esse. Neque enim nos sumus ii, qui Christi corpus & sanguinem a pane & vino in Eucharistia sumto abesse putemus, sed qui proprium corpus & sanguinem Christi, ut vocatur in *Missa Flaciana*, siue, ut *Leo M.* (Serm. xc.) ait, *Veritatem Corporis & Sanguinis Christi ore sumi vna cum pane*, credimus, idque Liturgiis antiquissimis firmari contendimus: sed panis vinique conuersionem fieri eiusmodi, quae substantiam eius aboleat, negamus, eamque vlla vetere Liturgia firmari, ut id publicum Ecclesiae dogma fuisse putandum sit.

Quid igitur est in Liturgiis antiquis, quo fretus *Muratorius* Romanam illam μεταμόρφωσιν panis vinique defendat? Nihil nisi verba quaedam, contorta & ab usu linguae aliena ratione explicata, ut dudum est demonstratum. In *Romano Ordine*, itemque *Flaciana Missa* (p. 123. extr. 126. pr. 127.) dicitur corpus & sanguis fieri: (p. 125. extr.) confici, quod eodem redit, itemque perfici (p. 126. med.) denique (p. 125. med.) panis transfiguari in corpus Christi. Ex quibus sincerum lectorem, ait, & veritatis audidum intelligere, veram fieri oblato- rum conuersionem in corpus & sanguinem Christi. Si alium, quam Romanis placitis parere adfuetum, lectorem intelligit sincerum & veritatis audi-

audum, non intelliget ex istis verbis, quod *Muratorio* placet. Neque magis id confici credet verbis *Ambrosiani Canonis* (p. 131. extr.) fieri Corpus C. & transformari in Sacramentum C. & S. C. aut *Gothici Missalis* (p. 141.) transformare Corpus & sanguinem C. aut (p. 142.) e conuertendi & mutandi vocabulis.

Iam e *Graecis Orientalium* Liturgiis proferruntur loca, ubi panis & vinum dicuntur *ῥῑνεδαι* vel *πικνιδαι* Corpus & S. C. vel *μσταβαλλεδαι* in C. & S. C. e *Missa Chrysostomi*, item *Basilii* nomine nota, (p. 160.) itemque e *Syriacis* Liturgiis (p. 167. 168.) Ex *Aegyptiacis*, cum *Graecis*, tum *Copticis* (p. 171.) afferitur *transferendi* vocabulum, cum panes ita transferri dicuntur consecratione, ut fiant Corpus Christi, in Liturgia *Coptica*, quae ad *S. Basilium* auctorem refertur, & (p. 173.) rogatur Deus, ut per Spiritum S. transferat dona proposita (h. e. panem & vinum) in sanguinem salutis nostrae, in Liturgia *Alexandrina* *S. Gregorii*: quorum quantam vim putet esse *Muratorius*, post videbimus: ex *Aethiopica* denique ea, quae *Apostolica* vocatur, locus, in quo Christus rogatur, ut panem calicemque transmutet, ut fiat corpus eius purum & sanguis eius pretiosus. Sed in his, ut alii *Romanis* decretis addicti, sic *Muratorius* maxime confidit verbis transformandi, transfigurandi, transmutandi, conuertendi & transferendi: quibus ille, si veras verborum potestates per interpre-

pretandi leges indagare potuiffet, nec nimis pueriliter etymologiam & praepositionem in interpretando amplexus fuiffet, nihil tale subeffe putaffet. Igitur, quamquam ab aliis iam de his verbis dictum eft, quantum fortaffe fatis effe poffit, tamen de iis noftro modo quaedam difputare placet, praefertim, cum non definant, ea nobis opponere: fi tandem aliquando & illis pudorem incutere, & ftudiofos ad videndas subtilius verborum notiones his exemplis acuere, denique locis quibusdam veterum fcriptorum aliquid lucis adfundere poffimus. Sed non alienum videtur, quaedam uniuerfe praefari.

Nulla maior graecis, omninoque bonis literis & fapientiae, illata eft peftis, quam quod quidam, & graece & latine ne medio-criter quidem docti homines, qui e lexicis puerilibus fapere, & ex etymologia verborum, fingulis graecorum verborum partibus pueriliter latine vertendis, fignificationes quaerere cogebantur, aufi funt profanas manus adferre fcriptoribus graecis in latinam linguam conuertendis. Ea enim res peperit monftrofas verfiones, quae vel intelligi non poffent, vel fenfum funderent faepe fal-fum, frigidum, ineptum. Inde porro inie-ctus eft multis, qui fontes ipfos adire, & ex iis haurire non poffent, contemptus praeftantiffimorum Scriptorum, a quibus ingenii humaniffimus cultus peti poterat: cui enim non

C

ridi-

ridiculus videatur ille ipse ingenii humani fons, vt *Cicero* adpellat, *Homerus*, ita latine loquens? Et cum in Philosophis, *Platone*, *Aristotele*, homines stultissimi super istis latinis verbis, cum sua cuiusque vernacula lingua comparatis, philosopharentur, noua quaedam Platonica & Aristotelica Philosophia extitit, quam *Plato* & *Aristoteles*, si iis in vitam redire datum fuisset diuinitus, nullo modo non tantum pro sua agnouissent, sed ne intelligere quidem potuissent, et si *Ciceronis* latinitatem omnem secum attulissent. Sed eadem plaga iniecta est libris diuinis, doctrinaeque Christianae, per eos, qui primi instituere latinos facere. Ii qui & quales fuerint, mea sententia, nunc non disputabo; alius de ea re, & de vniuersa hac interpretatione latina differendi locus commodior dabitur: illud dicam, homines fuisse vel vtriusque linguae vix mediocriter peritos, vellea, qua eodem tempore, aut paullo post, *Aquila*, infecti superstitione, vt plerumque verbum de verbo, sed hoc quoque pro qualicunque facultate, neglecta latinae linguae indole & consuetudine, sibi reddendum putarent, id quod nemo, qui reliquias istius versionis inspexit, ignorare potest. Quid igitur accidit? Primis temporibus, cum religio Christiana maxime esset apud Iudaeos, isti rationi adfuetos ac deditos, & omnium adeo linguarum praeter suam contemtores, placuit, fuitque
apud

apud hos certe tolerabilis, qui comparandis verbis latinis cum suis facile istam latinitatem intelligebant. Placuit vero non Iudaicae originis hominibus modo, sed etiam ex alia gente, qui vel a pueris ei essent adsueta, & rerum praestantia occupati, verborum vitiis non admodum offenderentur, sicuti boni illius *Augustini* stomachus *offum* (pro osse) non modo facile concoquebat, sed id etiam ab *Hieronymo* sibi ereptum aegre ferebat; vel qui ipsi latinitatis parum periti, in sermone sibi omne genus barbarismi & soloecismi indulgerent, nec eos in aliis animaduernerent. Sed paullatim coepit displicere elegantibus hominibus, atque, ut ego arbitror, ipsi *Damaso*, Pontifici Rom. homini, ut *Hieronymus* (de script. Eccl.) vocat, elegantis ingenii, qui etiam elegantes & venustos versus scriberet: ut non modo, quod libri nimis variarent, sed etiam, quod genus dicendi rideretur, verendumque esset, ne contemptus ille a verbis ad res, qui facilis & brevis transitus est, veniret, correctionem *Hieronymo*, eruditissimo viro & linguarum peritissimo, mandaret. Quid? cum bonae literae ante haec tria secula restitui coepissent, non satis constat, eruditissimos quosdam homines, *Lazarum Bonamicum*, *Angelum Politianum*, *Petrum Bembum* & *Iac. Sadoletum*, illos elegantiorum literarum Doctores, hos vero etiam Ecclesiastici ordinis homines & Theologos, contemtim de Psalmis Daudicis & Epistolis Pauli

locutos esse? non quo illi Dauidem & Paullum spernerent, quos si aut sua lingua loquentes audiissent, & satis hebraice docti fuissent, vt intelligere possent, quorum neutrum illis contigisse satis scimus, aut saltem per interpretem *Buchananum* & *Castellionem* cognouissent, vehementer admirati essent: sed quod istam graecohebraicam latinitatem ne intelligere quidem possent, nedum probarent. Nam *Horatius* ille, qui *Pindarum* in coelum ferebat laudibus, & imitari studebat, si nihil aliud quam *Erasmi Schmidii* absurdam versionem vidisset, eundem illum bonum *Pindarum*, siue potius miserabilem *Schmidium* abiecturus erat. Sed, vt veniat eo, quo tendebat, oratio, longe maius, certe latius patens illud malum est, quod ea interpretandi ratio generauit dogmata abhorrentia a veritate, per quae turbatae sunt Christianorum mentes, & dissidia, nulla humana ope componenda. Mihi quidem videtur terribilis illa & abhorrens ab omni humano sensu decreti absoluti opinio nunquam in lucem ventura fuisse, nisi *Augustinus* infelix illud praedestinationis verbum, ex etymologia τῆ προορισμῶ, nimis amplexatus esset, & suis potius partibus ponderasset, quam consuetudine Graecorum, qui in suo verbo non magis tale quid vnquam viderunt, quam Latini veteres, in suo. Sed ille ignorauit graecas literas, quas nimis sero, atque admodum leuiter, attigit. Similesque noxas de-

dere

dere interpretes veteres latini Irenaei, Origenis, Gregorii Nysseni, aliorumque Graecorum Ecclesiae Patrum, pessimi verborum latinorum opifices, e quorum fabrica multa stolidissime ad graecorum verborum etymologiam efficta prodire, vt *transcorporatio*, *transcorporatus* (ε μετασώματως, & μετασώματωδής,) *transclementatio* & similia. Hos recentioribus temporibus imitati sunt, qui Patrum Graecorum scripta cum versione latina edidere: qui hanc sibi legem videntur scripsisse, vt ne aliter verterent e praepositione, vt alias taceam, μετα composita, quam per *trans* & propria alterius verbi interpretatione seruata: vnde in Cyrilli, Basilii, Nysseni, aliorumque libris, quibus frequens vsus verborum μετασχησθαι & μετασχημάσεως, pro *commutare utcumque*, vel *instaurare*, reperias ista verba nunquam aliter exprimi, quam per *transelementare* & *transelementationem*: & alia similiter. Iam in nonnullis hoc tolerabile erat, vbi etiam vetus consuetudo latina ferret: sed illud hinc incommodum, quod Theologistae bonarum literarum rudes in talibus argutati sunt, & partes verborum ad literam, vt male vocant, hoc est, puerili ratione, missa consuetudine graeca & vetere latina, interpretati, dogmata noua procuderunt, eaque sanctis Ecclesiae viris obtrudere conati sunt, quibus nihil tale in mentem venerat. Haec est vera sed admodum sordida origo famosae istius, & non modo a sacris

literis, sed etiam ab communi & omni aurium humanarum sensu abhorrentis transubstantiationis: haec sentina, vnde pleraque, & ab aliis, & ab *Muratorio* hausta sunt, quae ad fucandam hanc Helenam scilicet, velut e Patrum sanctorum scriptis & e Liturgiis antiquis, proferuntur. Quae nunc age separatim consideremus.

Ac primum occinitur nobis μεταβολῆς s. *transmutationis*, *conuersionis*que verbum, vt haud dubium μετεστώσεως olim creditae argumentum: sed ita, vt ad firmandum nihil nisi verba ipsa proferantur graeca aut latina. Enimvero verba illa frequentari in illa re a veteribus, nullam dubitationem habet: quo sensu dicantur, id vero dubitari solet. Iam cum toties demonstratum sit ab *Albertino*, *Claudio*, *Blondello* & aliis, a TE que, VIR VENERANDE, exemplis perspicuis, ex vno *Aeliano* pluribus, quam late pateat μεταβολῆς potestas, & quam saepe qualemcunque nouationem significet: legitima disputandi & digna tali viro ratio postulabat, vt istis locis aliquid inesse ostenderet amplius, demonstraretque, ni substantiae ipsius conuersio intelligeretur, nullum sensum commodum aut consentaneum doctrinae Christianae, sed frigidum & ineptum relinqui. Sed nihil horum illi in mentem venit docere: nisi hoc est docere, cum negat, in iis esse amorem veritatis, aut animum a praeiudicatis opinionibus liberum, qui non videant transub-

substantiationem, quae in istis verbis tam perspicue luceat. Enimuero si hoc est dubia ab ambiguitate interpretando liberare, quis est tam rudis omnium literarum, quin omnia explicare possit, quin e quibuslibet verbis quidlibet eruat, cum negantem & dubitantem quemlibet potenti illa demonstratione, *coecus sit, qui videre nolit hoc in verbis istis esse*, statim coercere possit. Sed quando ille noluit nos hic doctrina sua impertire, nimis alias liberalis ac prope dicam profusus in eo genere: adeo multis & magnis voluminibus rem literarum obruit: nobis, modestis & timidis hominibus, qui non audemus ita pro imperio pronunciare atque edicere de sensu verborum, nobis, inquam, docendum est, Romanam interpretationem ab verbis illis Liturgicis esse alienissimam: quae deinde etiam ad loca Ecclesiasticorum scriptorum graecorum latinorumque licebit conferre.

Apud Graecos scriptores praesertim elegantiores *μεταβολή* ita late varieque dicitur, vt interdum difficile fuerit interpretibus, veram eius, quoque loco, sententiam adsequi. Auctor consuetudinis eius inprimis fuit, vt opinor, *Thucydides*, qui, cum multa noua insolenterque dixerit, trahens verba quaeque, velut pro imperio, quocunque liberet, aduersus scilicet imperiis, & cum in militibus iam non posset, in verba imperium exercens, vnde non parua obscuritatis pars orta est, tum etiam *μεταβολήν* vsurpauit durius, modo ex-

tendens ad genera late patentia, modo ad formas rerum singulas & angustas contrahens. Sed cum *Thucydidis* tanta esset admiratio, ut in eius lectione assidui essent, qui aut orationibus habendis, aut historia scribenda laudem quaerere vellent, atque etiam sententiis eius & verbis exquisitioribus omnes summo studio distinguerent orationem, factum est, ut cum aliis etiam μεταβολή tali ratione frequentaretur ab oratoribus & historicis, atque inde lectoribus non parua interdum ambiguitas obiiceretur. Nihil est rerum humanarum in utramque partem, fortuna utraque, eiusque formae & partes omnes, diuitiae, honores, calamitates belli, victoriae, morbus, recuperata valetudo, mors ipsa, tum, in rebus vitae expertibus, nihil, quod aliquando ortum sit, quod initium habuerit, quod ab aliqua quacunque antegressa causa quomodocunque accesserit, quod non μεταβολῆς verbo exprimatur a *Thucydide*, (vid. II, 48. 53. VII, 76. 87.) & eius sequacibus *Polybio*, *Dionysio Halic.* *Iosepho* in primis, ut Ant. VI, 14. 2. VII, 9, 2. II, 3. XIII, 14. 2. XV, 3, 4. &c. Haec ratio ita fluxit & propagata est, ut sit, ut etiam in communem sermonem venerit, nemoque dubitarit, iis loquendi modis uti, non modo apud Graecos, sed etiam apud Latinos. Haec observatio plurimum profuerit studiosis ad bene intelligendos veteres, hoc est, primum ad indagandum, deinde ad definiendum perspicua ac certa ratione, quid quoque

que loco in μεταβολῆς nomine intelligi debeat. Etenim, vt apud *Ciceronem* is demum vere intelligit *reipublicae* verbum, qui in loco quoque plane tenet ac dicere potest, vtrum in eo vniuersum imperium vel ciuitas, an pars eius aliqua, aerarium, leges, magistratus, religio, &c. exprimatur: sic μεταβολήν, *conuersionem*, *transmutationem*, *res nouas*, non assequutus est, nisi qui, e proposita obseruationis formula, nominatim definire euentum potest. Vnum e *Iustino*, l. c. p. 128. locum afferemus, exempli causa, parum vulgo intellectum, sed eundem nostrae causae admirabiliter salubrem. Adscribam autem locum integrum, qui etiam post nobis vsui erit. Consecrationis & distributionis modo ac ritu commemorato, ita pergit *Iustinus*: καὶ ἡ τροφή αὐτῇ καλεῖται καὶ ἡμῖν εὐχαριστία -- ὃ γὰρ ὡς κοινὸν ἄρτον, εἰδὲ κοινὸν πνεῦμα ταῦτα λαμβάνομεν· ἀλλ' ὅν τρόπον διὰ λόγου Θεοῦ σαρκοποιηθεὶς Ἰησοῦς χρ. ὁ σωτὴρ ἡμῶν καὶ σάρκα καὶ αἷμα ὑπὲρ σωτηρίας ἡμῶν ἔσχεν, ὅτως καὶ τῇ δι' εὐχῆς λόγῳ τὸ παρ' αὐτοῦ εὐχαριστηθεῖσαν τροφήν, ἐξ ὃ αἷμα καὶ σάρκες κατὰ μεταβολὴν τρέφονται ἡμῶν, ἐκείνῳ τὸ σαρκοποιηθέντος Ἰησοῦ καὶ σάρκα καὶ αἷμα ἐδιδάχθημεν εἶναι. De prima parte huius loci post dicetur: nunc de posteriori videamus. Consecratam τροφήν, *panem*, *aquam* & *vinum* ante vocauerat, & a Diacono distribui in Ecclesia dixerat, eandem (sic prius καὶ capiendum totus contextus clamat) credi esse carnem & sanguinem Christi humanitate

induti: ea autem τροφή ali carnem & sanguinem nostrum. Super his verbis quae disputentur mox commemorabimus. At id fieri ait κατὰ μεταβολήν. De his verbis video tacere interpretes. Latina versio recte illa quidem interpretatur *per mutationem*: sed vereor, ut illam ipsam versionem & auctores & alii satis intellexerint: ita ea, in disputatione de hoc loco, negligunt & Romani & ceteri. Ex nostra autem illa ratione consideranti apparebit, sic planius interpretanda esse: *per concoctionem*: illa nutrimenta, panis, vinum, aqua, alunt corpus nostrum per concoctionem, at eadem sunt caro & sanguis Christi, & hactenus alunt animam per fidem. Μεταβάλλειν τροφήν pro *concoquere* est apud physicos & medicos graecos. Aristoteles de usu partium III, 14. de ventriculo exponens, conuenisse ait, ut non idem esset locus τῆς τε ἀπέπτου τροφῆς καὶ τῆς περιττώματος, sed ut esset locus proprius, ἐν ᾧ μεταβάλλει, h. e. ubi fieret πέψις s. concoctio; quod *Nemesius* plenius expressit μεταβάλλειν εἰς χυμούς, de Nat. Hum. p. m. 110. Sicut alii coniungunt μεταβάλλειν καὶ πέψαι, sic alii πέψαι καὶ χυλοποιῆσαι, ut *Theophilus Protospatharius* de Fabrica Corp. Hum. II, 4. (ap. *Fabric. B. G. Vol. XII.*) quamquam non bene hic χυλοποιῆσαι: is enim locus non est ventriculus. Inde fluxit genus dicendi ad Latinos, ut & *Cicero* de Nat. D. II, 54. ventriculum diceret *mutare & concoquere*, quod receperit,

κατὰ

κατὰ συνωνυμίαν iungens vtrumque, & more suo, explicans oblcurcius per notius vocabulum: cum *Lactantius* de Opif. D. c. II. *percoquendi* verbo solo contentus sit. Iam, sic intellectis *Iustini* verbis, etsi sua sponte patet, eum recta fronte pugnare cum Romanorum opinione, tamen post, vbi de Patrum Eccl. locis disputatio erit, eius nobis vsus futurus est. Nunc illud modo volumus efficere, vt intelligeretur, in ipso verbo μεταβολῆς, & hinc ductis latinis, *mutationis*, *transmutationis*, *conuersionis*, nihil praesidii esse Romanae sententiae, & studiosos ad id recte vbique intelligendum acuere.

At vim fortasse hanc accipiet e locis iis, vbi commutationis istius modus pressius exprimitur: in quibus principatum tenet Cyrilli ille in Catech. Myst. IV. init. το ὕδωρ ποτὲ εἰς οἶνον μεταβέβληκεν ἐν Κανᾷ τῆς Γαλιλαίας, οἰκίῳ νευματι· καὶ ἐκ ἀζύου πινός ἐστιν οἶνον μεταβαλὼν εἰς αἷμα; quo prolato, velut in certo triumpho proclamat *Muratorius*: *Habes hic in meridie positam Catholicorum transubstantiationem!* Sed huic quoque loco respondere dudum viri docti, iuprimisque copiose *Albertinus* p. 24. negans, hanc conuersionem vini in sanguinem Christi necessario ad substantiam referri. In quo profert magnam copiam locorum aliorum e scriptis Patrum, in quibus & ipsis μεταβολή vnus rei in aliam commemoratur, vt μεταβολή τῆ σωτῆρος εἰς τὴν θεότητα, ex *Eusebii* Demonstr.

monstr. Ev. αὐθρόπων μεταβολή εἰς θείαν φύσιν, & *Chrysostomi* & *Macarii* homiliis, & alias: quarum tamen nulla substantiam rerum attingat. Sed ea commode dissimulat ac praeterit *Muraetorius*. Fuere tamen alii, qui sic responderent, ut dicerent, etsi non semper ista verba indicarent conuersionem, quae ad substantiam pertineret, hoc tamen in *Cyrilli* loco talem intelligendam esse propterea, quod ea comparatur cum conuersione, quae haud dubie substantiae fuerit. Huic vero obiectioni quae respondet *Albertinus*, & vel ex eo, vel post eum alii, ea vero, ut verum dicam, mihi non satisfecere. Scilicet (p. 425.) istas comparationes, ait, non nimis esse vrgendas, aut ad vivum resecandas: in eoque exemplis quibusdam e scriptis Patrum Ecclesiae, nominatim eiusdem *Cyrilli*, utitur. Audio. Sed restat illud, quod etiam si id semper fieri non debet, tamen interdum fieri posse videtur, dubitarique potest, an hoc in loco debeat fieri, praesertim cum non similitudinis, sed exempli causa vinum istud Galilaeum commemoretur. Veluti si quis similiter dicat: *Lazarum* quondam, *Jairi* Filium, *Christus* potuit in vitam revocare οἰκέτω νεύματι, & non credemus, cum dicit, se nos quoque in vitam revocaturum? non ea comparatio mera & similitudo putetur, sed argumentatio, quae collatio vocatur in Scholis, a pari ducta, magnam illa vim habens. Atque etiam, si hanc rationem probemus, eripiun-

piuntur nobis loca, quae veram corporis & sanguinis Christi praesentiam creditam in veteri Ecclesia indicant per collationem similem. Igitur pressius hic agemus, & ex ipsa rerum natura demonstrabimus, in utraque parte, non idem μεταβολῆς & conuersionis genus esse. Nam substantiæ μεταβολή in aliam non potest, nisi duobus modis fieri: quorum alter est, cum e materia alterius gignitur noua, vel transpositione partium sola, vel adiectione nouarum ac detractiōe quarundam veterum; quomodo & naturaliter fit quotannis, & tum Christi vi factum est ex aqua vinum, fitque in corpore humano e nutrimentis succus nutritius, sanguis, bilis, &c. alter est, cura priori substantia ad nihilum per vim diuinam reducta, eius in locum repente substituitur, eadem vi, noua, natura ac substantia. Hic iam interrogatos cupiam transubstantiationis defensores, vtrum genus conuersionis probent, atque in sacra coena accidere velint: nam aliud praeter ista duo intelligi nullum potest. Non opinor adeo absurdos, & in Christum impios fore, vt e materia panis & vini Corpus & Sanguinem Christi creari dicant. Restat igitur, vt alterum genus μεταβολῆς amplectantur & panis & vini. Tum ego vero primum hanc proprie non *transmutationem panis in corpus Christi* esse dicam, sed *permutationem panis cum corpore Christi*, quam omnis antiquitas nescit, quae panem & vinum sumi consentiente voce

voce profitetur, vt locus *Iustini* supra propositus docet & plura post commemoranda: deinde eam non admittit *Cyrilli* comparatio, nec talem credere antiqui potuere. Nam in conuersione aquae in vinum, aquae species, odor, sapor, vis denique perit, & omnes, qui biberent, colorem, saporem, vimque vini sentire, nihil quicquam de aqua suspicati: id vero longe secus esse in S. Coena *Cyrillus* non ignorabat. Vnde fit, vt talem μεταβολήν, qualis illa nuptialis fuit, nullo modo nec ipse, nec quicumque hac comparatione vsi sunt, intelligere potuerint. sed aliam, quae praesentiam quidem corporis & sanguinis Christi veram praestaret, sed panis vinique substantiam non tolleret.

Quae ergo & qualis est illa Eucharistica panis vinique μεταβολή e mente eorum, qui Liturgiarum carmina composuere? Nempe eadem, quam ceteri Ecclesiastici priscae aetatis scriptores intellexere, quae primo istis στοιχείοις per preces & laudes diuinas aliquam sanctitatem adderet, vnde idem ille Catechesium auctor ἀγιάζειν & μεταβάλλειν vt συνώνυμα coniungit, vt post *Mornacium* & *Albertinum* centies dixere Romanae opinionis aduersarii; deinde iis vi diuina verum corpus & sanguinem Christi adiungeret, vt, quemadmodum corpus Christi, propter coniunctionem cum diuina λόγος natura, verba sunt *Nysseni* ex Oratione magna Catech. c. 37. si tamen est *Nysseni*: πρὸς τὴν Θεϊκὴν ἁζίναν

ἀξίαν μετεποίηθη, in diuinam dignitatem conuer-
sum esset, proptereaque Deus & esset & diceretur,
non tamen per se, sed propter coniunctionem
cum diuina natura, ita panis consecratus,
ὁ τῷ λόγῳ τῆ θεῆ ἁγιαζόμενος ἄρτος, εἰς σῶμα
τῆ θεῆ λόγῳ μεταποιῆται, in corpus Christi con-
uersti crederetur, dicereturque corpus Christi,
non per se, sed quod esset cum corpore Chri-
sti coniunctus Sed hanc Patrum Ecclesiae
omninoque veteris & incorruptae Ecclesiae
mentem fuisse, altero capite intelligetur. Sed
Liturgiarum concinnatores ita sensisse, pla-
nissime probem loco Canonis Ambrosiani, a
Saxio V.C. ex antiquo Missali Ambrosiano de-
scripto, & ad Muratorium misso, in quo sacer-
dos post consecrationem, qua illam μεταβολὴν
ἁγιασθῆναι fieri putat cum Ecclesia Rom. Muratori-
us, tamen Deum rogat, vt mittat Filium su-
um, vt veritatem Dominici corporis & san-
guinis hauriant κοινωνοὶ. Quibus precibus
quorsum opus, si iam conuersus est in corpus
Christi panis substantia, si e vino facta est sub-
stantia sanguinis. Illud addere, quamquam
leue est, non alienum videtur: quod Murato-
rius se desiderare, ait, in Bingamo animum ad
veritatem sincere quaerendam compositum, qui
se dicat in Nysseno quaesiuisse, quae conuer-
sioni Romanae fauerent loca, nec inuenisse,
cum talia sint plura in eius scriptis, e quibus
vnum affert illum, e Catechesi magna; in eo
iniuriam ipsi facere. Non minus enim quam
Mura-

Muratorius illum locum, & alia similia apud *Bellarminum*, *Perronium*, atque etiam *Albertinum*, repererat *Bingamus*: sed in eo ipso nihil, quod substantiae conuersionem iuuaret, reperit, ut nec nos ullo modo videre possumus. Satis dictum, in hoc quidem capite, de μεταβολῇ, transmutatione & conuersione: ad μεταμόρφωσιν, transfigurationem & transformationem, cui multo magis confidit *Muratorius*, transeamus.

Ac verbis quidem his uti Liturgias & Ecclesiasticos scriptores, notum diu fuit, nec admonitore opus erat *Muratorio*. Illud bene fecisset, si iis recte interpretandis dignum se praestitisset fama nominis sui. Nunc nulla in alia re magis se turpem dedit. Ac primo vehementer confirmata est opinio, quae dudum insedit animo, totam hanc transubstantiationis fabulam natam esse e Metamorphosis Ouidianis. Imperiti ac stulti Theologistae ista μεταμορφώσεως, transformationis s. transfigurationis, notione imbuti a pueris, cum in veterum Theologorum libris eadem verba reperirent, iis mythicam istam notionem subiicere maluerunt, quam Christianam & e sacris literis haustam. Quas si audire voluissent de Christi μεταμορφώσει, itemque de μεταμορφώσει Christianorum in εἰκόνα Dei tradentes, intellexissent sane ista verba, praeterquam in fabulis, ad substantiae commutationem non pertinere, Quamquam *Muratorius* maius flagitium patra-

patrauit, qui ad Romanae transformationis commentum confirmandum obscenissimo Neronis facinore abusus est. Sed ipsum audiamus, quamquam parum caste loquentem, Catechetam Mutinensem. Capite decimo, prolatis Ambrosiani Canonis excerptis, adiungit loca ex *Ambrosii* scriptis, in quibus est transfigurationis in re Eucharistica commemoratio. Dehinc quaerit: *quid sit transfiguratio & transfigurari Ambrosio?* respondetque: *Utique substantialis conuersio & mutatio alicuius rei in alteram.* Quomodo hoc docet? *Audi, inquit, Suetonium, haec scribentem* (in Nerone c. 28. de Nerone) *Puerum Sporum, exsecris testibus, etiam in muliebrem naturam transfigurare conatus est.* Non impium est, hoc tam infandum facinus cum re sanctissima comparare? Talis est illa Eucharistica transfiguratio? Ergo Sporus desinit esse puer, & conuersus est in naturam & substantiam puellae? Sed obscenum illud & ab hac re alienissimum Neronis piaculum mittamus. Quid amplius? *Audi Plinium inquentem* (H.N.IX, 3.) *sole Cancri signum transeunte, cancrorum, cum exanimati sint, corpus transfigurari in scorpiones narratur. Fabulam idem Plinius censet* (VIII, 22.) *homines verti in lupos, homines transfigurari in lupos.* Haec e mediis fabulis sumpta, hinc ipsa adeo transubstantiatio sumpta. Subiicitur ad extremum locus *Tertulliani*, velut omnium luculentissime vim verbi huius explicantis, e Libro c. Prax. (c. 27. in ed. 2. Pamela.

mel. p. 659. C.) *transfiguratio autem interemptio est pristini: omne enim, quod transfiguratur in aliud, definit esse, quod fuerat, & incipit esse, quod non erat.* Atque hunc locum nos heterodoxi legere ac relegere iubemur, ut intelligamus, quam bene nobis sedeat tam prae fracte *Impanationem* venditare, & *transsubstantiationi* ob nouitatem verbi insultare. At o! bone, quam vehementer falleris! Vis ergo hoc pro certo poni, ut transfigurationis verbum semper e *Tertulliani* praescripto accipiatur? Quid fiet primum Seruatori nostro Iesu Christo? qui in monte Itabyrio μεταμορφώθη, *transfiguratus est*, ut vetus interpretes habet, & *Tertullianus* non uno loco c. Marcionem? An hic quoque e definitione *Tertullianea* desinit esse, quod fuerat? et in aliam naturam ac substantiam est conuersus? Quid? animi nostri per fidem & sanctitatem μεταμόρφωσις, apud Paullum ad Romanos c. 12. estne animi nostri interemptio & substantiae mentis in aliam conuersio? Ipse profecto *Tertullianus* nolit verba sua ex hac lege iudicari. Quid enim? Cum a Satana hominis spiritum malitia transfiguratum dicit (de cultu fem. L. II, p. 176. D.) cum licentiam artis transfigurare materiam vulgarem, lignum, saxa &c. in Deos: (Apologet. c. 12. p. 14. B.) cum id, quod in nuptiis accidit virgini, carnis transfigurationem appellat (de Virginib. velandis p. 200. D.) cum transfigurari Satanam in Angelum lucis, auctore Paulo, dicit (adu. Marcion. V. p. 600.

p. 600. B.) & Pseudapostolos atque hypocritas *transfiguratores sui* (ibid. A) in his igitur putemus istam suam definitionem in animo habuisse, conuersiones substantiarum cogitasse? Ridiculus vero fit, cui tale quid in mentem venerit.

Sed ipsas Liturgias de hoc verbo audiamus, vt vanitas & incitia ex eo aliquid pro sua opinione colligentis *Muratorii* appareat. In Sacramentario Gelasian. p. 514. extr. in benedictione Presbyterorum, haec verba sunt: *vt corpus & sanguinem Filii tui immaculata benedictione transforment*: quae totidem literis sunt in Missali vetere Francorum, subiecto collectioni *Muratori*. p. 668. extr. sicut in Missali Gothico. p. 534. extr. Sacerdos orat, *vt fiat Eucharistia legitima - - - in transformatione corporis ac sanguinis Domini Dei nostri I. C.* Si transformatio & transfiguratio e *Tertulliani* formula, quam tantopere probat *Muratorius* capienda est, iam ipsum corpus Christi & sanguis interimetur & in aliam substantiam transibit: quod cuius aures non reformidant & abhorrent?

Iam in Ambrosianae Missae excerpto (p. 131) cuius supra mentio iniecta est, *Panis & vinum in Sacramentum corporis sui & sanguinis a Christo*, instituyente Eucharistiam, *transformatus* dicitur; quae forma & in aliis Missis occurrit: cui par est illa *Isidori Hispalensis* de Eccl. off. I, 18. cum, *panem & vinum visibilia quidem esse, dicit, sed sanctificata per Spiritum S. in Sacramen-*

tum diuini corporis transire. Non hinc clarum est, consecratione effici, non vt panis aboleatur, & corpus Christi in locum eius succedat, sed vt aptus fiat Sacramento, vt sanctitatem accipiat hinc, quod cum eo aut per eum Christianis contingat frui corpore Christi? Denique *transformationem* nihil aliud esse, quam *ἁγιασμόν*, clarum est e Missa sancti *Leudegaris Martyris*, in qua sacerdos orat: *vt descendat benedictio tua super hunc panem & calicem in transformatione Spiritus Sancti.* Spiritus Sanctus e mente veteris Ecclesiae, in Missarum formulis expressa, panem & vinum *ἁγιάζει καὶ μεταβάλλει.* vt catechesium *Mytagogicarum* auctorem loqui supra vidimus, vel *μεταμορφοῖ*: quae sunt synonyma omnia e legitimae interpretationis praeceptis.

Longiores fuimus in duobus verbis, quae maxime in hac controuersia iactantur, & imperitis facillime fucum faciunt. In ceteris libebit esse breuioribus. Post superiora autem illa plurimum tribuit ad causam suam obtinendam verbo *transferri & transire*, cum panis & vinum dicuntur vel transferri, vel transire in corpus & sanguinem Iesu Christi, vt in *Liturgia Alexandrina S. Gregorii* (ap. Renaldot T. I. p. 31): *Mitte super nos gratiam Spiritus S. qui sanctificet & transferat haec dona proposita in corpus & sanguinem salutis nostrae: qua in Missa etiam commutari proposita dona dicuntur, & Iesus panem facere corpus, calicem autem sanguinem suum.*

suum. Eo loco commemorato, subiicit demonstrationem potentissimam hancce: *Qui in eiusmodi verbis ac petitione transmutationem donorum ab antiquis deprædicatam non agnoscit, libero animo hæc minime contemplatur.* Ac talis semper est, tales omnes eius demonstrationes. Nihil ille de vsu loquendi, ad rationem Grammaticorum: nam Theologum agit. Nempe in Grammatica ratione ipsi ante in aliis libris sæpe res male cesserat. Potentiores sunt atque efficaciores magnæ oratoriae siue sophisticiæ potius demonstrationes: *Coecus sit, qui videre nolit, hoc esse in verbis istis: habes hic in meridie positam transsubstantiationem.* Hæc Liturgiæ excerpta nihil aliud exposcunt nisi sincerum lectorem & veritatis unius avidum, ut intelligat, quid ipsis vetustis sæculis Ecclesia Rom. de Eucharistia tradiderit & crediderit. Iam tot loca adduximus ex Eccl. lat. Liturgiis - - ut cuicumque sincere agenti constare possit, non aliam fuisse Ecclesiæ veteris mentem &c. At doctissimi viri, istorum verborum hanc vim non esse, clamant, consuetudinem loquendi istorum temporum consulendam esse, eam docere aliter, quam Romani velint, ista verba intelligenda esse. His vero ille non dignatur respondere, non immittere se istis Grammaticis minutiis & verborum concertationibus: res scilicet verbis præfert, cum magnis Philosophis, & reales istas demonstra-

tiones verbalibus. Sed vt ad rem redeamus, remittit nos ad extremum ad *Renaldotium*, quem dudum, ait, ostendisse, quam futile ac violenta interpretatione *Cl. Salmasius* eludere ac deprauare conatus fuerit in his verbis mentem perspicuam ac fidem Aegyptiacae Ecclesiae. Talia scilicet designant Grammatici & Critici, toto coelo, vt aiunt, a Theologis diuersi, cum suis minutis interpretationibus verborum. At *Renaldotius* (T. I. Liturg. Or. p. 306.) nihil aliud fecit, nisi vt ista verba male ab *Salmasio* (Epist. p. 72.) versa ex Arabico esse ostenderet: deinde eius interpretationes μεταβάλλειν, μεταποιῆν, μετασχεῖν, μεταρρυθμίζειν, alienas esse a mente Patrum ediceret, sed id se non agere profiteretur, vt accurate eas refelleret. Nec id agebat *Muratorius*. Nos autem desideramus hoc, vt ostendatur legitime, verba ista, sanctificet ac transferat haec dona in corpus & sanguinem salutis nostrae, habere hanc vim, vt μεταμύρωσιν aliquam, quales in physicis eueniunt, aut in Ovidiano Opere descriptae sunt, quae substantiam alteram perimat atque proferat nouam, significare debeant: nam veram corporis & sanguinis Christi praesentiam Liturgia hac & aliis Orientalibus firmari accipimus, dante; *Renaldoto*, in Diff. de Liturg. Orient. Orig. & Auctor. p. LVII. & accepit dudum *Ianus ὁ μαχαίρης* in Diff. de Liturgiis Orientalium in loco de S. Eucharistia Euangelicae veritati suffragantibus,

Pro-

Propos. V. p. 32. Sed id fieri non posse, plane demonstrari potest. Ac primum hoc mihi debet concedi, illud *transferre*, quod & in latina Liturgiae *Cyrilli* Copticae versione ap. *Renaldotium* T. I. p. 48. extr.) occurrit, esse ductum a Graeco μεταποιῆν, quod est in *Gregorii* Liturgia graeca (ibid. p. 105. extr.) eiusque adeo esse interpretationem. Nam Arabica versio e Graeco expressa est, & quae ibi est Arabica vox (هَجَر) nihil aliud quam verbum μεταποιῆν, h. e. μεταβολήν, *mutationem*, significat. Inde fit, vt hoc verbum non efficacius sit quam μεταβάλλειν, *mutare, commutare*, siue *transmutare*, vt Graecum vertit *Renaldotius*, idque malunt fere, pueriliter amplexi illud *trans*, quasi *transmutare* plus sit, quam *mutare*; quod non esse, nemo nisi rudis linguae latinae neget. Atque etiam imperitiae interpretandi merito reus arguitur *Renaldotius*, qui verbum Arabicum per *transferre* interpretatus est, quod latini neque de mutatione quacunque, neque de conuersione rei vnius in aliam vsurpant, (quamquam etiam in Missali Gothico haec forma occurrit p. 548. extr. & subinde apud Ecclesiasticos scriptores infimae aetatis, vid. *Blondell* sur l'Eucharistie c. 5. p. 185. 186.) estque a tota hac re alienissimum: socordiae autem *Muratorius*, qui ista exscripsit e versione Renaldotiana, negligens securusque linguae. Quanto melius *Salmasius* fecit, cum *conuertere* interpretatus est. Sed imperiti linguarum,

qui verba magis, quam vim vident, cum legunt *panem transferre in corpus*, facile inducuntur, ut nescio quam emphasin ac vim in isto verbo esse putent, ut facere videmus omnes linguarum non satis peritos, quibus omnia plena sunt emphasium. Ac fortasse hoc quoque spectauit callidus interpret. Sed nihil agit. Illud *transferre in C. & S. I. C.* nihil aliud est, quam quod supra docuimus esse *transformare & transmutare in C. & S. I. C.* quod indicat etiam locus alter in *Cyrilli Liturgia*, ubi sacerdos orat, ut mittatur Spiritus Sanctus super hunc panem & super hunc calicem, ut purificentur & transferantur: & hunc panem quidem faciat Corpus C. & c. Hic purificare & transferre nude ponuntur: eaque verba expressa sunt & Graecis ἀγιάζεν καὶ μεταβάλλεν ἢ μεταποιεῖν: quorum coniunctio quam vim habeat, supra dictum est, e formula Catechetæ Graeci, quicquid Spiritus S. attigerit, id ἁγιάσαι καὶ μεταβέβληται. Adde tertium in *Liturgia Coptica Basilii*: benedic eos (panem & calicem) sanctifica eos, consecra eos, transfer eos, ita, ut panis quidem, & c. ubi quatuor verba idem significantia coniunguntur. Haec dictis B. Iani (loco ante indicato p. 57.) admodum leuiter defuncti disputatione hac, qua ostenderet non esse in Liturgiis Orient. transubstantiationem, addi commode a studiosis poterunt.

Restat,

Restat, vt dicamus de locis iis, vbi *Spiritus Sanctus* dicitur panem facere, conficere corpus Christi, vinum autem sanguinem Christi, panis fieri caro s. corpus Christi; quae sunt per multa in Occidentalium & Orientalium Liturgiis. Has autem loquendi formas non pertinere ad substantiae conuersionem, ita saepe dictum est a multis, *Mornaco, Albertino, Claudio, Blondello*, nostratibusque Theologis, vt taedeat aliquid addere. Sed virorum praestantissimorum opera his se finibus continuit, vt aliis Ecclesiasticorum Scriptorum locis ostenderent, verum esse, quod *Cyrillus Alex.* in Thesauro, assert. 20. dixit: τὸ γενέσθαι πάντως φύσεως σημαίνει μεταβολήν. v. *Albertin.* p. 509. a. Mihi autem optime Romana ratio refelli, & vera eius formulae vis reperiri posse videtur, si originem eius indagemus & consideremus. Ego autem mihi dudum habui persuasum, hanc φράσιν arcessitam esse e Iohanneo Evangelio, & verbis illis notissimis, ὁ λόγος σὰρξ ἐγένετο. In eam sententiam duae me res maxime impulere. Prima, eaque grauissima haec est, quod antiquissimi scriptores Ecclesiastici mysterium hoc Eucharisticum comparant cum mysterio ἐνστακίσεως, simillimamque esse vtriusque rationem pronuntiant, denique illud ex hoc intelligi, explicarique volunt, vt altero capite videbimus. Antiquissimus eius rei auctor est *Iustinus*, loco supra proposito, qui, quemadmodum ὁ λόγος,

Filius Dei aeternus, homo factus sit (σαρκοποιήθεις) sic panem illum & vinum εὐλογημένον, quo per concoctionem corpus nostrum alatur, illius σαρκοποιηθέντος Iesu σάρκα καὶ αἷμα esse dicit. Altera est, quod & in ipsa illa comparatione, & alias, cum verbo γίνεσθαι, fieri & facere vtuntur in hac causa, libentius prope *carnem*, quam *corpus* dicunt. Iam si inde fluxit forma ista loquendi, quis non videt, inde etiam interpretationem eius repetendam, existimandumque esse, panem ita fieri corpus Christi, vt cum adspectabili pane corpus Christi, inadspectabili quadam ratione, coniungatur. Quod confirmari potest loco Liturgiae S. Gregorii ap. *Renaldotium* (T. I. p. 35. med. & 118.) *Purifica nos, inquit sacerdos, sicuti sanctificasti has oblationes propositas, & fecisti illas invisibiles ex visibilibus &c.* Etenim clarum est, horum verborum sensum esse: fecistisque, vt pani & vino visibili inuisibile quid, h. e. Corpus & S. C. adjungeretur. Nam oblationes adhuc erant visibiles, cum eas velut digito demonstraret, *has oblationes.*

Atque ita arbitror satis perspicue esse demonstratum, nihil eorum, quae *Muratorius* attulit e Liturgiis antiquis, vim aliquam habere ad labefactandam nostrae quidem Ecclesiae sententiam, & stabiliendam contra Paschasianam illam, Romanae Ecclesiae tantopere probatam μεταμόρφωσιν. Nihil amplius a nobis

nobis postulari potest, qui nihil aliud, quam Muratorianae disputationis confutationem promissimus. Verum non agemus e syngrapha: sed aliquod huic disputationi velut auctarium adiiciemus, ostendemusque, nostrae Ecclesiae sententiam Liturgiis praeclare firmari: si firmanentum est in veteris Ecclesiae consensu. In quo praeterrittam vniuerse docere id, quod *Blondellus* instituit demonstrare (sur l'Eucharistie c. 21.) Romanam illam conuersionem aduersari Missae Canonis: in qua ille demonstratione suae magis Ecclesiae causam priuatim egit, quam communem & nostrae. Si *coniunctionem* panis & corporis Christi clare inesse Liturgiis ostendero, illud quoque sua sponte intelligetur. Sed vt ab aliis hanc diligentiam postulamus, vt ne verborum sono decepti, affingant Liturgiis alienam sententiam, ita nos quoque eam lectoribus nostris debere putamus. Itaque non vtemur Mozarabicae Liturgiae verbis, in quibus *Coniunctio corporis & sanguinis Christi memoratur: Et coniunctio corporis & sanguinis D. N. I. C. sit sumentibus & potantibus nobis ad veniam.* Nam ibi *coniunctionem* esse *κοινωνίαν*, quae fit edendo atque bibendo, *perceptionem*, etiam e Concilio Toletano quarto, quod Sec. VII. fuit, Can. 18. patet: *Post orationem Dominicam & Coniunctionem Panis & Calicis benedictio sequatur.* Ille autem locus est plane evidens, cum in Iacobitarum Liturgia, & quidem e Codice Colbe-

Colbertino (ap. Renald. T. II. p. 368.) in παραφάσει verborum Dominicorum sic sacerdos ait: *Quotiescunque sacrificio hoc divino reficiemini, & panem hunc manducabitis, calicemque hunc bibetis, ego in medium vestri veniam, super thronum sedens, PANEMQUE ET VINUM PER VNIONEM ASSUMENS*, atque in patena & in calice habitabo &c. Quo loco ipse Renaldotius (p. 369.) fatetur, in Syriaco exemplo idem esse verbum, quo vnionem λόγος & σαρκός in Christo expriment, & hanc esse solennem Iacobitis doctrinam, vt panem & vinum dicant fieri corpus & sanguinem I. C. per assumptionem & vnionem, sicut corpus humanum e carne & sanguine Mariae formatum, factum est corpus Verbi Dei, assumtum & vnitum Verbo Dei: id quod etiam locis ex Homiliis Syrorum docet. Huic accedat locus supra commemoratus e Liturgia S. Gregorii. Sacerdos post consecrationem primum dicit: *praeparasti nobis panem coelestem, corpus hoc tuum sanctum* &c. Post orat: *Purifica nos Domine, sicut sanctificasti HAS oblationes propositas, & fecisti illas invisibiles ex visibilibus.* Si praesens est corpus Christi, neque figurate, sed vere & proprie, quod credidisse Orientales pluribus Liturgiarum locis docet Ianus Diff. c. Prop. V. patetque & hinc e verbis *hoc corpus tuum*; praesensque adhuc est panis cum vino, *has oblationes*: quae alia est ratio istius rei explicandae, nisi per vtriusque coniunctionem?

In

In Liturgia Graeca S. Gregorii Alexandrina (p. 103.) sacerdos ait: σὺ μοι τὴν μυστικὴν παρ-
έδωκας τῆς σαρκὸς ἐν ἅρτῳ καὶ ὄνῳ τὴν μέθεξιν:
tu mihi tradidisti mysticam hanc corporis tui cum
(sic malim quam *in*: centies enim in Nouo
Testamento ἐν pro σύν) *pane & vino perceptio-*
nem: quae sunt prorsus Lutherana. Et haec
quidem ex Orientalium Liturgiis commem-
morauimus.

II. *In Scriptis Patrum Ecclesiae, nihil esse pro
transubstantiatione, multa contra eam.*

Hoc caput multo longiorem disputatio-
nem desideraret, quam superius, si nobis lo-
cus de sententia Doctorum veteris Ecclesiae
plane & absolute tractandus foret. Sed id
nemo a nobis postulet, nec est instituti no-
stri. *Albertinus* dudum hoc laboris suscepit,
vt per omnia deinceps secula recenseret Do-
ctorum Ecclesiae scripta, & quid in iis aduer-
saretur transubstantiationi, commemoraret,
quae ex iis defendendae caussa prolata essent
a *Bellarmino* & aliis, *Perronio* maxime, ea alie-
na esse ostenderet. Etsi post hanc messeni-
spicas quasdam colligere licet: tamen id nunc
non agemus: nec est necesse. Illud vnum
nobis susceptum est, vt a *Muratorio* allata exa-
minaremus, eumque malum interpretem
egisse ostenderemus. Sed quoniam ille, vt
supra diximus, non in vnum locum congeffit,
quae

quae ad hanc partem pertinerent, nisi quod c. VIII. & XV. destinauit proprie locis quibusdā vindicandis a *Bingami* & *Sam. Basnagii* interpretationibus: neque enim hoc proprie agebat, sed tantum testimoniis Liturgicis velut subsidiarios testes adiunxit: ita rem agemus, vt per omnia capita a c. VIII. vsque ad XV. vagemur, sed ordinem tamen capitum, quoad licebit, conseruemus.

Primus locus proponitur *Facundi*, *Hermianensis* *Episcopi*, e *Defensione trium Capitulorum*, IX. 5. ab *Sirmondo* primum edita, nobilitatus dudum & *Paschasianae* & *Berengarianae* opinionis defensorum concertationibus: dum cupide proferunt eum & iactant hi, nec minus solliciti illi vim eius eludere tentant. *Facundus* defensurus *Theodorum Mopsuestenum*, qui Christum adoptionem filiorum suscepisse dixerat, eumque adeo adoptiuum filium, non proprium, putare accusabatur. sic eum excusat: *Nam sacramentum adoptionis suscipere dignatus est Christus, & quando circumcissus est, & quando baptizatus est, & potest sacramentum adoptionis adoptio nuncupari, sicut sacramentum corporis & sanguinis Christi, quod est in pane & poculo consecrato, corpus eius & sanguinem dicimus, non quod proprie corpus eius sit panis, & poculum sanguis, sed quod in se mysterium corporis eius sanguinisque contineant. Hinc & ipse Dominus benedictum panem & calicem, quem discipulis suis tradidit, corpus & sanguinem suum vocauit.* Percussit hic locus

Sirmon-

Sirmondum. Itaque *πάσχαλον σφδὲν* in nota adhibuit, sic explicans ista verba e disciplina Paschasiana: panem consecratum panem non esse, appellari tamen panem, quia panis fuerit, & eius speciem retineat, sub qua corpus Christi contineatur. Quam interpretationem merito ridet & bene refellit *Salmasius* de transubst. p. 105 f. Sed, velut ipse diffideret huic interpretationi, durius & obscurius locutum esse, addidit, dignum venia & interprete miti. Ex altera parte *Caluini* adseclae hoc loco plane confici non modo *Paschasii*, sed etiam *Lutheri* sententiam iactant. *Albertinus* quidem (p. 889 a) haec tonitrua & fulmina esse, ait, aduersariis letalia & prorsus in eluctabilia: aduersarios intelligens non modo Paschasianos, sed etiam Lutheranos. Non commemorabo, quae postea super famoso hoc loco in vtramque partem disputata sunt, nominatim a Natal. Alexandro, in eruditissimo *Historiae Ecclesiasticae* opere (T. V. p. 409. ed. maior.) qui, proposita sua & aliorum sententia, ad extremum eo decurrit, (p. 410. a.) vt nullam *Facundi* in Ecclesia auctoritatem esse debere pronunciet, cum *Schismaticus* fuerit, & in *schismate* scripserit, atque obierit: clare indicans, nihil eorum, quae vel ipse, vel alii dixerint, sibi satisfacere. *Muratorius* quidem in *obscuris* his verbis, vt more suorum vocat, quaecunque causae suae manifeste nimis officiunt, nihil quemquam, ait, reperturum, quod
Pascha-

Paschafianae opinioni aduerfetur, fi modo meminerit, *Sacramenti* verbo nihil aliud fignificari, quam *fignum visibile*, continens donum diuinum: panem & vinum effe figna, quae corpus & fanguinem Chrifti contineant, etiam poft confecrationem, quanquam eorum fubftantia fit in corpus & fanguinem J. C. conuerfa.

Primo, quamquam in omni Sacramento, quod quidem proprie a Theologis dicitur, eft fignum visibile, tamen Sacramenti vox ipla, praefertim hoc in loco, non fonat tale quid: alioqui dicendum foret, mox *mysterium* idem fignificare. Nam clarum eft, quod ante *Sacramentum C. & S.* dicatur, idem poft *mysterium C. & S. C.* vocari. Poterat difcere rem e loco *Augustini*, de quo mox (p. 110.) *ifta fratres ideo dicuntur sacramenta, quia in iis aliud videtur, aliud intelligitur: ibidemque, panis & calix magnae rei sacramentum continere dicitur.* Sed hoc cauffae neutri neque obeft, neque prodeft. At illud mirum eft, panem & vinum, cuius fubftantia perierit, tamen figna visible effe. Abhorret enim a fenfu communi, fubftantiam rei periiffe & tamen eius attributa omnia fenfible effe. Profecto *Facundus* nihil aliud cum omni vetere Ecclefia fentit, quam quod nos *Lutheri* e difciplina ftatuimus: panem quidem & vinum, quae corpus & fanguis Chrifti dicantur, proprie, κατ' ἀκριβειαν, non effe C. & S. C. quod eft
fane

fane verissimum, alias non esset verus panis & verum vinum: sed dici tamen recte corpus & sanguinem Christi, quia vtrumque in se contineat, siue cum vtroque coniuncta sint: quod ille bene vocat *mysterium* & *sacramentum*, quia ea coniunctio est sanctissimum *mysterium*, quod omnem vim mentis humanae superat. Atque hoc ita evidens est, vt *Muratorius* ipse in eius loci explicatione repente *Lutheranus* factus sit. Audiamus ipsum: *Ergo etiamsi sacramentum, id est, signum visibile C. & S. D. proprie non sit ipsum Corpus & S. D. qui tamen sacramentum sumit, veram & non figuratam Carnem & S. C. recipit, quia Species panis & vini (s. Panis & Vinum) reuera in se mysterium, b. e. arcanam, tremendamque praesentiam corporis & sanguinis Domini continent, & nos in pane & poculo consecrato, carnem eius & sanguinem sumimus, uti disertè Facundus testatur.* Obtestor omnes, qui haec legunt, an haec non sint *γινώσκεις* Lutherana. Idque ipse *Muratorius*, ea vis est veritatis perspicuae, sensit. Itaque addit: *Estendum nihilominus est, quemquam ex hoc Facundi loco posse inferre Lutheranae sectae, ut aiunt (calumniatores) impanationem, quasi in Eucharistia panis & vinum, servata sua substantia, cum veritate corporis & sanguinis Domini coniungantur. Quid ergo impedit, quo minus hoc ex illo loco colligi debeat? Quia perpetuus mos fuit, panem & vinum appellandi consecratas oblationes; etiamsi crederent, nullum panem & vinum amplius*

E

ad

adesse. O! mirabilem Dialecticum! Hoc autem ipsum est, de quo quaeritur, quod hoc ipso loco refellitur. Quaeritur scilicet, an panis & vinum proprie in Eucharistia, etiam à consecratione, dicantur. Ad hoc vincendum affertur hic *Facundi* locus, in multis aliis. Quid noster? *Facundus* non proprie vult, panem *adesse*: quia in hac re non proprie dicitur.

Alter locus est fragmentum ex *Augustini* Sermone ad Neophytos, servatus a *Fulgentio*, in quo Berengariani magnum suae causae praesidium ponunt, unde iam ab *Albertino* ante *Bingamum* prolatus est. In eo accipimus, quod *Muratorius* defendit, nihil esse praesidii isti sententiae. Falli tamen credimus cum *Perronio* in eo, quod aliquid excidisse statuit, velut aliter expediendi se inde facultas non detur. Adponemus locum ipsum: *Hoc quod videtis, Augustinus* dicit Neophytis, *in altari Dei, etiam transacta nocte vidistis: sed quid esset, quid sibi vellet, cum magnae rei sacramentum contineat, nondum audistis. QVOD ergo VIDE-TIS, PANIS EST ET CALIX, quod vobis etiam oculi vestri renunciant: quod autem fides vestra postulat instruenda, PANIS EST CORPVS CHRISTI, CALIX SANGVIS CHRISTI.* Tum neophyti inducuntur interrogantes, quomodo, cum Christus sit in caelo, panis esse possit corpus Christi &c. Ad haec *Augustinus* respondet, sic: *Isthaec ideo dicuntur sacramenta*

menta, quia in iis aliud videtur, aliud intelligitur. Quod videtur, speciem habet corporalem, quod intelligitur fructum spirituales. Corpus autem Christi si vis intelligere, Apostolum audi dicentem fidelibus, Vos autem estis corpus Christi & membra, mysterium vestrum in mensa Dominica positum est &c. In hac igitur posteriori parte aliquid excidisse volunt, quod responsio Doctoris non videtur congruere interrogationi neophytorum. Si Crisostomus exercere libeat, in prima parte dicam insititia esse verba Panis & Calix, legendumque: quod fides vestra postulat instruenda, est corpus Christi, sanguis Christi: in quo non admodum difficiles me puto habiturum eos, qui facultatem de talibus iudicandi habent. At in altera parte nihil desidero; omnia integra puto. Sed intelligendum est, Augustinum ante oculos habuisse & in animo locum Pauli in Epistola ad Corinthios prima X. 17. εἰς ἄριστον ἐν σῶμα οἱ πολλοὶ ἐσμεν &c. & fructum percepti corporis & sanguinis C. exprimere maluisse, quam corpus & sanguinem ipsum. (*) Intelligi enim e disciplina Christiana neophytis ante tradita putabat sua sponte, huius coniunctionis cum Christo, & in Christo vinculum esse perceptio-

E 2

(*) Simillimus est locus Gaudentii Braxiatii, tr. 2. ad Neoph. quem nemo non integrum agnoscit: In pane accipitur figura corporis Christi, quia nomen est multitudinis humani generis unum esse corpus effectum.

ceptionem eiusdem corporis & sanguinis Christi. Non demonstrare vult, quomodo Christi corpus possit esse praesens in Coena S. quis enim hoc potest? sed esse haud dubie praesens, quod satis est: Sane, inquit, corpus & sanguis Christi non cernuntur: sed inuisibili quadam ratione adsunt, eamque ipsam ob causam haec sacramenta, mysteria, dicuntur, quia per fidem modo intelligitur ista praesentia, nixam verbo Christi, sed id quod intelligitur, corpus et sanguis Christi, habet fructum hunc, ut omnes unum Christi corpus simus. Atque ex hoc ipso, quod per S. Coenam unum corpus Christi fiunt Christiani, intelligi docet, praesens esse inadspectabile corpus Christi. *Si ergo vos*, inquit, *estis corpus Christi, & membra, mysterium vestrum in mensa Dominica positum est*: quo scilicet percepto fiunt Christiani corpus & membra Christi. *Mysterium vestrum* certe non est panis adspectabilis, sed corpus & sanguis Christi. Si autem corpus Christi tantum figuratum s. ideale perciperemus in S. Coena, quomodo in mensa Dominica positum diceretur? Sed hoc nihil ad hanc nostram disputationem. Illud autem velim ostendisset, quomodo hic locus cum μεταμορφώσει, panis substantiam tollente, consistere posset. Sed hoc ille transit. Non disputare hic lubebat in hanc partem: *Quod videtis in altari, panis est & calix: quod fides vestra postulat, corpus*

corpus & sanguis Christi. Sicut, quod fides postulat, non est mera figura C. & S. C. sic nec, quod oculi vident, est figura inanis panis & vini, sed panis verus, & verus sanguis. Eademque verba repetuntur in eodem sermone: *Debetis scire - - - quid quotidie accipere debeatis. Panis ille, quem videtis in altari, sanctificatus per verbum Dei, est corpus Christi.*

Sed fortius telum nobis, Lutheranis, intentatur e Catechesibus Mystagogicis, primum e loco supra commemorato, de comparatione mysteriorum huius cum vino nuptiali Canae: cui quia ibi iam satisfacimus, eum hic praetermittimus: deinde ex alio eiusdem Catecheseos: *μη προσέχετε ἔν, ὡς φιλοῖς τῷ ἄρτῳ καὶ τῷ εἶω· σῶμα γὰρ καὶ αἷμα χριστοῦ κατὰ τὴν δεσποτικὴν τυγχάνει ἀπέφασιν. εἰ γὰρ καὶ ἡ αἰσθησίς σοι τὸτο ὑποβάλλει, ἀλλὰ ἡ πίσις σε βεβαιῶται. μὴ ἀπὸ τῆς γεύσεως κρίνης τὸ πρᾶγμα, ἀλλ' ἀπὸ τῆς πίσεως &c.* Haec aduersus Bezae aemulos perspicua esse video: pro transubstantiatione nihil habent, ut putat *Muratorius*. Quid dicturus erat, si non loca ex aliis congeffisset, sed Catechesin illam totam ipse legisset. Etenim multo speciosius erat, quod in extrema est: *Ταῦτα μαθὼν καὶ πληροφορηθεῖς, ὡς ὁ Φαινόμενος ἄρτος ἐκ ἄρτος ἐστίν, εἰ καὶ τῇ γεύσει αἰσθητὴς, ἀλλὰ σῶμα χριστοῦ· καὶ ὁ Φαινόμενος οἶνος ἐκ οἶνός ἐστιν, εἰ καὶ ἡ γεῦσις τὸτο βέλεται, ἀλλὰ αἷμα χριστοῦ.* Non hunc locum praetermisset, si legisset ipsam Catechesin.

Hic multo magis dixisset: *babes in meridie positam transubstantiationem Catholicorum!* Sed nec hic locus causae isti prodest, etsi omnium, quos quidem nouerim, speciosissimus est, propterea valde iactatus Bellarmino, Peronio, & aliis. Primum *Φαινόμενος ἄρτος & οἶνος* non est species inanis panis & vini, ut illi volunt, commemoratis ἀγαθοῖς Φαινόμενοις, quae ἀληθινῶς opponantur: sed *adspectabilis panis & visibile vinum*, ut recte respondit, Albertinus, & exemplis docuit p. 429. b. f. in hoc vno non satis accuratus, quod hanc quoque significationem vocis *Φαινόμενος* esse dixit, cum dicere debuisset, in oratione populari, & sacris libris, *Φαινόμενα* semper esse *visibilia*: illam alteram significationem, quae ea τοῖς ἀληθινοῖς opponuntur, esse Philosophis propriam, in disputatione de bonis & virtutibus, quae extra philosophiam in interpretando adhiberi nequeat. Iam porro quod non vult panem & vinum esse, etiamsi sapor utriusque, & quidem solus percipiatur, id clarum est ex superioribus intelligendum de pane ψιλῷ: Iustinus κοινὸν vocat, loco supra allato: idem Catechesium auctor λιτὸν (Catech. M. I. p. 229. C.) non de pane ac vino simpliciter.

Prolatis porro e Canone Ambrosiano Excerptis, ad quae supra respondimus, subiicit loca varia ex *Ambrosii* libris. Iis, non est, ut diu immoremur. Nam in omnibus prae-

ter

ter vnum nihil est, nisi *mutationis vel transfigurationis* verbum; quorum vim, supra clare ostendimus, nullam esse. Vnus est, qui conturbare aliquem possit, e libro de *Mysteriis c. 9. Forte dicas, verba sunt Ambrosii, aliud video. Quomodo tu mihi adseris, quod corpus Christi accipiam? Probemus, non hoc esse, quod natura formauit, sed quod benedictio consecrauit, maioremque vim esse benedictionis, quam naturae: quia benedictione etiam natura ipsa mutatur. Tum, commemoratis Prophetarum in V. T. miraculis, subiicit hanc argumentationem: Quod si tantum valuit humana benedictio, ut naturam converteret, quid dicemus de ipsa consecratione diuina, ubi verba Saluatoris ipsius operantur? - - - Sermo Christi, qui poterat e nihilo facere, quod non erat, non potest ea, quae sunt, mutare, quod non erant. Hunc locum Muratorius hanc quidem ob causam attulisse videtur, ut veram praesentiam corporis Christi inde intelligi veller, sed verbis, benedictione natura ipsa mutatur, diuerso literarum genere expressis, satis indicat, ea etiam ad conuersionem substantiae panis in corpus Christi pertinere. Ceterum de more suo ita haec verba attulit, quasi ignoraret, quae *Albertinus* dudum ad hunc locum, ab aliis prolatum, respondit, primum perspicuis locis veterum Doctorum, si quid esse aliud dicatur, quam ante fuerit, id non ad substantiae interemitionem ac conuersionem pertinere. Nec id potest esse obscurum*

ei, qui vsum loquendi omnium linguarum obseruauit, quod de *Muratorio* quidem sperare licebat. Sed quod in aliis scriptoribus omnes vident, ad id nescio quo modo caeci sunt multi in iis, qui ad religionem pertinent: & quod in istis interpretandis rideretur, id sibi in his rectum esse, & licere putant. Deinde demonstrauit, *naturam*, quae hic mutata benedictione dicitur, non semper substantiam significare, quod pueris etiam, mediocriter latine doctis, notum est: in hac quidem causa nullo modo hanc vim habere; cum alii, non minus probati Ecclesiae doctores, *naturam* panis & vini eam, quae substantia dicitur, nequaquam mutatam clare dicant, in his *Theodoretus*, qui (in Dial. I. p. m. 29.) adspectabilia in Eucharistia signa corporis & sanguinis sui appellatione Christum honorasse dicit, & τὴν φύσιν μεταβαλόντα, non mutata substantia, sed τὴν χάριν τῇ φύσει προσθεθεϊκότα, sed gratia naturae addita: Sed quod illo ipso in Dialogo *Theodoretus* Eranistae dicit (p. 31.) κατὰ τὴν παροιμίαν, εἰς τετρημένον πίθον ἀντλήμεν. μετὰ γὰρ ἐκείνας ἀπάσας τὰς ἀποδείξεις, καὶ τὰς τῶν ἀντιθέσεων λύσεις, τὰς αὐτὰς λόγους ἀνακυκλεῖς. Secundum proverbium dolio pertuso, haurimus. Nam post omnes illas demonstrationes nostras, & obiectionum refutationes, eadem repetis: idem nobis in ista causa accidit, idem fecit *Muratorius*,

torius, satis habens, repetere dicta centies, nihil respondens ad ea, quae contra dicta erant.

Capite XII (p. 150. sq.) est disputaticula de nobilibus locis *Io. Chrysostomi* in Epistola ad *Caesarum*, *Theodoreti* in Dialogo secundo, *Ephremi* apud *Photium*, (cod. 229.) & *Gelasii* I. in libro de duabus naturis: in quibus quid lectori animaduertendum sit, pro virili se expofiturum profitetur. Lutheranos quidem iis confirmari existimare suam de corporis & sanguinis Christi cum pane vinoque coniunctione sententiam: sed facile perspicere quam iuste Romana Ecclesia hanc opinionem damnauerit. Si adeo facile est: nos quoque, opinor, perspicimus Lutherani: neque enim adeo obtusa gestamus pectora, vt quod facile sit perspicere, nos assequi nequeamus. Animaduertendum modo esse (illuc sumus) manifestam adeo esse vim vocum, quibus Liturgiae & SS. Patres utantur ad exprimendam *mutationem*, quae per consecrationis verba fiat, & per *transubstantiationis* vocem designari soleat, vt absurdum plane sit cogitare, superstitem eorum elementorum substantiam in sacramento, & agnoscere cogamur, conuerti illorum substantiam in corpus & sanguinem Domini. Post haec commemorat ea, de quibus capite superiori dictum est, verba. Haec vero miseranda potius est, quam refellenda oratio, qua stultissimus

quisque in quaque re potest vincere, si ea aliquam vim potest habere. Ac nos supra de verbis istis omnia alia docuimus, secuti certas interpretandi leges, & vsum loquendi certum, & de ridicula *transelementatione*, quam hic addit superioribus verbis, satis dictum a *Salmasio* de transubstantiatione, p. 51. sqq. quae si quis potest, salvis Grammaticis praeceptis, refellere, cum audiemus.

Sed deinde tentat respondere de locis singulis: & primum de *Chrysostomi* verbis. In quibus multo potius nobis licet usurpare illud *Muratorii*: loci illius vim ita manifestam esse, ut absurdum plane sit, aliud ibi quid, quam Lutheranam sententiam, quaerere, eam non agnoscere. Neque ista mera verba sunt, quae Sophistarum more iactamus, ubi nihil aliud habemus, quod dicamus: sed res ipsa hoc loquitur, & historia huius epistolae. Nam si non manifeste Paschasianum figmentum tollit ista epistola, quare, primum, ab initio nihil aliud responsum est a *Perronio* & aliis, quam epistolam illam a *Petro Martyre* esse confictam? quare deinde hoc tanto studio, tanta cura, adde etiam vi, actum est, ut epistola illa in Bibliotheca Florentina occultaretur, edita supprimeretur? Quare post haec tantopere laboratum, ut vel spuria putaretur, vel aliter intelligeretur? Nonne haec signa sunt laborantium, & ob perspicuitatem verborum in angustias eas redactorum, unde se expedire non possint? Tum, quod etiam Zwinglianae rationi addicti,

dicti, nominatim *Bingamus*, fatentur, hunc locum certe fauere Lutheranae sententiae; non clare indicat, hic esse eam perspicuitatem, cui refragari non possis? Age vero, quid noster hic molitur? Nihil aliud exspectavi, quam vt, sicut antiquus ille *Aristarchus*, versus *Stomeri*, quos non probabat, pro spuris reiciebat, ita ipse, velut alter *Aristarchus*, Epistolam hanc *Chrysofomo* abiudicaret, qui etiam *Pauline* in *Anecdosis Latinis* multa verba & formas dicendi abiudicat, etiam hemistichia, quae totidem literis sunt in Virgiliana Aeneide, & hinc a *Paulino* repetita. Sed fortasse noluit sibi aliquid porro negotii esse cum Critica, quae se in Inscriptionum Corpore tam saepe, tam foede, fefellisset. Aequus est ergo Epistolae ipsi: si non *Chrysofomi* sit, antiqui auctoris tamen esse, atque adeo audiendi. Verum partes eorum sequitur, qui hic nihil esse aduersum Romanae opinioni existimant. Atque hic prorsus mirabilem se interpretem praebet. Nullum Epigramma graecum in toto illo Inscriptionum Corpore tam dextre, tam callide interpretatus est. Auctor illius Epistolae Eutyichianum errorem refellens, qui profecto *Muratorio* probandus fuit, quando in *Mutationis* verbo tantam vim, & perspicuam μεταστροφῶν agnoscit utitur, comparatione illa usitatissima istius mysterii cum S. Eucharistia, vt ostendat, non esse consequens, quia Christus Deus dicatur, vt propterea humana

natura

natura in diuinam conuersa, aut a diuina absorpta sit: Sicut ante quam sanctificetur panis, panem nominamus, quia reuera panis est, diuina autem sanctificante gratia liberatus quidem est ab appellatione panis, dignus autem habitus est Dominici corporis appellatione, etiam si natura Panis in ipso permanfit, & non duo corpora, sed unum Filii corpus predicatur: Sic & hic diuina insidente corporis natura, unum Filium, unam personam utraque fecerunt. Audi iam, VIR VENERANDE, interpretem: nunquam acutiorem TE audisse credo. Liberatus est, Chrysostomus ait, panis ab appellatione panis. Quomodo? quia panis, inquit Muratorius, non amplius est, & factus est corpus Christi. Mirum sane, hanc liberationem panis ab appellatione sua dici! Immo, o! bone, liberatur panis a nominis sui humilitate, quia accipit nomen corporis Christi, propter eius adiunctionem: vt homo Jesus liberatur appellatione hominis, & accipit nomen Filii Dei propter *ἐνωσις*: haec enim est argumentatio Chrysostomi, vt Iustini, Theodoret, & aliorum. Quid porro facit istis: etiamsi natura panis in ipso permanfit? Ea sic interpres clarus *παράφρασις*: cum tamen color, odor, friabilitas, palpabilitas, aliaeque panis qualitates, siue species post consecrationem permaneant, propter ea natura panis remanere dicitur. Ergo etiam Eutychi similiter dicere licebit: cum tamen figura, color & aliae qualitates, s. species humanitatis post incarnationem permanent, propterea natura humana remanere

remanere dicitur: quam παρασκευασιν admittere cogitur Chrysostomus, sic Muratoriana illa vera est. Immo, o! magne interpres, natura panis non dicitur remanere, sed permansit. Atque tu ante pugnabas, naturam esse substantiam p. 135. & naturae mutationem esse substantiae conuersionem. Quomodo repente natura in speciem externam conuertitur? Nempe virgulam diuinam habetis Vos, Romani Grammatici, atque interpretes, atque multo magis Theologi, qua omnia, cum lubet, conuertitis, transelementatis. Enim vero pergit: Quod si sophisticando exigit: sicuti corpus C. in Eucharistia realiter existit, ita illic remanere debere corpus panis: nos cum eodem auctore respondemus. non duo corpora, sed vnum corpus Filii praedicari de Eucharistia, quia panis substantia in corpus Domini per diuinam virtutem conuersa est &c. Illud recte: non duo Corpora praedicari, sicut in Christo, vnus Filius, vna persona, non duo Filii, duae personae: sed vt utraque natura, diuina & humana vnum filium, vnani personam fecerunt, sic hic vtrumque, panis & corpus Christi, non duo corpora, sed vnum filii Corpus praedicantur. Ad extremum redit ad illud suum, vt haec verba obscura & confusa dicat mireturque, quare non aliis potius perspicuis Chrysostomi locis nitamur, quem (p. 158. extr.) solum omnem hanc controuersiam dirimere posse dicit. Si de praesentia vera C. & S. C. intelligit, concedo, de transubstantiatione nihil legi, aut pro-

prolatum vidi, cui non facile respondeatur. Quamquam nos detertere poterat, quo minus alia loca *Chrysostomi* attingeremus, cum eum *cœcum aut impudentem* pronunciet, qui in iis non videat dogmata Romana, ibi in meridie posita (p. 164.) tamen ausi sumus inspicere, quae ipse attulit. redibile est, de grandi, ut ait, acervo summis maxime perspicua & graua. Sed quamuis cœcum me iudicent, qui eadem hic cum *Muratorio* vident, fateor, me in iis agnoscere veri corporis & sanguinis C præsentiam, μεταμόρφωσιν Paschasianam nullo modo, quamuis intendens oculorum aciem, videre potuisse. Neque enim aliud ibi est, praeter verba ἀγιάζειν καὶ μεταβάλλειν & e propositis in mensa donis ποιῆν σῶμα καὶ αἷμα, quae ad efficiendum id, quod placet *Muratorio*, nullo modo valere, satis ostendimus superiori capite. Alia loca indicare voluissim bono Viro, quae maiorem speciem habent, si me consulisset, vel e libris de sacerdotio: sed & his respondere potuissim.

Iam *Theodoreti* locus ab eo disceptatur dupliciter: primum aduersus Zwinglianos (p. 155 156.) in qua parte nos ei plane adstipulamur: deinde aduersus nos breviter p. 157) extr. *Theodoretum* ait, non dissiteri, mutationem in symbolis fieri per consecrationem. Recte facit: nec quisquam dubitat. At quae est ista mutatio? Facta esse, & credi corpus & sanguinem Christi. Hoc quoque vere. Quomodo facta statuit? Hic nihil *Muratorius*. At enim

verum

vero hic inprimis audiendus erat *Theodoretus*. *Symbola*, ait, *post consecrationem non recedunt a sua natura. Manent enim in priori substantia, & figura, & forma, & videri tanquæ possunt, sicut & prius.* Haec, haec o! Muratori conciliare debebas cum tua μεταμορφῶσα! Atque hic plane nullum effugium patet, nec ulla deprauatio locum habet. Nam his illustrat mysterium incarnationis Dominicae, & sicut in Eucharistia verus panis maneat post consecrationem, sine conuersione substantiae, sic in Christo post incarnationem mansisse verum hominem. Tota ratiocinatio, quæ est communis omnium doctorum veterum, in controuersia cum Eutychianis, perit, fitque absurda, & contraria, & favens Eutychianis, si aliter ista verba accipere velimus.

Sed de *Ephremi* loco mox disputans, in quo & ipso panis a sensibili substantia non discedere dicitur, videtur aliquid respondere voluisse. Quid illud est? Nihil aliud, quam quod a *Belarmino*, *Perronio*, *Natale Alexandro*, *Arnaldo*, aliisque allatum, dudum repudiatum est. Qui iactant se in verbis substantiae atque naturæ, vbi causæ ipsorum fauere videantur, ii hic, vbi contra est, non nimis dicunt urgenda esse, nec ἀκριβῆς scholæ sequendam: Proprietates etiam corporum istis verbis designari: externam igitur naturam & substantiam remanere a consecratione, nec transire in corpus & sanguinem Christi, sed internam: hoc sensisse Docto-

Doctores Ecclesiae veteres, atque id suffecisse ad retundendos Eutychianos. Quae sunt anilibus fabulis simillima. In verbis *naturae*, atque etiam, si quis ita velit, *substantiae* (quam inaudita est in omni antiquitate substantiae externae & internae diuisio) esse quandam ambiguitatem, concedam. Sed hoc uno nemo se in tali quaestione expedierit commode: videndumque potius, quam vim quaeque causa desideret. Quod in his locis perfacile est definire. Dico igitur: qualis sit naturae & substantiae vis, cum aduersus Eutychianos disputatur, naturam atque substantiam humanam in Christo non esse abolitam atque absorptam a diuina, talem etiam hic intelligendam esse, propterea, quod alias, ut ante dixi, argumentatio Doctorum Ecclesiae nullam vim haberet, sed esset perinepta. Enim vero falsissimum est in ista controuersia substantiae & naturae nomen Doctores usurpasse de quibusdam externis proprietatibus, & ut in scholis loquuntur, accidentibus, nec ullo modo sufficebat demonstrare, ista sensibilia hominis attributa remansisse. Nam Eutychiani non erant ita insani, ut negarent, ista ex humanitate in Christo post *ἐνωσιν* in qua humanam substantiam perisse dicebant, remansisse: qui sciebant, eum spectari tangique potuisse, & omnia fecisse, quae veri homines facerent. edisse, bibisse, ambulasse, dormisse: quae sunt a diuinitate aliena. Internam substantiam haustam ab diuinitate atque

que abolitam dicebant, quod aliter duas personas in Christo statuendas putarent. Vnde fit, vt ea verba in illa controuersia plane sic dicta fuerint, vt nos volumus, eamque ob causam in locis *Chrysostomi, Theodoreti, Ephremi,* atque *Gelasii* sic sint accipienda Quo constituto, panis et vini conuersio Paschaliana prorsus tollitur.

Ceterum quoniam uerbis *symbola facta sunt C. & S. C.* hic quoque abutitur, poterat e nullo alio veterum doctorum planius discere, quam parum ea verba fauerent causae suae, & quae vera eorum esset vis. Neque enim quisquam luculentius *Theodoro* in istis dialogis explicauit: vt in primo (p. m 57.) ὁ λόγος σὰρξ ἐγένετο, & μετὰ πτωσιν τῆς φύσεως σημαίνει. ἀλλὰ τὴν ἀνάληψιν τῆς ἡμετέρας φύσεως: idque illustrat altera formula *Pauli*, quae Christum dicit pro nobis γεγονέναι κατάραν: totusque Dialogus in hoc consumitur, ut in γεγονέναι nullam conversionem substantiae intelligendam ostendatur. Atqui eandem rationem esse in Eucharistia, dixit Quae deinde ex iisdem Doctoribus affert verba, quibus transisse symbola dicuntur in diuinam substantiam, ea quia capite superiori refutata sunt, de iis nihil hic addere necesse est

Sed occurrit nobis e Catechesi *Myftagoga* quarta, vbi ἐν τύπῳ ἄρτου (p. 530. dari nobis corpus Christi traditur: figuram interpretantur bene: unde non modo corpus Christi adesse, sed etiam de pane solá species relinqui videtur.

F

Quo-

Quo cum loco conjungi possunt ea, quae alibi e
Tertulliano c. Marcion. IV. 40. & Gaudentio tr.
 II. ad Neoph. adferuntur, ubi panis Eucharis-
 ticus dicitur *figura corporis Christi*, in quo se
 mirifice torquet *Maratorius*. Videbimus de
 utroque, & utrumque ab interpretationibus
 pravis vindicabimus. Intelligendum autem
 est, *τύπον, εἴδω*, *figuram*, significare signum
 vel adspectabile, vel omnino sensibile alicuius
 rei, non absentis modo, verum etiam prae-
 sentis, quae non incurrat in oculos, aut da-
 ta opera occultetur, sed per illud signum,
 per illam figuram, indicetur: eaque vis istius
 verbi frequentata est imprimis a scriptoribus
 Ecclesiasticis, qui hanc rationem e sacris libris
 duxisse videntur. Non commemorabo *caus-
 dicorum & historicorum figuras*, e *Suetonio*, & aliis:
 quae sunt formae loquendi, non tam propter id
 usurpatae, quod proprie indicant, sed propter
 alium latentem sensum, quem plane & aperte
 quis proferre non vult: quis est ita hospes in
 scriptorum Ecclesiasticorum libris, qui nesciat,
 v. c. Sabbathum dici figuram vitae coelestis,
 agnum paschalem figuram Christi mortui, &
 multa alia similiter? In quo illud animadver-
 tendum est in primis, in omnibus istis formis
 loquendi id quod sub figura latet non mo-
 do esse potius figura, sed etiam rem ipsam
 & quasi corpus, quocum id, quod figurae locum
 obtinet, ut umbra cum corpore comparetur.
 Ex quo intelligitur, cum *Corpus Christi* nobis
 in *figura panis dari*, dicitur, id primo verita-
 etiam

tem corporis Christi indicare, deinde etiam veritatem panis: neque illa verba aliud significare per legitimam interpretandi rationem posse, quam cum adspectabili & sensibili pane dari nobis inadspectabile & non incurrens in oculos corpus Christi, quod tamen non minus verum ac proprium sit, quam panis ipse. Cum porro *Tertullianus* & *Gaudemus* panem figuram corporis Christi dicunt, primum id nullo modo prodesse Zwinglianae rationi patet, e verbis ipsis ante declaratis: *Minutorius* autem, in angustias redactus, mirabiliter se hinc expedit: primum rursus tenebrosa ista verba iudicans, deinde ea sic post alios explicans, ut *Tertulliani* mentem esse dicat, panem in veteris Testamenti libris fuisse figuram, i. e. typum corporis Christi: quod est alienissimum. Consilium disputationis est, refellere *Marcionem*, qui in Christo verum corpus humanum fuisse negabat, ut nemo ignorat. In aliis argumentis utitur hoc, quod ductum est ab Eucharistia. In ea Christum, ait, dixisse, hoc est corpus meum: quorum verborum non hunc sensum fuisse, ut, quod in manu eius viderint sit corpus ipsius, sed ut id, h. e. panis ille, esset figura corporis, signum visibile latentis, & in oculos non incurrentis corporis. Iam, si Christus verum corpus non habuisset, si ista species mera & inanis corporis fuisset, panem signum corporis esse nullo modo potuisse. Nam profecto rei non positae in natura signum esse nullum potest. Istaec sunt perspicua & plana, uti ego arbitror, nec nullo mo-

do obscurus ille locus *Tertulliani* debet putari.

Afferuntur etiam, per occasionem Liturgiarum Aegyptiacarum loca *Origenis* atque *Cyrilli*, de quibus disputare nihil attinet, cum tantum pertineant ad veritatem corporis & sanguinis Christi, nec quicquam in iis insit huc pertinens, quam formula *fieri corpus C.* cui iam dudum satisfecimus: eademque est ratio locorum omnium, quae in disputatione aduersus *Samuelem Basnagium* c. xv. proponuntur. Itaque hic nobis liceret hoc caput finire, nisi liberet, vel tironum causa, brevem sed eam evidentem & certam demonstrationem sententiae Lutheranae, ductam e libris Doctorum veteris Ecclesiae, proponere, atque ita TIBI, VIR VENERANDE, etiam disciplinae nostrae hac in parte rationem reddere. Etenim nimis longa est ista disputatio de veteris Ecclesiae sententia, quam ut multi eam accurate, vel ipsis Patrum scriptis, vel libris iis legendis cognoscere possint, in quibus de ea re est disputatum, qui sunt, ut scis optime, permulti, quidam etiam satis grandes.

Ad veritatem autem panis primum uti maxime soleo loco *Iustini* supra (p. 41.) commemorato, qui sane est ita evidens, ut si quis mihi hunc eripere possit, nihil iam esse, neque in diuinis, neque in humanis libris, tam evidens concedam, quod non eripi nobis ac peruertere possit. Scepticismum iam dominari in interpretando sinam. Docere instituit *Antoninum*, apud quem

quem defendit Christianam religionem, quid de Eucharistia sentiant Christiani. Hic cum diligenter hoc egisse, quis dabitet, vt plane ac perspicue loqueretur, & verbis uteretur claris, & e consuetudine vulgari loquendi; quod maxime opus est fieri tum, vbi nobis disputandum est cum iis, qui sunt a disciplina nostra in quocunque genere alieni. Neque is fuit *Iustinus*, qui non hoc consecutus esset exercitationibus differendi, vt, cum id. ageret, plane et perspicue loqui posset. Habemus ergo in isto loco primum disertam panis vinique mentionem. Non profanum panem, nec tale vinum sumi, ait, sed panem tamen & vinum; sicut Christus non κοινὸς & λιτὸς ἄνθρωπος fuit, sed, cum sic dicimus, homo tamen, isque verus intelligitur. Habemus deinde εὐχαρισθησάν τροφήν, *alimentum consecratum*: eo alimento intelligi panem, vinum & aquam, nemo Romanorum negat: hoc modo volunt, esse v. c. panem, ex quo Eucharistia conficiatur, non e quo iam facta sit Sed id non patitur εὐχαρισθησάν, quae vox non nisi *consecratum* alimentum significare potest, vti paullo post τὰ εὐχαρισθηθέντα sunt *consecratus* per preces, & laudes diuinas, *cibus & potus*. Hic porro panis consecratus, hoc vinum cum aqua consecratum, dicitur *alere carnes & sanguinem nostrum*, & quidem κατὰ μεταβολήν, *per concoctionem*. Iam hic magnopere cupiam audire, quomodo panis & vini inanes species, sine substantia ma-

teriali, possint alere, h. e. augere sanguinem nostrum & carnes nostras? Immo si panis consecratus & sumtus concoquitur, & habet vim naturalem suam alendi, profecto verus panis sit necesse est. Nam Christi corpus & sanguinem descendere in ventriculos & concoqui, non erit ita infans quisquam, vt dicat: & quod *Irenaeus* IV. 34. v. 2. carne & sanguine Domini alii carnem & sanguinem fidelium, ait, id ibi per allegoriam dici, clarum est ex eo, quod verba *Pauli* Eph. V. 30, adiungit, vbi fideles ait esse ἐκ τῆς σαρκὸς Χριστοῦ καὶ ἐκ τῶν ὀστέων αὐτοῦ. Atque ita statim concidit inepta *Muratorii* etiam in hoc loco calumnia (p. 182.) cum verba εὐχαριστήσαντες τὴν εἰσαρκὰ καὶ αἵμα χε. interpretatur, non amplius esse panem, sed carnem & sanguinem Christi, mala fide inserto verbo *amplius*. Hunc locum igitur *Iustini* et si sufficere arbitror iuventuti, quia est antiquissimus, & clarissimus, & sumtus e narratione *Apologetae* & Professione fidei, Ecclesiae nomine edita, vbi nullis allegoriis tropisque, aut durioribus formis loquendi locus est, vt in Concionibus popularibus & libris *Controuersiarum* praefertim eorum, vel de Graecis vel Latinis, Patrum, qui eloquentiae usu, vel adeo ostentatione ablati, aut disputandi ardore elati, subinde insolentius loquuntur: tamen ei adiungi non alienum est aliquem ex his, quae a depravationibus *Muratorii* vindicauimus, velut *Augustini* illum: Quod videris panis est & calix: quod fides

vestra

vestra intelligit corpus Christi & sanguis Christi
- - Panis ille, quem videtis in altari - -
est corpus Christi: aut Theodoreti, symbola post con-
secrationem non recedere a sua natura, dicentis, sed
manere in priori substantia & figura & forma.
 Nam haec sunt perspicua, eaque si quis inter-
 pretando in alium sensum conuertere tentat,
 hoc ipso rem facit manifestiorem, cum nihil,
 quod non durum contortumque sit, proferri
 possit, quo nullum certius est falsae interpre-
 tationis & calumniae signum.

Iam in *Veritate Corporis & sanguinis Christi*,
 quam ex altera parte oppugnant ii, qui *Refor-*
mati vocantur, vtor eodem *Iustino* auctore,
 iisdem, quibus ante dictum est, de causis, &
 quia in narrationibus interpretandis non tam
 facile locum reperiunt argutationes: *ὁν τρόπον*
inquit Iustinus, Iesus Christus σαρκοποιή-
θης, καὶ σάρκα καὶ αἷμα ἔχεν, ὥτως καὶ τὴν εὐ-
χαριστηθεὶσαν τροφήν - - ἐκείνους τῶ σαρκοποι-
ηθέντος Ἰησοῦ χρ. καὶ σάρκα καὶ αἷμα ἐδιδάχθη-
μεν εἶναι. Atqui nemo hodie dubitat, quin fil-
 ius Dei vera carne & vero sanguine indutus
 fuerit: unde nec convenit dubitare, quin *Iusti-*
nus, atque adeo illorum temporum Christiani
 crediderint, verum corpus & sanguinem Chri-
 sti in S. Coena sumi. Sed in hoc loco non mi-
 nus misere se torquent illi, quam Romani Theo-
 logi. Et primo, quia illa verba *ὁν τρόπον* &
ὥτως nobis favent, negant, ea semper perfe-
 ctam aequalitatem rerum comparatarum indi-

care, idque exemplis plurimis firmant, *Albertinus*, *Grabius* ad *Iustini* locum ex ipso *Iustino*, & alii: quasi hoc quisquam dubitaret, & non omnes pariter negarent. At ea re nil in utramque partem conficitur. Nam non quaeritur, an semper, sed an nunquam adhibeantur rebus aequalibus, non utcumque similibus. Si autem aliquando, si possunt in rebus aequalibus adhiberi, quod nemo non stultissimus neget: an non talis sit iste noster locus, videndum est. Frigidius est, quod *Grabius* ait, *Iustinum* carnis & sanguinis per ἐσαρκωσιν adsciti mentionem, non explicandae Eucharistiae causa, fecisse, sed ut ostenderet, hunc totum ritum esse institutum in memoriam σωματοποιήσεως. Immo naturam Eucharistiae *Iustinus* explicare *Antonino* volebat, non finem: qui & a Christo separatim expressus est. Similia legi plura ad eludendi huius loci vim prolata: in quibus & hoc numerandum, quod *Salmasius* (l. c. p. 137.) ex hoc loco intelligi, ait, corporis Christi participes fieri tantum eos, in quibus sit vera fides; quod statuunt necessario, qui verum corpus Christi adesse negant: propterea quod *Iustinus* dicat, nemini licere accedere ad Eucharistiam, nisi τῷ πιστεύοντι ἀληθῆ εἶναι τὰ διδασκόμενα ὑφ' ὑμῶν: quasi sit hoc consequens, ut, qui doctrinam Christianorum veram putet, in eodem sit vera fides, qua Deo probamur, & quasi non & nos Lutherani, qui & ab improbis corpus & san-

sanguinem Christi sumi defendimus, cum alias
 intelligere nequeamus, quomodo rei profana-
 ti corporis & sanguinis Christi dici a *Paullo*
 possint, neminem ad Eucharistiam admittamus,
 qui non credat, veram esse doctrinam Christi,
 & quod *Iustinus* addit, baptismi usus sit. Sed
 hae argutiae in hoc & aliis Patrum locis expli-
 candis, vt supra dixi, indicia sunt malae caus-
 sae, & falsae interpretationis. *Ῥάδιον τὸ ἀλη-
 θὲς καὶ ἀπλῆν*, inquit *Lycurgus* Orator, error
 tortuosus est, & artibus indiget. Sed, vt ad
 rem redeam, unde intelligitur, illud, *ἐν τρόπον,
 ἕτως καὶ*, in loco *Iustini* plus quam similitudinem
 qualemcunque, sed aequalitatem exprimere?
 Hinc, vt arbitror, quod inde ab *Iustini* aetate,
 perpetua serie, Doctores Ecclesiae, id quod fa-
 tis constat, ex incarnatione Christi, naturam
 Eucharistiae, & contra ex hac naturam incarna-
 tionis explicarunt. Vnde necessario efficitur, vt,
 quemadmodum in posteriori ratione, veritatem
 corporis Christi adspectabilis ex veritate ad-
 spectabilis in Eucharistia panis, sic e veritate
 invisibilis divinitatis in visibili humanitate
 Christi, veritatem carnis & sanguinis Christi in
 Eucharistia voluerint intelligi. Non opus esse
 arbitror tam evidenti loco, tam antiquo, ita ex-
 plicato & illustrato, alia posterioris aetatis,
 quae tantam auctoritatem non habet, addere.
 Posterior aetas de veritate corporis & sangui-
 nis Christi ita loquitur, vt appareat, opinionem
 hanc,

hanc, si non omnium, at multorum fuisse, ut Christi corpus & sanguinem statim adiungi panis & vino, putarent ubi ἁγιασμός siue consecratio per sacerdotem ante κοινωνίαν facta sit; unde ἀνακκοῦται, iacere corpus Christi in altari, dicunt frequenter. Is error abest ab nobis, qui incorruptae antiquitatis disciplinam conservamus. Eius autem nullum est vestigium in Iustini verbis: immo contra est hic locus. *Non ut vulgarem panem λαμβάνομεν, edimus, sed eum esse putamus corpus Christi; quando? Nempe cum edimus.* Etenim istis posterioribus verbis possunt substitui haec, *sed ut corpus Christi λαμβάνομεν, edimus:* quod nemo, qui aliquid in interpretando videt, potest dubitare. Si quis posterioris aetatis locum desiderat, ei commendem verba ex Anastasii, Sec. VI. Scriptoris, ἐδηγῶ (c. 23.) qui est ita evidens, ut Lutherus, aut quisquam nostrorum non planius rem exprimere potuerit: quippe & ἄρτον ψιλόν esse negat Anastasius, qualis vulgo vendatur, & ἀντίτυπον τῷ σώματι χρῆσθαι. signum merum & figuram corporis Christi, qualis fuerit in Iudaeorum victimis &c. Sed non ignoro cavillationem dissentientium, qui cum hic interpretatio in suam partem omnis praeclusa sit, in hoc loco initia ponunt depravatae veteris & antiquae sententiae cum Albertino p. 903.

III. *Sacrificium verum ac proprium esse in Eucharistia antiquis, nec Liturgiis, nec S. S. Patrum scriptis firmatur.*

Quod seculi huius initio ex Orientalis Ecclesiae Liturgiis demonstrandum suscepit Renaldotius, veterem Ecclesiam in Eucharistia verum ac proprium sacrificium agnouisse, in quo sacerdos pro hostia immolaret Jesum Christum ad placandum Deum viuis atque mortuis, id ex Liturgiis vniuersae Ecclesiae docere instituit Muratorius, adiunctis etiam, vt in superiori disputatione, velut in subsidium, primae & antiquissimae Ecclesiae doctoribus. Negat se vniuersam illam controuersiam disputatione amplexurum: duo tantum sibi proposita esse: primum *ex antiquissimis omnium Ecclesiarum Liturgiis ostendere, perpetuum fuisse vniuersae Ecclesiae consensum, de vero & non imaginario sacrificio altaris: deinde breuiter palam facere, quam concordantes sint cum S. Liturgiis Patres, qui primis Ecclesiae seculis vixerint.* Atque ita intellectum iri existimat, an iure veteres Liturgias suae opinionis testes atque auctores commemorauerit Pfaffius Vir Cel. in Disputatione scilicet, quam sibi visam negat, de *Oblatione Eucharistica Veteris Ecclesiae.* Intelligi sane nobis & iudicari potest: sed vellemus ipse Muratorius Pfaffianum librum, in Germania valde obuium, sibi comparasset. vt ipse iudicare potuisset, & respondere ad ea, quae ibi dicta sunt. Sed
melius

melius fecit, cum cauit, ne istum librum videret. Magna & multiplici molestia se liberauit. Primum si librum vidisset, longe aliter suam sibi demonstrationem instituendam vidisset; quae nunc nihil est, nisi farrago locorum Liturgicorum, in quibus *sacrificii, hostiae, holocausti, immolandi* item, *offerendi* verba occurrunt: quasi hac sola commemoratione res confecta esset: ad multa deinde respondendi necessitas exorta esset, quae est misera & taedii plena in tam mala causa. Sed nobis, in disputatione instituta, non tam videndum est, quid non dixerit, quam quid dixerit, idque accurate refellendum. In quo tenebimus hanc rationem, ut primum vniuersae disputationis vitium demonstramus, deinde de singulis (quibusdam vel Liturgiarum verbis, vel *Muratorii* dictis respondeamus.

Quod igitur ad primum attinet, parum diligenter fecit *Muratorius* in capite eo, in quod latinarum Liturgiarum testimonia congeffit, quod nihil aliud, quam loca proposuit, in quibus ea, quae ante diximus, verba commemorantur. Qua in re dupliciter peccavit. Etenim nemo dubitat, aut nescit, in Liturgiarum carminibus ista verba frequentari: illa autem duo dubitantur: primum an ea proprie vel tropice dicantur, quorum illud Romani, hoc nos contendimus: deinde vtrum sint in parte ea Liturgiae, quae proprie eam, quam consecrationem dicunt, continet, qua facta multi credebant,

bant, praesens esse verum corpus & sanguinem verum Jesu Christi, an in oblationis formula, quae consecrationem praecedat in Missae Canone, pertinetque sine controuersia ad naturale vinum & panem. & vtriusque ad Eucharisticum sacrum destinationem. Etenim si hoc est, non modo nihil profunt causae Romanae, quia in ista oblatione nondum adest corpus & sanguis Christi, etiam ex ipsorum sententia sed etiam obsunt mirifice propterea, quod inde intelligi clare potest ea verba tropice dici, nec ad corpus & sanguinem Christi pertinere, atque porro tropice accipi posse etiam vbi in consecratione propria occurrant. Itaque debebat nouus ille sacrificii Eucharistici assertor hoc in primis docere, verba illa ab omni tropo libera esse. Sed grammaticas illas disputationes, vt omne interpretum vulgus facit, diligenter vitauit? Sunt enim impeditae, hac de causa, quia vitium nimis facile apparet, nimis facile conuincitur: quod secus est, vbi rebus solis utare, h. e. compendiorum, & elementorum decreta & verba identidem repetas & inculces, quam Theologicam interpretationem imperiti appellant. Semel tamen huc se demisit in verbo *immolandi*, quod monet esse victimae & hostiae animatae, eoque vel ipsos ethnicos scriptores verum sacrificium indicasse: de quo post videbimus. In auctoritatibus porro ponendis debebat hoc delectu vti, vt e consecrandi formulis peteret omnes, nullas e *περὶ*

Περὶ

Populus carminibus, idque vel in singulis admoneret, ut lectoribus quaerendi molestia demeretur, & iudicandi facultas expeditior daretur. Quorum ille nihil pensi habuit, certe nihil fecit, & ipse satis habens Sacramentarium nomina ponere, & lectores istis vagis indiciis contentos fore, nec quicquam ultra inquisituros sperans. In quo sane iniuriam facit lectoribus, cum eos tam imperitos, nihilque in hoc genere videntes fingit: nam ipsum adeo tironem in hoc capite fuisse, ut, quavia modoque id tractandum esset, ignoraret, suspicari nos non finit cetera viri doctrinâ.

Sed de singulis auctoritatibus, primum unde ductae sint, deinde quam vim habeant, videamus. E *Leonino* igitur quae proponuntur, in quibus sacrificium & cognata verba insunt, omnes praeter duas sunt ex parte missae ea, in qua dona Christianorum ante consecrationem offeruntur, h. e. si latine loqui velis, Eucharistiae destinantur, per preces & laudes diuinas. *Gelasiani* Sacramentarii testimonia ex eadem parte praeter vnum omnia petita sunt. Nec aliunde sunt pleraque, quae e *Gothico*, *Francico* & *Gallicano* proferuntur, quibus similia plura ac prope innumerabilia ex omnibus Liturgiis, & his, quae *Muratorianum* volumen exhibet, & aliis afferre & nos possemus. Nulla enim prope pagina est, ubi non in oblationis carmine hostiae, sacrificia, & immolationes oblationes-
que

que commemorentur: eiusque generis loca e
 variis Liturgiis dudum collegerat *Pfaffius* in
 Disputatione de oblationibus §. 40 iam
 haec testimonia in hac controuerſia nullam
 auctoritatem habere, ſed pro alienis repu-
 dianda eſſe, duobus modis planum fit. Nam
 primum, cum quaestio ſit, an corpus & ſan-
 guis Chriſti per ſacerdotem Deo imoletur
 pro peccatis viuorum ac mortuorum; ea
 immolatio non habet locum ante, quam ſit
 conſecratio, de Romanorum ſententia, facta,
 poſt quam demum aſeſſe corpus & ſanguis
 Chriſti creditur. Vnde ſit, vt, quicquid ante
 conſecrationem de hoſtiis & ſacrificiis dica-
 tur, id nullo modo ad corpus & ſanguinem
 Chriſti pertinere poſſit. Quomodo enim,
 quod non habeas, non adſit, immolare queas?
 Sed hanc rationem idem ille *Pfaffius* aliique
 praeclare explicauerunt. De altera ratione
 videbimus, quae proficiſcitur a verbis ipſis,
 quae, plane demonſtrari poteſt, perabſurde
 & per ſummam ac pudendam inſcitiam. ad-
 do etiam impietatem, ad Chriſtum referri.

Primum igitur comparatio formularum
 oblationis, quae ſunt in Liturgiarum libris
 innumerae, docet, quae in aliis *hoſtiae*, *ſacrifi-
 cia*, *holocausta* etiam dicantur, eaſdem in longe
 pluribus, in eodem contextu, cum iisdem
 verborum attributis (*praedicata ſchola* vocat)
 vocari *dona* ac *munera* & *oblationes*. Deus ro-
 gatur vt *ſuſcipiat*, *reſpiciat dona*, *munera*, *hoſtias*,
ſacri-

sacrificia &c. Ex quo per certas interpretandi leges conficitur, ut *hostiae*, *sacrificia*, *dona* & *munera*, sint res eadem, habeantque haec verba prorsus eandem potestatem: & quae proprie *dona* & *munera* dicantur, eadem tropice *hostias* & *sacrificia* appellari. Atque ea forma loquendi, ut *hostias* vocarent *dona* Christianorum, quae & in Eucharistia consumerentur, quorumque reliquiae ad absentes, pauperes, aegrotos, mitterentur, recte se habet, & ducta est ex epistola extrema Pauli ad Philippenses. Ehimvero *munera* ac *dona* nullo modo esse possunt corpus & sanguis Christi. Nam si essent, deberent profecto *donum Dei* vocari, qui Iesum Christum donavit hominibus eorumque saluti. Sed vocantur primum *dona* & *munera* in multitudinis numero, ut *hostiae* & *sacrificia*, deinde *dona* & *munera* *fidelium* p. 296. In Sacramentario Leonino, (e quo solo exempla commemoramus) *plebis* p. 348. *Ecclēsiae* p. 337. *munera servitutis nostrae* p. 363. *munera devotionis*, p. 376. quae stultissimus sit, qui de corpore & sanguine Christi capiat. Atque etiam omnia ista verba coniunguntur, quo modo synonyma solent, ut in Sacramentario Gregoriano: *uti accepta habeas & benedicas haec dona, haec munera, haec sacrificia illibata*: ut eadem esse, nullo modo dubitari possit. Sed porro illa munera qualia crediderint veteres Liturgiarum auctores, videamus exemplis. P. 368. in oblationis carmine sacerdos ait:
Deus,

Deus, qui, cum muneribus nullis indigeat, ipse nobis munera cuncta largiris, accipe propitius, quae de tuis donis tibi nos offerre voluisti: non solum nostrae reputans devotioni, quae tua sunt, sed etiam &c. & p. 370. Offerimus tibi, Domine, munera, quae dedisti, ut & creationis tuae circa mortalitatem nostram testificentur auxilium, & remedium nobis immortalitatis operentur. Videte o! Romani, munera illa, oblationes, hostiae, dicuntur munera Dei, creata a Deo in auxilium mortalitatis, h. e. ad vitam conseruandam. Calumniamini hic quantum vultis: nihil aliud nisi panem & vinum ullo modo hic reperiri sano cuiquam persuaferitis. Quam clara porro illa forma est, p. 413. extr. in qua etiam munera & hostiae iunguntur: Munera tua, Deus institutor, illustra, & per has hostias (hostias & munera hic eadem esse, nemo sanus dubitet) quibus te placari voluisti, sanctifica misericors immolantes. Qui sunt illi, quos Deus sanctificet per illa munera & hostias? Nempe Christiani, non solus sacerdos. Ergo & Christiani immolauere, non solus sacerdos. Atqui Christiani nihil nisi panem & vinum obtulerant. Iam, Sacrificium oblationis Deus rogatur in Missali Gothico, ut sua benedictione benedicat, & Spiritus S. sui rore perfundat, ut fiat omnibus legitima Eucharistia. Hoc sacrificium sine βλασφημία Iesus Christus intelligi potest? Non magis profecto quam illud in Sacram. Leonis p. 301. cum Deum rogat sacrificulus, ut hostiam nostram martyris S. L.

veneranda & beata commendet oratio: sicut p. 332. ait: oblationes fiant tibi placitae tuorum deprecatione p. 335. placentium tibi precibus fiat grata devotio. Hostiae ipsae ubi occurrunt, ut in hoc, attribuantur iis, quae qui credere possit, de Christo intelligi posse ullo modo, eum credam omnia, quamvis absurda, crediturum. p. 329. in loco a Murator o ipso proposito, dicuntur istae hostiae imponi altari, ut honoretur potentia divina: quod ad creationem, non ad redemptionem pertinere, in qua amor potius Dei erga genus humanum intelligitur, quis non intelligit? Tum porro p. 359. non vult munus aestimari nostris meritis: quod ad Christum sine summa impietate & stultitia referri nequit. Ad haec si quis de coetu Romano potest respondere, sed non Muratoriana ista vaga ratione, verum presse & per singulas partes, & ea diluere, hoc est, docere, munera & hostias, in his formulis per interpretandi leges non esse eadem, deinde, quae istis muneribus & hostiis tribuuntur Christo convenire: tum vero nihil aliud desiderabo, statim victas manus dabo. Sed addam locum insignem e Liturgia Cyrilli (ap. Renald. T. I. p. 42.) sacrificia, dicit sacerdos, oblationes in gratiarum actionem eorum, qui offerunt laudem & gloriam nomini tuo sancto. Diaconus interfatur: orate pro illis, qui de suo sacrificia & oblationes fecerunt. Tum pergit sacerdos: suscipe ea super altari tuo spirituali, coelesti - - sicut ad te suscepisti munera iusti

iusti Abel &c. Sequitur alterum sacrificium laudis & placationis: Ita quoque vota seruorum tuorum excepta atque &c.

Sed quid fiet locis Liturgiarum iis, quae sunt ex ipso consecrationis carmine? cuius generis duo e *Leonino*, vnus e *Gelusiano* libro proferuntur, poterantque alia proferri in primis e *Gregoriano*? Primum eorum nulla vis esse potest propterea, quod sunt in praefationibus consecrationis, quam Romani in solis verbis Christi, *hoc est corpus meum*, ponunt, vbi nondum, de ipsorum sententia, est corpus Christi, nec adeo immolari potest. Atque etiam primus statim locus est ita alienus, vt appareat, *Muratorium* nil nisi verba singula spectasse. de sensu eorum assequendo ne cogitasse quidem. Verba sunt haec e *Leonis* libro (p. 303.) *Vere dignum: quis enim aut possit, aut audeat, a tua laude cessare, perpendens mirandae dispositionis effectus, quod de substantiae genere peccatricis immaculata hostia gigneretur, cuius, pro eiusdem naturae reatu, possis immolatione placari!* Est sane hic hostia, eaque Iesus Christus, est immolatio, est placatio Dei. Sed vbi ista immolatio facta intelligenda est? Scilicet in cruce. Sicut ista hostia non in altari per sacerdotem consecrando facta, sed de substantia peccatrice genita dicitur, sic & in cruce immolata intelligitur. In altero, ex eodem libro est *laudis hostia*, quam de Christo intelligi non posse, mox videbimus: intelligiturque vel ex

altero tali loco e Sacramentario Gothico, vbi haec verba sunt: *Dignum & iustum est nos tibi laudes dicere: hoc proprie: sequitur tropice: & hostias immolare.* In alia porro praefatione, proposita e Gelasii libro, Christiani dicuntur corpore C. & sanguine, quò a peccatis redempti sumus, ad vitam aeternam sacrificiis caelestibus pasci. Bene. Sed corpore & sanguine C. vt coelesti sacrificio pasci nos, nemo dubitat: an sacerdos corpus & sanguinem C. immolet, id quaeritur: cuius rei nullum hic est vestigium. Et eius generis sunt cetera.

Sed Liturgiarum testimoniis Muratorius, velut bonus caussarum patronus, Ciceronis disciplina conformatus, interfatur subinde, dispersgens aliquid callidae admonitionis, vnde vis & grauitas testimonionum intelligatur. De his quoque videndum est, In Leonis libro dicitur *sacrificium immolari.* Recte. addo etiam *hostias immolari* dici, quod est maius, si quis velit pueriliter verba aestimare e Vocabulario tribolari. Quid ergo? *Immolationis* autem voce, inquit, vel ipsi ethnici scriptores verum sacrificium designarunt, vti ex eorum verbis, quae referre superfluum foret, euincitur. *Immolare enim supponit victimam, eamque animatam.* Non putaram, tam versatum fuisse in istis ethnicis scriptoribus: eam latinitatem viri, eam interpretandi rationem animaduerteam! Sed non nulli sapientiam, vt auari numos, clam habent, & occultant consulto. Cur vero non & addit

dit, *hostiam* apud istos ethnicos de victima viva dici? Nam & hoc ita est. Sed quam vult eius tam raræ obseruationis vim esse? Nempe hanc, vt in Missa viuum & animatum sacrificium Deo per sacerdotem fiat. Quod ille per se intelligi putat: adeo ne diserte quidem posuit. Sed quæ est hæc ratio interpretandi Liturgias ex ethnicis scriptoribus. Quasi non planum esset, id quod antea monuimus, formas has loquendi esse e sacris libris sumtos, vbi beneficia Christianis tributa dicuntur *θυσίαι δευταὶ* & *ευάρετοι τῷ θεῷ*, *hostiæ acceptæ*, *placantes Deo* vetus latina hæbet: quæ verba centies in Liturgiis, de illo hostiarum Liturgicarum genere, occurrunt: in primis e Psalmi XLIX verbis: *Immola Deo sacrificium laudis*; quæ verba sæpe in Liturgiis ad oblationes panis & vini Eucharistici accommodantur. Hic quaerere lubeat, an, quia *immolare* supponit *hostiam animatam*, apud Dauidem quoque supponat, sitque laus illa, quam Deus sibi immolari iubet, animal viuum & animatum? Sed nihil est tam stultum, quod non dicere audeant homines, cum fixum est, defendere errores. In Leonis libro p. 312. *munera Ecclesiae* dicuntur *immolari*. At ea certe munera sunt panis & vinum, non animalia viua. Totum igitur hoc ineptum est ac puerile. At enim stulti sunt Protestantes, qui, cum in Missa Romana inueniunt sacrificium laudis, non ultra pergunt. Sed ibi etiam requirant, ac inuenient sacrificium placationis,

tionis, quod etiam in *Sacramentario Gelasiano* legitur, *Gregoriano & Gothico*. Haec *Muratorius*. Nimis impatientes in legendo fingit nos. Immo nos quoque *hostiam placationis & laudis* ex iis, quae prodidit, & aliis locis reperimus. Sed nos iidem veram istorum verborum vim requirimus: ipse autem cum suis gregalibus, ubi verba sacrificii & hostiae & immolationis & placationis reperit, non ultra pergit, nec requirit, qui per leges interpretandi sensus istorum verborum esse debeat. Bis hic peccavit *Muratorius*: primum, quod placationis verbum e vulgaribus Theologiae compendiis intellexit, deinde, quod consuetudinem & sententiam veteris Ecclesiae in oblationum formulis ignoravit, cum de rebus Liturgicis scriberet, & tot Libros Liturgicos ederet. Primum igitur ignoravit latinitatis vim, cum existimavit, *placationem* in hac formula necessario significare expiationem irae diuinae, peccatis humanis irritatae, & veniae impetrationem. Nihil tale cogit latinitas, quae *Deum placari* etiam dicit, cum aliquid sit, quod sit Deo gratum, ut preces, laudes, recte facta, quod sit Deo placitum. Itaque sacrificium laudis, idem placationis dicitur, quia Deo placet praeter omnes partes cultus religiosi, suntque *sacrificia placationis* *Pauli & Silae iudaeos*. Hoc ita esse, clarum faciemus locis ipsarum Liturgiarum. In Sacram. *Leonis* mens. Apr. n. 43. p. 312. extr. oblationis formula haec reperitur: *Oblationes nostras*, i. e. Populi,

puli, Ecclesiae, vt alibi, *quaesumus Domine, tua tibi dignatione fac placitas: quia nihil in nobis, quod placare te possit, i. e. nos tibi placitos & nostra tibi placita reddere, nisi, deprecantibus sanctis nos tua propitiatioe praeuenias i. e. tua sponte nobis propitius sis, & sic nos & nostras oblationes tibi placitas esse sinas.* p. 332. *Oblationes populi tui, Domine quaesumus, Apostolorum tuorum passio conciliet, & quae nostris non aptae sunt meritis, fiant tibi placitae tuorum deprecatione iustorum.* Vnde & p. 335. *nostris meritis non est digna fiducia: placentium tibi precibus fiat grata deuotio.* Sed si maxime quis malit placationis verbum sensu scholae theologiae accipi, tamen nihil efficitur. Nam nihil frequentius est in oblationibus, quam ut ista munera panis & vini, quia vsibus eucharisticis & deinde pauperibus destinantur, prodesse dicantur ad remissionem peccatorum. P. 300. Sacerdos in oblatione orat, vt *muncra, quae deferuntur, & medelam afferant & gloriam.* Ante p. 399. *huius oblationis obsequium ad placationem tui nominis nobis fac prouenire,* p. 312. *respice propitius munera, quae immolamus pro nostris offensionibus, & sic centies.* Atque hae formulae, & si non satis exactae sunt ad subtilem Theologiae rationem & summam veritatem, quae talibus muneribus, & liberalitati nullam vim ad veniam peccatorum relinquit: tamen commoda interpretatione molliri possunt, vt nihil habeant, quod reprehendi possit: praesertim cum in iplis libris di-

uinis quaedam non absimilia reperiantur loquendi genera, de quibus dicere non est necesse.

Illud quoque magnopere cupiam doceri ab Sacrificii huius Eucharistici defensoribus, quomodo, si hostiae & sacrificii nomine Liturgiarum auctores intellexere corpus & sanguinem Christi, quomodo, inquam, in Canone Gregoriano aliisque Liturgiis sacerdos rogare Deum possit, *ut illud sacrificium, illam oblationem benedictam, ratam, rationabilem facere dignetur, ut nobis corpus & sanguis fiat dilectissimi filii, Domini Dei nostri I. C.* Nam profecto, si sacrificium, cuius ante mentio facta, est verum & viuum corpus I. C. perabsurdum est rogare, ut fiat corpus I. C. Sed multa huiusmodi disputari possent: verum & ab aliis dudum proposita, necdum refutata sunt: & nos non totum hunc locum perfecte disceptare, sed Muratoriana refellere constituimus: quod nos quidem, quoad latinas Liturgias perfecisse confidimus: ad Graecas & ceteras Orientales progrediamur: quarum testimonia c. XVII. p. 202. sqq. edidit.

In iis autem principem locum obtinent ea, quae *S. Chrysostomo* tribuitur, & *Clementina*, quae vocatur, in Constitutionum Apostolic. VIII. 12. Ex his igitur primum excerpta ponuntur a *Muratorio*, itemque ex ea, quae *S. Basilio* tribuitur. Sed in hac parte disputationis idem peccauit, quod in superiori, proponendis

dis locis ex oblationum formulis, quae consecrationem praecedunt: in quibus nullo modo per sacrificia intelligi posse corpus & sanguinem Christi, ante vidimus. In iis autem, quae afferuntur e verbis sacerdotis post consecrationis formulam, λογικὴ λαγνεία Deo dicitur offerri pro mortuis: sed eam quis dicat esse corpus & sanguinem Christi, & non potius preces & supplicationes. Quod etiam in sequentibus clarum fiet, & plane patet e loco Paullino (Rom. XII. 1.) unde haec verba sunt ducta. Nam quae in *Clementina* post consecrationem commemoratur *Oblatio*, nulla alia est, quam quae ante consecrationem fuit: itemque sacrificium precum pro viuis & mortuis: sequunturque preces ipsae. In Liturgia Graeca *S. Basilii* (ap. *Renald. T. I. p. 69.*) post consecrationem, inter preces, s. sacrificium precum, etiam haec verba reperimus: Μνήστηθι κύριε τῶν τὰ τίμια δῶρά σοι ταῦτα προσφερόντων, καὶ ὑπὲρ ὧν καὶ δι' ὧν, καὶ ἐφ' οἷς αὐτὰ προσεκόμισαν. Hic clarum est commemorari eadem dona panis & vini, quae ante consecrationem: & consecrata aut nondum esse corpus & sanguinem Christi aut tantum in iis coniuncta putari. Dicit enim haec dona, digitoque demonstrat: ea porro indicat esse non oblata a sacerdote consecrante, sed a Christianis allata, προσκομιθέντα: quod est συνώνυμον alteri προσφέρειν. At qui corpus & sanguinem Christi non attulere. Ad haec prorsus nihil est quod reponi possit!

tanta est euidencia. Sed eadem sunt in *S. Gregorii* Liturgia Gr. p. 108. Iam in Liturgia *S. Marci* p. 145. in praefatione *Vere dignum*, sunt no-
tu dignissima haec verba: δι ἑ; (Ἰησοῦ
Χριστοῦ) σοι σὺν αὐτῷ καὶ ἁγίῳ πνεύματι εὐχαρι-
στῶντες, προσφέρομεν τὴν λογικὴν καὶ ἀναίμακ-
τον λατρείαν ταύτην. Quid? an Christus per
Christum a Sacerdote offertur Deo? Immo
vero haec λογικὴ καὶ ἀναίμακτος λατρεία fit gra-
tiis agendis Deo, & laudibus eius celebrandis:
nam illud εὐχαριστῶντες profecto est gratias agen-
do: quod Graeci, cum verbo vtuntur, a iter
quam per participium exprimeré non possunt.
Enim vero quid sequitur! hanc λατρείαν, per-
git, προσφέρει πάντα τὰ ἔθνη &c. ὅτι μέγα
τὸ ὄνομά σε ἐν πᾶσι τοῖς ἔθνεσι: an quisquam
potest haec de alia re quam de laudibus diui-
nis intelligere? quae etiam sumta sunt e Psal-
mis Dauidicis, vt patet e sequentibus: καὶ ἐν
παντὶ τόπῳ θυμίαμα προσφέρεται τῷ ἑνὶ
ἁγίῳ σε καὶ θυσία καὶ προσφορά: quae vt Da-
uides de laudibus Dei dixit, ita hic intelligi
clarum est. Sequuntur deinde deprecationes
& supplicationes, & fit accessio ad consecratio-
nem. Ibi p. 155. pr. ait sacerdos, πλήρωσον ὁ
θεὸς καὶ ταύτην τὴν θυσίαν τῆς παρά σε εὐλο-
γίας, διὰ τῆς ἐπιβοήθησεως τοῦ παναγίου σου πνεύ-
ματος. & sequuntur verba institutae a Christo
Eucharistiae. καὶ ταύτην θυσίαν, ait, etiam hanc
θύσιναν: nempe alia, hostia laudum & pre-
cum praecesserat: & haec est altera hostia, ob-
latus

latus & donatus panis cum vino per piam liberalitatem, corpus & sanguis Christi esse non potest, quia alienum est ab iis, quod rogat Deum, vt per Spiritum S. ea victima impleatur aiuina vi. Speciem maiorem habet in caussa Romana locus e Liturgia *Chrysostomi*, qui etiam repetitur in Liturgia S. Gregorii Gr. (ap *Renald.* T. 1. p. 94. in Oratione veli) σὺ εἶ ὁ προσφέρων τε καὶ προσφερόμενος, ὁ δεχόμενος καὶ ὁ διδιδόμενος. In Gregoriana plenius est: σὺ εἶ ὁ ἀγιάζων καὶ ἀγιαζόμενος, προφ. τ. κ. π. ὁ δεχόμενος καὶ δεκτός, ὁ διδὼς καὶ ὁ διαδιδόμενος &c. Sed hic locus intelligi potest ex alio in Liturgia Iacobitarum Syrorum, in quo haec sunt: *Deus, tu factus es sacrificium, & tibi sacrificium offertur: Suscipe hoc sacrificium pro.* qui locus (p. 205. extr.) stultissime a *Muratorio* adfertur pro caussa sua. Sermo est de Christo, qui factus est sacrificium pro nobis in cruce, & cui nunc sacrificia laudum & precum offeruntur: quae rogatur, vt benigne accipiat. Male autem *Muratorius* versionem latinam offerris corrigit offerreris. Immo, oblatus es. E graecis Liturgiis pauca attulit *Muratorius*, plura e ceteris Orientalibus a *Renaldorio* editis: sed ea nullius ponderis. Nam pleraque sunt ex oblationis aut precum consecrationem antecedentium formulis, quibus nulla talis sacrificii, quale *Muratorius* vult, mentio locum habet; idque genus est a nobis iam satis confutatum. Profertur *Sacrificium rationabile, incruentum*: quo maxime confi-

confidebat in hac caussa Renaldotius (T. I. p. 302. id esse in laudibus & precibus, ante dictum est cum de Graecis ageremus. Sunt autem id quod non parum refert ad causam nostram, estque capite primo admonitum. hae Liturgiae ductae e Graecis, atque ex his adeo intelligendae. Sed maxime nostervidetur confidere epitheto sacrificii, cum *tremendum* Gr. φοβερὸν, Φρικτὸν vocatur: in quo cum aliis inscitiam mirifice prodit, cum ait: *haec sola vox supereminentem maiestatem sacrificii Christiani indicat: nempe, quia est corpus & sanguis C. Ianus ὁ μακαρίτης*, disputans de eadem re aduersus Renaldotium, p. 34. ait, *magis alienum ab hoc (quod nos volumus intelligi) sacrificio videri poterat epitheton hoc. Sed φοβερὸν hoc loco idem haud dubie est, ac venerabile, s. cum reverentia peragendum, quo sensu in eadem Liturgia Gregorii p. 93. de toto ministerio s. cultu diuino dicitur. τὸ γὰρ διακονῆν σοι μέγα καὶ φοβερὸν ἐστὶ. De posteriori forte quis dubitet, quando & Chrysostomus de Sacerdotio III, 5. 7. e consuetudine loquendi Graeca intelligit τὸ φοβερὸν τῆς διακονίας: prius verissimum est. Sed vellem grammatica ratione docuisset: ne vt ipse simpliciter adfirmavit, alii idem simpliciter negent: praesertim cum ipse intellexerit, in hoc verbo haerere etiam nostros posse, aestimantes id verbum consuetudine loquendi latina, & comparantes cum voce vernacula, vt fit saepe etiam a Theologis, in primis concionatoribus, in hoc ipso verbo, vt saepe audiui.*
Est

Est autem in hoc verbo merus hebraismus, ductus e Psalmo secundo, & frequentatus D. Paulo in epistolis: vnde per interpretes hebraismi imperitos venit etiam in latinos libros. Colere nos Filium Dei iubet *David* בִּירָאה, & laetari בִּירְעָרָה: quod *Paulus*, de fervorum ministerio, itemque de suo inter Christianos, graece exprimit μετὰ φόβου καὶ τρόμου, vel ἐν φόβῳ καὶ ἐν τρόμῳ: quod est *modeste, cum reuerentia*, vt docent *Amama* in *Antibarb.* Bibl. p. 446. *Camero* Myrothec ad Phil. II, 2. & *Grotius* ad Ebr. XII, 28. & alii. Atque sic etiam intelligendus in hoc verbo *Chrysostomus* de Sacerdotio VI, p. 306. ὅταν δὲ καὶ τὸ πνεῦμα ἅγιον καλῇ, καὶ τὴν Φρικώδες ἄτην ἐπιτελῇ θυσίαν, &c. πύσῃ αὐτὸν (sacerdotem) ἀπαιτήσομεν καθαρότητα, καὶ πύσῃ ἐυλάβειαν. Non bene *Bengelius*, plenissimum horrois, vt III, 4. p. 100. vbi tamen synonymum φοβερὸν bene venerandum. Sed alia loca videamus a *Muratorio* proposita, quae quidem aliquid scrupuli iniicere alicui possint.

E Liturgia S. Basilii Graeco Arabica (ap. *Renald.* T.I. p. 89.) affertur (p. 205.) hoc sacerdotis post communionem orantis: *digni facti ministrandi altari sancto tuo, qui tibi obtulimus incruentum sacrificium* (haec duo verbao misit *Muratorius*) *immaculatum corpus & pretiosum sanguinem magni Dei & Saluatoris nostri J. C.* Quae verba sunt sane speciosa pro *Muratorii* caussa. Sed primo animaduertendum, eas non ad sacerdo-

cerdotem proprie pertinere, sed communi τῶν κεκοινωνηκότων nomine fieri: nec impedit verbum λειτουργεῖν, quod etiam de κοινωνῶσι dicitur. Nam λειτουργῶντες iidem dicuntur καταξιοθῆντες τῆς μεταλήψεως τῶν μυστηρίων. Quae observatio statim tollit vim huius loci in ista causa, quae defendit. sacerdotem (non κεκοινωνηκότας) sacrificium facere immolando corpore & sanguine Iesu Christi. Formula deinde obtulimus tibi incruentum sacrificium, immaculatum C. & S. hanc vim habet: obtulimus tibi panem. vinum, cum laudibus & precibus, quibus sumendis accepimus corpus & S. C. beneficio tuo. Simillima est haec forma verborum alteri, cum sacerdotes dicuntur consecrare corpus C. & S. C. pro consecrare panem & vinum, quibus sumendis deinde accipiatur corpus & sanguis Iesu Christi, in Liturgia S. Gregorii Alexandrina ap. Renaldotium T. I. p. 94. *dignum me fac*, inquit sacerdos. *adstandi sanctae huic mensae & consecrandi immaculatum corpus tuum, pretiosumque sanguinem tuum.* In Graeco est *ιεραγεῖν*, quod est verbum sacrificantium, & miror a Renaldotio non verum esse sacrificandi, quod rectum foret. Verum id quid sit, statim ipse sacerdos docet: *Dignum me fac, ut tibi offerantur dona ista a me peccatore.* Dona autem ista sunt panis & vinum, a Christianis allatum. In Liturgia Iacobitarum Syrorum, dum lauat manus sacerdos, orat Deum, ut pure tractet sacramenta, &

& offerat ei sacrificium viuum, simile sacrificio eius glorioso. Sacrificium viuum, ex loco Paullino satis constat, esse λογικὴν λατρείαν, de qua supra vidimus. Id vult esse simile sacrificio, quod Christus ipse obtulit, non idem, vt placet Romanis. Quae autem ista est similitudo? ipse sacerdos docet: quod placeat diuinitati tuae. Atque hae non sunt imaginationes & arbitraria verborum & sensus supplementa, quae nobis hic obiicit Muratorius, sed interpretationes e sacris literis, & contextu, consuetudine veterum loquendi, secundum leges veras interpretandi, ductae: contra quae non satis est declamare: demonstratione exacta ad interpretandi leges opus est. Ex eadem Liturgia (ap. Renald. T. II. p. 22.) proponitur particula orationis, quae recitatur, cum margarita, h. e. particula panis consecrati, mittitur in calicem: *Pater veritatis, ecce Filius tuus, hostia tibi placita - - hoc sacrificium e manibus meis, vt mihi placatus sis* &c. Haec si quis legat, haereat fortasse. Sed qui totam orationem perspiciat, statim expediatur. Et est hoc vel artificium impostorum, vel inscitia semidoctorum, decerpere tales particulas, quae extra contextum speciem accipiant. Etenim hic non intelligi verum & proprium sacrificium, quod sacerdos immolet pro omnium peccatis, clarum est primum ex eo, quod id sibi vult prodesse, fumentis videlicet, vel deprecanti: dein-

deinde, quia de sanguine sic loquitur: *Ece sanguis effusus super Golgorbam ab iniquis, qui interpellat pro me. Suscipe deprecationem meam propter eum: hoc est illud: suscipe hoc sacrificium* &c. Atque ad hunc modum cetera Liturgiarum loca intelligenda sunt, cum post consecrationem similes formulae verborum reperiuntur, quibus sacrificium refertur clare ad corpus & sanguinem Iesu Christi, neque aliquid est eiusmodi, quod ad dona fidelium referre iubeat, quae qualia sint, supra demonstratum est. Afferit Muratorius e Coptica Liturgia locum, in quo ad fractionem Diaconus alta voce dicit: *Benedic Domine iterum per oblationem hanc sanctam & sacrificium propitiatorium, quod Deo Patri oblatum, sanctificatum completum & perfectum est per illapsum Spiritus S.* Hic clarum est, intelligenda esse dona Christianorum Eucharistiae destinata, quia verba ultima non nisi impie ad Christum referri possunt. Itaque male hic locus a Muratorio argumenti causa propositus est. Sequitur alter Diaconi, ante communionem dicentis: *Virtutes coelorum stant nobiscum in medio sanctuarii, & ministerium exhibent corpori filii Lei, qui immolatus est coram nobis.* Hic clare immolandi verbum refertur ad corpus Christi, sicut in quibusdam aliis Muratorio commemoratis verbum offerendi aut sacrificii: quibus locis quantumvis, post Renaldotium (T II. p. 345.) tribuat, iactans etiam se, & nos (notatores)

uatores) prouocans, vt *contorqueamus hic, si possimus*: tamen eorum locorum nullus alius sensus est, nisi, vt corpus & sanguis Christi sacrificium vocari dicamus, quia olim in cruce hostiam semet obtulit Deo pro peccatis, eiusque rei *memoria* de praecepto Christi, non iteratio, celebratur in S. Coena, per quam etiam fructus illius in aeternum valituri sacrificii capimus, per remissionem peccatorum. Quod si quis nolet concedere, eum rogabo, vt me doceat, quomodo intelligere me velit verba, quae e Missa *S. Basilii* afferuntur (p. 204.) sacerdotis in Sabbato ante Pascha post consecrata dona: *Rex regnantium & dominus dominantium progreditur, vt MACTETVR & detur in cibum fidelibus. An Christus, etiam in S. Coena a sacerdote crucifigitur & interficitur, atque ita proprie & vere, vt hostia, mactatur?* Ceterum parum diligenter fecit *Muratorius*, qui testimoniis his Liturgicis, sine delectu & ordine positis, admiscuit etiam, quae potius ad veram corporis & sanguinis Christi praesentiam asserendam, quam veritatem sacrificii Romani in Eucharistia confirmandam pertinent. Et sunt alia, quae reprehendi in hac disputatione possint: velut cum (p. 204. med.) vituperat Protestantes, qui Iudaeis vera sacrificia concedant, & tamen hoc Eucharisticum improprium sacrificium esse pugnent: quo nihil ineptius dictum vidi. Nouum foedus habet & ipsum sane sacrifici-

H um

um verum & proprium, Iesum Christum, sed id sacrificium, si credere potestis *Paullo*, nec eo vobis potior est, Romani, scholae vestrae auctoritas, semel factum perpetuam vim habet, hoc ipso nomine praestantius Iudaicis, ut *Paulus* demonstrat. Eius autem ἀνάμνησιν celebramus in S. Coena: quod cum facimus, etiam in communionem illius victimae sanctae admittimur, edendo, bibendo de ea, & omnia per eam parta bona consequendo. Quid vultis amplius? Non his contentis nobis esse conuenit?

Illud autem mihi concedent omnes, nihil eorum me in hac disputatione fecisse, quorum reos agit alios *Muratorius*. Non de qualitatibus & ritibus veterum sacrificiorum & victimarum differui, ut per ea eluderem vim testimoniorum: quas quivis bona cum pace mea, cavillationes vocet. Neque ad suspensiones confugi, de interpolationibus & supplementis Liturgiarum, earumque antiquitate & ἀνθεντικά: omnia pro antiquis, genuinis, puris, uti voluit, probavi. Ex ipsis Liturgiis autem, & consuetudine loquendi, vel e sacris libris ducta, vel paullatim in Ecclesiam inuenta, & ex ipsis Liturgiis, cognoscenda, comparatione locorum similium, secundum veras interpretandi leges, omnem disputationem repetii. In quibus, & in quo genere, si quis me convincere aberrationis potest, eum libenter audiam. Restat, ut de
locis

locis Doctorum veteris Ecclesiae pauc addamus.

Primum autem grauem dicam ignorantiae Dialecticae impingit *Buddeo, Pfaffio, & aliis*, magnus, vt Grammaticus & interpres, ita Dialecticus, qui, quod scriptores Ecclesiastici trium primorum seculorum sacrificium Eucharisticum non commemorant, eum modum loquendi, a simplicitate doctrinae antiquae abhorrentem, quarto demum seculo vsurpari coeptum, opinioni nouae locum fecisse existiment. *Si nemo nec Apostolorum nec ceterorum per tria secula Doctorum hoc sacrificium commemorauit: an negauit ex iis quisquam?* Ita callide interrogat. *Eratne eis lex imposita, vt, cum Eucharistiam memorabant, etiam sacrificii mentionem facerent?* Ad quae facile responderi potest. Viri illi docti non ignorabant, silentii quae vis esset in monumentis scriptorum. Non omne sane silentium est eiusmodi, vt propter id solum aliquid pro falso repudiemus. At si silentium non est vnus, aut paucorum, sed omnium, inquirere, de qua tam saepe, tam clare loquuntur, cuius totam naturam & rationem ex instituto explicant, quae est eiusmodi, vt eam nullo modo tacere debuerint: ne tum quidem silentium illud valebit? De primo mox videbimus: alterum ne ipse quidem negauerit *Muratorius*: tertium autem quomodo dubitari potest ab eo, qui sacrificio Eucharistico tantum tribuit? Hanc tantam rem omnes ta-

cere? nec cuiquam verbum de ea excidere? cum posteriores tam frequenter eius mentionem vsurpent. Non vero simile est Quod si probare velimus rationem Muratorianam, vt dogma alicuius momenti & a Θεοπνεύματος & a ceteris trium saeculorum Ecclesiasticis scriptoribus perpetuo silentio premi, & per traditionem conseruari possit: omnia obtrudi nobis poterunt, quae posterioribus in mentem venerint quamuis absurda, velut per traditionem quandam ad ipsos inde a Christo propagata. Atque illa traditio *Irenaei*, per quam dogmata quaedam non scripta ad posteror peruenisse vult *Muratorius*, a TE, VIR VENERANDE, ita confecta & abiecta est in praeclara aduersus *Massuetum* disputatione, vt pudere debeat omnes, eius vltra mentionem iniicere, praesertim talem virum. qui in antiquis monumentis, graecis & latinis bene versatus videri voluit, vnde discere potuit ac debuit, παραδιδόναι & tradere, cum de dogmatis dicitur, semper vel disciplinam viui, vel libros mortui significare, cum autem de praeteritis rebus, imprimis memoria nostra maioribus, sermo sit, semper de monumentis literarum intelligi, nunquam de fama & sermone hominum. Itaque cum historici aliquid tradi, vel traditum esse dicunt, id semper de aliorum historicorum libris accipi debet: quando etiam fama ipsa de rebus antiquioribus sic dici solet apud *Livium* & alios:

nec

nec id ignorat quisquam, ab idoneo magistro literis graecis & latinis eruditus

Enimvero non opus erat *Muratorio*, illegitimas & abominabiles leges logicas obiiicere iis, qui ista ratiocinatione vti sunt: satis erat, recte demonstrare, falsum esse, quod sumtum esset de isto trium seculorum filintio. Ea demonstratio quam male processerit viro, facile doceri potest. Sed huic demonstrationi aditum parat per observationem mirabilem, qua bonus *Paullus* perspicui erroris coarguitur. Christum, ait, sacerdotem esse similem Melchisedeco, auctore *Davide*: sacerdotem autem esse, qui sacrificia administret: Iam Christum utique sacerdotem & hostiam fuisse in cruce. Haec bene. Quid amplius? Sed ibi sacrificium non peregerisse, uti sacerdotem Melchisedeco similem deceret: itaque id facere in S. Coena: ibi & sacerdotium & sacrificium exercere. in consecratione panis & vini, & eorum oblatione: ibi alterum eius sacrificium intelligendum esse. Et hanc observationem in primis teneri vult. Haec si vera sunt, profecto *Paullus* erravit, qui Christum non, ut ceteros sacerdotes, necesse habere, ait, sacrificare pro peccatis hominum saepe ac quotidie, sed id fecisse semel, cum semet ipse immolaret (Ebr. VII, 27.) Atque etiam ipsa Ecclesia Romana convincitur erroris, quae Christum in S. Coena immolari dicit a sacrificulo: coque putavi pertinere loca e Liturgiis a *Muratorio*

rio allata. Nunc audio, non sacrificuli esse hoc, sed Christi ipsius Sed hoc Theologi Romani viderint. Tota igitur observatio est commentitia & falsa, ut leniter dicam, vel hoc nomine, quod S. Eucharistia antecessit mortem Christi: unde planum fit, non perfectum ibi sacrificium in cruce coeptum. De hinc sequitur locus *Malachiae* I, 10. comparatus cum locis *Iustini* duobus & Dialogo cum Tryphone, iam saepe a Romanis Theologis in hac controuersia allatus frustra: ut taedeat aliquid reponere, cum ipse nil responderit iis, quae contra dicta sunt a multis, in primisque praeclare a *Pfaffio* V. C. in eruditissimis ad *Irenaei* Anecdota notis p. m 684 *Malachiae* quidem מנחה טהרה καθαρὰν θυσίαν tropice accipiendam esse, puer intelligat ex adiuncto solo. Non victimas enim modo puras per totum orbem terrarum faciendas praedicat, sed etiam מקטר θυσίαιμα: & *Tertullianus* adv. Iud. (p. 211 ed. *Rigalt.*) sacrificia *Malachiae* diserte interpretatur de laude diuina, & corde contribulato: itemque apud *Iustinum*, & *Irenaeum*, nam & hunc addit *Muratorius*, non modo προσφοράς fieri in S. Coena dicuntur, sed etiam a *Christianis*. novi Testamenti sacerdotibus ac Pontificibus, & quidem e creaturis diuinis, h. e. pane & vino, non a Christo, aut sacrificulo Clerico, nec de corpore & sanguine Christi. Sed de his non erat sermo ac disputatio. Itaque illa lo-

ca

ca sunt aliena omnia: nec minus cetera. *Tertullianus* Christum vocat *novorum sacrificiorum sacerdotem*, adv. Iudaeos l. c. Bene: sed *spiritualium, cordis contribulati*, vt dixi, *precum & laudum divinarum*: nam de his ibi sermo. Indignatione subinde opprimor, VIR VENERANDE, in talibus locis, quæ nimis clare sunt aliena, qui alias facile dissensum fero & imbecillitatem ingenii humani non ignoro. Profecto aut puer sit stultissimus, aut impudentissimus, qui in hoc loco sacrificium S. Coenæ e mente Romanae Ecclesiae reperiatur, & inesse aliis persuadere conetur, aut aliud dicat, aliud corde premat. Sed fortasse & *Muratorius* & alii gregales eius in legendis scriptis veteris Ecclesiae ita adficiuntur, vt ille apud *Horatium* Athenis felix homo, qui cum in portum, venisset, omnes, quæ ibi essent, naues, & in iis merces, suas putabat, & mirifice lactabatur tantis diuitiis suis. *Sacrificiorum orationes* commemorantur ab eodem (de oratione p. 155) *Rigaltius* praeclarus *Tertulliani* interpres, intelligi admonet preces. Verissime. Et si quis quid ibi aliud videt, cum male videre certum est. At a *Muratorio* eo nomine male accipitur. Quo argumento? quia *Tertullianus* discrete sacrificia ab orationibus distinguit. Quomodo? *Sacrificiorum orationes* dicit, non *orationes*. Proh! hominum fidem. Si hoc non est nugari in re seria, quid est aliud? O quicumque iuventutem docetis interpretari, huic homini

vos in disciplinam committite, ab hoc discite interpretari. Diebus stationum quidam negabant *interueniendum orationibus sacrificiorum*, ne statio solueretur, quod fieret accepto corpore Domini. Quae sunt istae orationes sacrificiorum? nempe Eucharisticae oblationes, & cum iis coniunctae laudes diuinae & preces; quibus qui aderant, etiam Eucharistiae participes fiebant. Sed omnino, quae sacrificia Christianorum statuatur *Tertullianus*, docet *Pfaffius* V. C. de Obl. Euch. §. 38. Post longam deinde & inutilem de altaribus disputationem, e quibus & ipsis argumentum rei propositae exprimitur, affertur locus *Origens* e. IV. homilia in Leuiticum: *Sacerdos qui diuinis adssistit altaribus, aliis indumentis utitur, cum est in sacrificiorum ministerio.* Qui locus nullum euidentis argumentum habet. Nam sacrificiorum nomine possunt etiam intelligi preces, laudes diuinae, oblationes panis & vini, quae sacrificia vocari a veteribus qui neget, nihil sciat necesse est, & est supra demonstratum. Nec locus alter, e libris contra Celsum, illi aliquid roboris addiderit, in quo Christus, ut summus Pontifex, *preces, & sacrificia nostra Deo sistere* dicitur, i. e. commendare, vimque illi addere; quod profecto alienum sit, intelligere de ipso, & de hostia corporis eius, a sacerdote immolata: quae, si literis sacris fides est apud Romanos, non indiget aliqua commendatione & deprecatione. Enimvero eae
preces

preces & victimae sunt Christianorum omnium, non sacrificulorum modo, vt contextus plane declarat: quae profecto indigent commendatione ad dextram Dei sedentis Seruatoris nostri.

Haecenus nihil in scriptoribus trium priorum seculorum repertum, quod antiquitatem Romanae opinionis firmet; & restat vnus, qui ad testimonium dicendum producit, *Cyprianus*, cuius verba sunt speciosiora. Sed hunc quoque nihil statuiffe diuersum a superioribus, inprimisque *Tertulliano*, vel illud arguit, quod hunc magistrum suum vocat, cuius disciplinam diligenter sequatur. Itaque si quid amplius dicere videatur, quam in illius libris de sacrificiis Christianorum traditur, id, pro ingenio hominis Africani, dictum durius, sed lenius & e *Tertulliani* disciplina explicandum videtur. Et primus quidem locus a *Muratorio* propositus est ex Epistola LXIII. ad *Caecilium*, in qua primum, *Christus Deo Patri sacrificium obtulisse*, dicitur, idem quod *Melchisedecus*, i. e. panem & vinum, suum scilicet corpus & sanguinem: deinde, idem fieri in sui commemorationem, praecepisse: denique, sacerdotem vice Christi vere fungi, qui Christum imitetur, & sacrificium verum & plenum in Ecclesia offerre Deo Patri. Huic autem loco similia sunt cetera, in quibus Dominica sacrificia commemorantur, & sacrificium Christi (sermo autem est de S. Coena) & Domini-
cae hostiae (in S. Coena) veritas, & sacrificium pro

dormitione. In his vnum illud responsione indiget, quo *Christum* in Eucharistia Deo Patri sacrificium obtulisse dicit. Cetera, quae sacrificium ad sacerdotes referunt, expedit *Augustinus*, quem interpretem nemo Romanus repudiet. Eius sunt in Libro X. de Civit. D. & c. Faust. XX, 2. haec verba: *Quod ab omnibus appellatur sacrificium, signum est veri sacrificii.* Ita profecto se res habet. Quia Eucharistia habet ἀνάμνησιν Christi mortui, & sacrificii eius in cruce peracti, propter ea paullatim coepta est tota Eucharistia sacrificium dici: eius initium factum arbitror in Ecclesia Africana, fortasse per ipsum *Cyprianum*. Nam *Africani*, id quod nemo nescire potest, qui vel *Tertullianum*, vel *Cyprianum*, vel *Arnobium*, degustavit leuiter, tropos duos amant & allegorias, hyperbolas etiam, & insolentes loquendi modos: quos si nos, frigidiori sub coelo nati, nostra loquendi consuetudine aestimare vellemus, quid non interdum inde eruerе possemus. Sed forte omnino eloquentiae turgidiori, quae ista aetate, in Africa quidem maxime, sed etiam in Graecia valuit, ea res tribui potest. Consideret quis hunc locum *Chrysostomi* in Opere disertissimo de Sacerdotio, III, 4. ὅταν γὰρ ἴδῃς τὸν κύριον τεθυμένον, καὶ κείμενον, καὶ τὸν ἱερέα ἐφεστῶτα τῷ θύματι, καὶ ἐπενχόμενον, καὶ πάντας ἐκείνῳ τῷ τιμίῳ αἵματι θοοῖσι σομένους &c. An haec proprie omnia intelligi volumus? si κύριος τεθυμένος, καὶ

καὶ κείμενος & θῦμα ita accipi debet, vt volunt Romani: age etiam τὸ ἴδιον & Φοιτισθεὶς αἵματι, proprie accipiant. At si haec improprie dicta fateantur, illa quoque ita intelligenda concedant necesse est. Oratori hic loquebatur, vt saepe in isto libro, *Chrysostomus*. Quod si vero quis desiderat verum viri sensum cognoscere, ipsum audiat in sermone XVII. ad Epistolam *Pauli* ad Ebr. interpretantem perspicue, non oratorie differentem (p. 187. 2. ed. Sylb.) ὁ ἀρχιερεὺς ἡμῶν ἐκεῖνός ἐστιν, ὁ τὴν θυσίαν τὴν καθάρειαν ἡμᾶς προσεueγκών. ΕΚΕΙΝΗΝ ΠΡΟΣΨΕΡΟΜΕΝ ΚΑΙ ΝΥΝ, τὴν τότε προσεueχθῆσαν. τὴν ἀνάλωτον. τῷτο εἰς ἀνάμνησιν γίνεται τὸ τότε γενομένον. τῷτο γὰρ ποιῆτε, Φησὶν, εἰς ἐμὴν ἀνάμνησιν. ΟΥΚ ΑΛΛΗΝ ΘΥΣΙΑΝ, καθάπερ ὁ ἀρχιερεὺς, ΑΛΛΑ ΤΗΝ ΑΥΤΗΝ ΠΟΙΟΥΜΕΝ, μᾶλλον δὲ ΑΝΑΜΝΗΣΙΝ ἐργαζόμεθα ΤΗΣ ΘΥΣΙΑΣ. Ad hanc igitur normam verba Doctorum veteris Ecclesiae de sacrificio corporis & sanguinis Christi in S. Coena interpretabimur, si bonorum interpretum munere fungi velimus.

Sed de primis istis verbis videamus, quibus, *Christum* in Eucharistia Deo Patri sacrificium obtulisse, dicit *Cyprianus*. In eo autem sacrificium Christi non proprie dici, sic clarum fieri arbitror. *Cyprianus* non ignorabat, victimam viuam non immolari proprie, nisi caesa sit. Itaque nullo modo credere poterat, Christum a se proprie immolatum in Eucharisti-

charistia, cum adhuc viueret, sed potius existimabat, Eucharistiam a Christo celebratam fuisse figuram veri sacrificii mox futuri. Hoc est corpus meum inquit Christus, quod pro vobis, salute vestra, mox interficietur, i. e. immolabitur. Vt nostram Eucharistiam ἀνάμνησιν τῆς θυσίας γεγενημένης cum *Chrysostomo* statuebat, sic primam illam Christi, πρῶτη γινώσκω & προδῆλωται γενησομένης. Iniuriam faciunt sancto & erudito viro. qui eum aliter iudicasse, hoc est, nec sacrificii veri naturam tenuisse, nec verba Christi intellexisse contendunt. Quo ergo sensu dixit, *Christum sacrificium Deo Patri obtulisse*? Volebat convincere erroris grauis Aquarios, qui, vino e S. Coena sublato, aquam vsurpabant. Vtebatur solenni illa Melchisedeci comparatione cum Christo, & ostendere instituebat, eum Christi figuram etiam in hoc fuisse, quod panem & vinum *obtulerit*, (sic disertè dicit §. 2 extr.) et hinc colligi existimabat, vinum in S. Coena esse debere, cuius imago sacrificium Melchisedeci fuerit. Non dicam errasse *Cyprianum*, qui panem & vinum Regis interpretatus sit de sacrificio, & חוציא *extulit*, sc. ex vrbe sua, Abrahamo & militibus, commutarit in *obtulit*, sc. Deo. Illud dico, sacrificium Christi Eucharistiam vocasse, e consuetudine oblationum panis & vini in S. Coena, ob quas tota Eucharistia sacrificium appellata, neque ei in mentem venisse, corpus Christi

Christi proprie immolatum a Christo, aut immolari a sacerdotibus Clarum igitur est, *Muratorium* e trium primorum seculorum libris nullum idoneum testimonium protulisse, quo sententia Romana de sacrificio Eucharistico confirmaretur. E sequentibus seculis nil proferre lubuit *Muratorio*, quorum scriptores & saepius & crassius de illo sacrificio locuti sunt, & magis apte ad Romanae Ecclesiae sententiam, vt fatentur nostri quoque eruditi Theologi. Sed omnia illa dicta e *Chrysostomi* formula, ante proposita, intelligi debent, neque de iis quiquam dicere opus est.

Absoluta est de sacrificio disputatio: sed ad duo praeterea aliquid respondendum, quae in Muratoriana disputatione dicta sunt Impios vocat maiores nostros, per occasionem Cyprianici loci, qui aquam e S. Coena proscripserint: negatque ferendam temeritatem nostram, qui aut ignorantiae aut praeuaricationis accusamus primae Ecclesiae Patres, qui Dominicam hanc & Apostolicam traditionem vocent, vt aqua vino admisceatur. Maledicus est, qui nobis affingit iniurias istas in viros sanctos. Nemo eruditus nostrae formulae Theologus neget, veterissimam hanc consuetudinem fuisse, quae apud *Iustinum* memoretur: nec *Lutherus* dubitauit. Immo diu haesit dubius, vtrum aquae vsum relinqueret in Eucharistia, an tolleret. Ad extremum vini verbo stare, & merum vinum

num adhibere decreuit. Non hoc nomine impietatis accusandi sumus: nec ego exprobre-
 rem Romanis aquae vsum. Immo credo,
 Christum aquam admixtam vino dedisse Apo-
 stolis, & Apostolos idem fecisse, cum omni
 vetere Ecclesia: idque crederem, si nullum
 eius rei vestigium in libris Christianorum
 scriptorum superesset, sola hac verissima in-
 ductus caussa, quod nemo fere olim in Asia,
 aut Graecia, aut Africa, aut Italia, vinum bi-
 bit merum, sed semper aqua mixtum, & qui-
 dem ita, vt fere plus aquae esset, quam vini.
Ou Opeî τὰ τρία. Graecum est de vino non fa-
 tis bono aut generoso dictum, h. e. cuius
 vni sextario non terni sextarii aquae admisceri
 possent, salua saporis suauitate. In tempe-
 rantis hominis putabatur, merum bibere:
 quod est a Christo & Apostolis alienissimum.
 In vini ergo verbo veteres semper aquam ad-
 mistam intelligunt. Sed tamen recte fecisse
Lutherum in aquae vfu tollendo existimo:
 propterea, quod aqua in vino Eucharistico
 non aliam ob causam fuit, quam quod mos
 esset, vinum non aliter bibere, quod apud nos
 secus est, qui vinum sine aqua bibimus sine
 turpitudinis nota: neque vilo modo dubitari
 potest, quin, si his in terris Christus vixisset,
 & Eucharistiam instituisset, merum daturus
 fuerit. Itaque mihi semper ridiculus visus est
Wagstaffii, Bretti, aliorumque Britannorum co-
 natus, aquae vsum in Eucharistia reuocare
 tentantium, quem male abolitum ab verita-
 tis

tis Euangelicae inflauratoribus putabant, miratusque sum, eos non & hoc postulasse, ut accumbentes acciperemus corpus Dominicum: inprimis cum etiam frangi velint panem in Eucharistia *Caluini* sectatores: quia a Christo fractus est: quasi nesciremus, id non factum alicuius rei significandae causa, sed quia cultris in coenis non utebantur, ut nunc, Orientis populi.

In principio huius disputationis de sacrificio Eucharistico, mirifice se iactat *Muratorius* in eo, quod *I. F. Grabi*us, vir antiquitatis Ecclesiasticae peritissimus, agnouerit sacrificii antiquitatem, minimeque probauerit, id e Protestantium Ecclesiis per *Lutheri* & *Caluini* errorem esse sublatum, sed reuocari voluerit, in notis ad *Irenaei* IV, 32. in quam partem multos claros in Britannia Theologos procliuos fuisse satis constat, ut illo ipso loco tradit *Grabi*us. Sed non erat, quare tantopere gloriaretur hoc nomine *Muratorius*. Etenim longe aliud sacrificium est, quod Britannis placet: illud videlicet, quod est in panis & vini oblatione, cum laudibus diuinis & supplicationibus, quod in Liturgiis latinis frequentatur: incruentum sacrificium corporis & sanguinis Christi, cuius haec vis sit, ut Christus a sacerdote immoletur, nec agnoscunt, ut opinor, nec probant: quod, cum multis aliis rebus, discere potuisset ex eo, contra quem disputat, Ven. *Pfaffii* libro, si eum legisset:

legisset. Quamquam ne hac lectione quidem opus erat. Clarum enim est, nullum aliud a *Græco* sacrificium intelligi, quam de quo *Irenæus* dicat: quod quale sit, h. e. quam discrepans ab eo, quod defendit *Muratorius*, ante demonstratum est.

IV. *Adorationem Eucharistiæ Liturgiæ-
rum & Patrum Eccl. auctoritate non fir-
mati.*

Tam manifesta est nouitas Adorationis Eucharisticæ in Ecclesia Romana, ut praeclare est a TE, VIR VENERANDE, demonstratum, ab instituta panis & calicis post consecrationis formulam eleuatione, cuius nouitatem agnoscit ipse *Muratorius*, agnoscique ab omnibus eruditis Catholicis p. 227. adfirmat, in vectorque transubstantiationis commento orta, ut mirum videri possit, *Muratorium* eius antiquitatem defendere tentasse. Sed quid ille non tentauerit, qui, ut ante multis exemplis vidimus, mira felicitate an impudentia, quicquid vellet, ubique reperire potuit. Vfus autem est in aditu demonstrationis cauta aliqua & callida praemunitio. *Ut etiam pusillis sati fiat* p. 228. med (quos pusillos vocet, & quomodo, non satis latine scio, ut assequi possim) *animaduerti vult.* quidnam? haud dubie aliquid eiusmodi, quo perspicua res fiat, e quo, tanquam e principio, tota demonstratio ducatur? Quid ergo?

ergo? *mirum esse, qui ab hominibus non incruditis ob adorationem C. & S. Domini in Missa ad eorum eleuationem lis moueatur.* Sane qui hoc animaduertat ac teneat, is facile capiet demonstrationem subiectam, eiusque vim sentiet. Iam proponitur res demonstranda: Quamvis noua sit eleuatio, tamen adorationem non esse nouam, sed semper vsitatam fuisse. Adorationis autem nomine intelligi animi submissi obsequium, quod Deo praestetur: quod vt ipsum sufficiat Deum adoranti, tamen etiam gestibus corporis declarari posse, vt genubus flectendis, procumbendo in genua, etiam sola capitis inclinatione: eosque semper inter homines viguisse. Sed qui gestus maxime sit usurpandus, Ecclesiam praescribere posse. Haec vere disputantur. Sed quorsum? quid id ad propositam causam? Nempe ut, quia adorationis verbum raro in Liturgiis occurrit, omnibus locis vti possit vbi inclinatum caput, aut genuum flexio commemoretur, quae loca ille omnia pro admirabili sua interpretandi solertia, qua e quolibet eruere potest quidlibet ad adorationem eam, quae nunc valet in Ecclesia Romana, ultimae antiquitati adserendam conferet. Sed nihil proderit homini ista philosophandi calliditas, praesertim cum ea iam usu crebro patefacta & abiecta sit. Et cum *Muratorio* visum sit, demonstrationi Liturgicae praemittere talem philosophiam; nobis quoque aliquid uniuersae dicendum videtur.

Adorationem, & προσκύνησιν, & similis potestatis verba in Liturgiis & Ecclesiasticorum scriptorum libris de Eucharistia occurrere, de eo nunquam dubitatio aut disputatio fuit apud intelligentes. Itaque si quis nihil aliud, quam verba ista in re Eucharistica usurpata olim, exemplis ostendat, ut dudum *Bellarminus*, *Perronius* alique fecere, operam perdit & famam doctrinae. Nam verba illa non necessario aut semper pertinent ad honorem eum, qui diuinæ naturæ debetur, sed cuiuscunque honoris ac reuerentiae significationem possunt habere, ut etiam pueri norunt. Atque etiam satis constat, orientales gentes procliuius fuisse occidentalibus ad procumbendum in terram, etiam in humanis honoribus, eamque consuetudinem nunc quoque in multis nationibus vigere. Itaque ipso fatente *Bossueto*, p. 234. callidissimo isto Liturgiae Romanae defensore, & *Muratorio*, adorationes factae in Eucharistia ante consecrationem, cum panis & vinum, & vasa adferrentur. Nam quod hic inter adorare & venerari discrimen facit, id est ab antiqua Latinitate alienum, quae venerari libenter de Deorum honore usurpat. Neque vero quisquam nostrum intercedat, si in accipiendo pane & vino, h. e. corpore & sanguine Christi, quis adoret, ita scilicet, ut, cum preces ac supplicationes solennes facimus, h. e. non propter panem in corpus conuersum, aut necessario, (nam Christi quidem discipuli, cum e Christi maioribus

nibus acceptum panem ederent, non adorarunt sed reuerentia in Deum & Iesum Christum Seruatorem, cuius corpus sumitur, idque etiam si, vt *Calvinus* voluit, corpus Christi verum non sumeretur, tamen recte fieret fierique potest in omni Dei cogitatione, sed, vt dixi, non necessario. Etenim si ob praesentem Deum & Christum procumbendum est necessario, semper in terra prostrati iacebimus, cum semper adsit, simusque in conspectu eius Nihil horum aut quaeritur, aut in dubitationem adducitur. Sed an adoratio ea, quae Deo propria est, quam solam Theologi in arte sua ac disputationibus intelligunt, fieri possit, ac debeat, vel in Eucharistia, cum nondum accipias, vt verbis sacrificuli, *hoc est corpus meum*, velut fulmine prostrernare, tanquam ille panis nunc esset repente Deus adorandus, aut extra Eucharistiam cum panis, super quem ista verba pronunciata sunt, conspiciatur uspiam, ea quaestio est, hoc disputatur inter Theologos: an talem adorationem vetus Ecclesia usurparit, probarit, hoc nunc disputandum erat, hoc quae indicarent clare, loca p. oferenda erant. Talia an sint Muratoriana, iam videbimus.

Atque initio quidem in Liturgiis suspiciones ferit quasdam ex eo, quod nullum ex antiquis Sacramentariis habere nos dicit, in quorubricae, seu ritus omnis legantur, in Missa olim usurpati: unde multum lucis ad dignoscendam antiquiorum adorationem in Eucharistia deductum sit. Vult enim homines suspicari, ad

orationem tamen factam, etsi in Liturgiis non clare commemoretur. Cui rei nos silentium *Iustini Martyris* opponimus, qui omnes ritus Eucharisticos narrat, etiam surgendi consuetudinem in precibus Eucharisticis, nec ullo modo taciturus erat adorationem, si tum usitata esset. Sed tamen satis perspicuum huius ritus vestigium superesse ait. Id impresum videt in utroque *Ordine Romano*, post alios a *Mabillonio* edito, in quorum altero (*) *Pontifex vel Diaconus inclinato capite salutare sancta dicitur.* (in *Mus. Ital. T. II. p. 8. med.*) adorare autem in altero (ibid. p. 43) unde sumit ac repetiit *Amalartus* in *Ecloga* ad h. l. a *Baluzio* in *Append. Capitularium* & *Mabillonio* l. c. editus. Enimuero quam non bene discernat rerum vestigia diuersarum plane demonstrabimus, & totum hoc Liturgicum argumentum dissoluemus. *Sancta* in utroque loco esse Eucharistiam, quod sumit *Muratorius*, demonstranti *Mabillonio*, *Commentar. in Ord. Rom. p. XXXVI.* facile concesserim, h. e. panem *εὐχαριστήτα*, ut *Iustinus* vocat, sive consecratum antea, in superiori Eucharistia, nec consumtum in distributione, sed residuum: eaque res ipsa nobis in vltima huius disputationis parte plurimam aduersus *Muratorium* proderit. Nam & vsus loquendi Graecorum, vnde Latini duxere,

(*) *Primum* vocat *Muratorius* apud *Cassandrum*, *Historpium* & *Mabillonium*. Sed est primus modo apud hunc: apud illos est secundus, & primus contra, qui est apud *Mabillonium* secundus

xere, & loca, in quibus id verbum reperitur, factis euidenter rem arguunt. Sed adorandi verbum hic non habere eam vim, quam disputatio praefens desiderat, clarissimum est. Nam in loco altero, qui est huic par, in *Ordine Primo*, synonymum ei ponitur *salutare*: quod verbum esse quidem honoris habendi, sed non necessario diuini, permultis eiusdem ordinis locis patet. Nam & altaris latera salutant Diaconi (p. 8.) & Pontifex salutatur altare, cum ad id ascendit ad accipiendas oblationes (p. 11. extr.) quod insanus sit, qui de adoratione, quam Theologi dicunt, capiat, & *salutatur Pontifex*, *Ord. R. III*, p. 54. 55. Itaque etiam in Cruce adorare & salutare permutantur (p. 23. & alibi) Tum honos habetur & reuerentia quaedam pani, qui ex superiori *εὐχαριστία* aliquid sanctitatis habere videtur. Omnia autem sancta quocunque modo, salutantur & adorantur inclinato capite. vt ex omnibus Ordinibus patet, ipse etiam Pontifex, vt statim docebitur. Nec prodest *Muratorio*, quod haec *Sancta* etiam vocantur corpus Domini (p. 26.) quod si ille vidisset, in capite ultimo, commemorare non neglexisset: retinent enim nominis honorem ex pristina consecratione. Atque etiam modus illius adorationis ita clare exprimitur, vt dubitare non liceat, salutationem fuisse, qualem tribuere etiam homines hominibus solent, velut nos sacerdoti, e cuius manu accipimus panem vinumque in S. Eucha-

ristia. Pontifex inclinato capite adorât vel salutât Sancta. Ipse Muratorius pro documento adorationis per totum Canonis tempus durantis affert verba eiusdem Ordinis primi Mabilloniani, quibus Episcopi, Presbyteri, Diaconi, & Subdiaconi *inclinati* dicuntur *permanere*, durante anone, in Missa Pontificali p. 48. Enim vero ista capitis inclinatio in Liturgia est nihil nisi honos reuerentiam quamcunque demonstrans vt multis Ordinum locis patet. Nam, vt ante dixi, Prior scholae se inclinat Pontifici: (p. 9.) Quartus scholae dicit inclinato capite ad priorem scholae, vel secundum, sive tertium: Domini iubete: (p. 55.) Pontifex veniens in tribunal Ecclesiae inclinat caput contra altare, quo tempore nondum ibi sunt Sancta? Et talia sunt in Ordinum libellis permulta, quae pudorem incutere debent iis, qui ex locis ante prolatis cum Muratorio exsculpere adorationem propriam velint. Atque etiam hoc aueam scire, quare solus Pontifex, vel Diaconus adoret, nusquam in rituum Eucharisticorum, qui in his Ordinibus exponuntur, enumeratione populus? At hoc ipsum erat, quod quaerebatur, an adoratio talis religiosa fuerit consecrati panis & vini, qualis nunc in Eucharistia Romana usurpatur, vt ad verba, hoc est corpus meum, omnes procumberent. Cum porro in Or. II. p. 48. ubi, quid Pontifex & Presbyteri & Diaconi faciant per Canonem, distincte traditur, nemo quisquam ad illa verba prosterni dicitur: nisi

nisi quod, stante pontifice consecrante, ceteri Ecclesiastici ordinis homines omnes sunt inclinati inde, a principio precum oblationis.

At in Græcis Liturgiis, nominatim ea, quae *Chrysostomo* tribuitur, etiam populo προσκύνῃσι clare tribuitur, facta consecratione, ostensoque populo pane consecrato, firmante etiam *Anastasio Sinaitae* narratione in Orat. de Sancta Synaxi, (ap. *Canisium* T. I.) Sed & *Rennaldorius*, qui tanta cura rem Liturgicam tractavit, & *Mitatorius* parum diligenter illum locum considerarunt, nec cum uniuersa Liturgiae Orientalis ratione contulere: quod si fecissent, haud dubie intellexissent, τὸ προσκυνεῖν non pertinere proprie ad panem & vinum consecratum. Age igitur rationem προσκυνήσεως in Liturgia Orientali paucis exponamus. Ut omnis cultus diuinus, & priuatus, & vero etiam in primis publicus duabus rebus continetur, quarum prima & summa est in laudibus diuinis, & memoria beneficiorum diuinorum, in primis eorum, quae per Christum data sunt, cum gratiarum actionibus celebranda, altera in precibus & supplicationibus pro nobis & aliis: ita Liturgia Eucharistica, in quam apud veteres omnis prope cultus Dei publicus conclusus erat, haec duo habet. Iam in parte priori, quae est laeta & hilaris, stant Christiani erecto vultu, e Liturgiae Orientalis formula: in parte altera, quae debet habere submissionem animi, tristitiam e peccatorum &

indignitatis conscientia προσκυνῶσι, inclinanteque capita. Hoc iam testimoniis confirmabimus. In Liturgia S. Basilii Græca p. 65. in principio oblationis (προσκομιδῆς) quæ est in laudibus diuinis, Diaconus iubet Christianos sedentes surgere: οἱ καθήμενοι ἀναστῆτε: quod fit eodem loco in Liturgia Gregorii p. 100. Atque ita stant per totum consecrationis Canonem, usque ad verba populi, σὲ ἀινῶμεν, σὲ εὐλογῶμεν, in utraque Liturgia. Tum Diaconus (p. 68. 100.) proclamat: κλῖνατε Θεῷ μετὰ φόβου: quod idem est cum τῷ προσκυνεῖν: sicut ante *inclinare capita*, idem faciebat *Muratorius* cum verbo adorandi. Enimvero hic nondum e mente Orientalium adest corpus & sanguis Christi. Quorsum igitur iubentur adorare? Quia incipiunt hic preces sacerdotis, primo pro panis & vini ἁγιασμῷ, deinde pro κοινωνήσασιν, & denique pro omnibus uiuis & mortuis: καὶ δέομεθα καὶ παρακαλῆμέν σε, pergit sacerdos. Diaconus etiam postea iubet τὰς κεφαλὰς κλῖναι (p. 77.) & sequitur deprecationis, item eodem modo (p. 79. & 85. 105. 119.) Atque ita plane est in Liturgia Chrysostomi, Sacerdos, Diaconus προσκυνῶσιν, & similiter totus Christianorum coetus. Quare autem? ob deprecationis submissionem: λέγοντες μυστικῶς τρεῖς, ὁ Θεὸς ἰλασθῆτί μοι ἁμαρτωλῶ. Ergo Deum adorant, submisisse deprecantes peccatorum veniam. His autem dictis surgunt, & Diaconus non proclamat κλῖνατε, cum vult
facere

facere ὕψωτον ἁγίαν sed προσχῶμεν attendamus. Et tamen ex his verbis efficere volunt misera-
biles interpretes, hostiam consecratam eleua-
tamque adorari solitam fuisse in Ecclesia
Graeca, solo verbo nixi, omnium aliarum re-
rum, quae in legitima interpretatione spectari
debent, negligentissimi atque securi. Non
igitur hoc dubitationis oppono, quod nolebat
Renaldotius p. 266. quod antiquiores libri non
habeant, quae in recentioribus reperiantur.
Habeant per me omnes. Verba ipsa aliud so-
nare, quam quam isti volunt, doceo

Est autem simillima ratio eorum. quae e
Liturgiis Syrorum & Coptorum proferuntur.
Renaldotius, ceteris paullo diligentior in hac
etiam parte, qui etiam reprehendit gregales
suos, qui omnem inclinationem caputum aut
προσκύσιν ad adorationem hostiae referant,
in utraque de hac re disputatione T. I, p. 269.
& T. II. p. 214. is igitur nullum in ipsis Litur-
giis antiquis repertum locum proposuit, e quo
adoratio intelligeretur: sed aliorum de ritibus
scriptorum testimoniis usus est, de quibus sta-
tim videbimus. At multo oculatior fuit *Mu-
ratorius*. Nam e Liturgia Syrorum ea, quae
Gregorio tribuitur, profert locum eam, ubi
post consecrationem Diaconus clamat: *Ad-
orate Agnum Verbum &c.* & addit: nil referre
vtrum statim ab consecratione i. e. verbis
hoc est corpus meum) adoratio fiat, vt a Roma-
nis, an ante κοινωνίαν, vt apud Graecos: satis
I 5 esse,

esse, adorationem usurpatam fuisse. Primum multum interest ad quaestionem eam, quam supra posuimus: deinde quis neget, adorandum esse I. C. cuius corpus & sanguis sumitur? Immo omni tempore, est adorandus pia mente, nedum eo tempore, quo tam arcte nobiscum coniungitur. Sed ipse sensisse videtur imbecillitatem huius testimonii. Itaque se repente a Liturgiis transfert ad scriptorum Ecclesiasticorum auxilia, quibus & ante, in hac ipsa disputatione, usus erat.

Sed horum scriptorum, qui & ab *Muratorio* & a *Renaldotio* testimonii causa commemorantur, non eadem ratio est. Quidam sunt antiquiores, sed ita, ut inferiores tertio quartoque seculo sint omnes, quidam valde recentes, e seculis multa iam barbarie & superstitione inquinatis, & mole caerimoniarum novarum oppressis. Iam, qui ex his consuetudinem antiquae & incorruptae Ecclesiae cognoscere velit, is idem faciat, ac si e *Cerimoniali Constantini*, quod nuper in hac urbe editum est, discere velit ritus aulae Romanae, qui sub *Augusto* ac *Tiberio* fuere. Tales autem sunt *Renaldotiani* omnes, & e *Muratorianis*, *Theodorus Studites*, *S. Maximus*, *Pseudo Dionysii* Scholiastes, *Lucas Junior*, homines, etiam si planissime dicant, quod iubentur, nullo modo audiendi. Sed nec hi, nec locupletiores, *Ambrosius*, *Augustinus*, *Theodoreus*, *Cyrillus*, & *Renaldotio* & *Muratorio* pariter commemorati, dicunt, quod caus-

caussidicus volebat & sperabat. Adorari in S. Eucharistia Christum & corpus eius dicunt, sive, vt diserte *Cyrillus*, a prout, *inclinatis adorationis in modum, summa cum reuerentia & veneratione*, vt *Hieronymus* ait, sumi. Nam vt, quemadmodum *Renaldotius* bene docet, *προκλίσις*, inclinatio capitis & corporis, quae est adoratio visibilis & corporea, fit etiam ad suscipiendam benedictionem sacerdotis. (T. II p. 213. extr.) sic haec adoratio & veneratio pertinet ad suscipiendum ore corpus & sanguinem Christi, & benedictionem adeo diuinam. Atque *Chrysostomus*, cuius ipsius locus profertur ex sermonibus in Epistolam Pauli primam ad Corinthios (p. 537. 538.) nihil aliud postulat, nisi vt summa cum *εὐλαβείᾳ* ad corpus Christi edendum accedamus, ne temere vescentes iram Dei prouocemus. Quid hoc, quod nos quoque postulamus, commune habet cum illa Romana hostiae adoratione?

V. *Castigationes Disputationis de Ritibus Eucharisticis quibusdam. C. XX. XXI.*

Profligatae sunt maximae & grauissimae Disputationis nostrae aduersus *Maraterium* partes. In quibus si nobis, vt speramus, res non infeliciter cessit: multo minus, in his veluti reliquiis, conatus noster irritus est futurus. Primum autem dicendum est de *Confessione Peccatorum*, quam Romani etiam Angelis & ceteris Coelitibus fieri volunt. Nam hanc quoque

quoque e Liturgiis tentat *Muratorius* aduersus eos defendere, qui soli Deo eam confessionem deberi, & in vetere Ecclesia fieri solitam, contendunt. *Bingamus* in Orig Eccl. XV, 1. Gallicani Officii Confessionem vetustam attulerat. qua ostenderet eam olim ad Deum solum pertinuisse. Noster ad hoc nihil: ceterum se repente confert ad rubricas illas, quibus etiam in superiori disputatione usus fuerat, eaeque cum desiderentur in exemplaribus antiquis Liturgiarum, negat sciri posse, quibus verbis in aliis Ecclesiis Confessio facta sit. In quo mihi venit in mentem illud *Ciceronis* aduersus *Gratum*, in defensione *Archiae*: *Est ridiculum, ad ea, quae habemus, nihil dicere: quaerere, quae habere non possumus.* Habet disertum antiquae Confessionis exemplum, quae soli Deo facta sit: ad id nihil dicit: in aliis Ecclesiis quid factitatum sit, ob rubricarum defectum negat sciri. Quid desideras, quae non sunt, & non potius uteris oblati? Non credibile est, si in Gallicana Ecclesia, quae est veterrima, soli Deo confessio facta est, in ceteris quoque eandem consuetudinem fuisse? Quid dixisset *Muratorius*, si quis ad vnum illud e Liturgiis exemplum, quo Adorationem Eucharisticam firmare tentabat, nihil aliud respondisset, nisi hoc vnum: non possumus ob rubricarum defectum scire, quid in aliis Ecclesiis fieri fuerit? Mirabiles sunt homines: ut quidque commodum est, ita

ita dicunt. *Renaldotius* negat aequum esse, aduersarios Ecclesiae Romanae repudiare ritus eius Eucharisticos, nominatim adorationem hostiae, ob rubricarum in antiquioribus exemplaribus defectum: hic confessionem coelitibus in Eucharistia factam credibile putat, ob eundem defectum. Sed quid opus rubricis? *Satis est, nihil esse in ista Confessione, quod cum disciplina Ecclesiae Rom. non conueniat.* Quomodo? Quia est in illa disciplina locus de Sanctorum Inuocatione. Enimvero in hoc erroris gravis arguitur Ecclesia Romana. Arguatur vero: *Legitimis rationibus, & consensu Ecclesiae praesentis niti, infra demonstrabimus.* De eo igitur videbimus illo in loco. Sed vide mihi lepidam & callidam diuisionem confessionis: sentit enim homo non obtusus, durum & absurdum esse, homines hominibus mortuis confiteri peccata: *Aliter Deo confitemur, inquit, aliter Sanctis: illi, ut parcat, his, ut pro nobis orent.* Quasi constet, confessionis nostrae scientiam ad Sanctos in coelo peruenire. Atque etiam praesert formulam confessionis ex *Hittorpii & Morini* collectis ex qua fit confessio Deo Patri, Jesu C. & Spiritui Sancto, *coram S. S. Angelis & coram omnibus Sanctis.* Miror hoc vnum exemplum prolatum esse, idque eiusmodi, cui facile reponi possit hoc: aliud esse coram Sanctis & Angelis confiteri, quod etiam *Paulus* fecit, aliud Angelis & Sanctis: cum & plura sint & magis speciosa, in

in Libellis Poenitentialibus, veluti iis, qui *Morini* operi de Poenitentiae Sacramento subiecti, aut in *Canisii* Lectionibus (T. II. P. II.) editi sunt: in quibus etiam reperitur formula confitentis (ap. *Morin* p. 176.) *Deo & Sanctis suis*: item alia confitentis *coram Deo S. Christo & Sanctis*: ibid. a. p. 13. a Sed ne sic quidem aliquid profecisset *Muratorius*. Nam & antiquitas libellorum istorum in dubitationem vocatur a doctis hominibus, vt *Morinianorum* a *Basnagio* (in praef. ad *Halitgarii* libellum Poen. T. II. Lect. *Canis. P. II*) & posterior aetas paullo aliter confessionem peccatorum dixit, quam antiqua: quae hebraicae consuetudinis tenax, pro deprecatione, veniae impetrandae causa, dixit. Nam verbum *התחנן* vt gratiarum actionem significat in commemoratione beneficiorum, sic deprecationem veniae habet, cum peccatorum mentio adiuncta est. Ex quo Graeci dicunt *προσδεξασθαι τὸν ἐξομολογούμενον*, pro veniam dare deprecanti, vt in libello Poenitentiali *Ioannis Ieiunatoris*; si quidem auctor est, p. 77: apud eundem *Morinum*. Et de tali confessione quaeritur in hac disputatione: eaque est antiqua vis verbi, ea confessio ad vnum Deum pertinet. At posterior & recentior aetas dixit etiam confiteri peccata iis, quibus testibus & in quorum conspectu, vel praesentia, deprecatio fieret, vnde & *coram altari, & reliquijs Sanctorum* in libellis istis, confitentes indu-

inducuntur, non minus inepte, quam coram coelitibus.

Alter ritus, cuius defensio fuscipitur, est vſus candelarum inter Euchariftiam: quem etiam *Brunus*, propter *Hieronymi* auctoritatem, negantis clara luce in ſacris Chriſtianorum accendi lumina, inferiorem aetate *Hieronymi* putabat, niſi cum Euangelium legeretur, in quo omnis Orientis Eccleſias luminibus accenſis vſas, ad laetitiam ſignificandam, idem *Hieronymus* auctor eſt. Non eſt nobis conſilium, eam controuerſiam tractare copioſius. Neque enim nos vſum candelarum, vel in S. Euchariftia, vel in ſacris publicis, per dies Dominicos & feſtos, repudiamus. Illud exiſtimamus non ſatis verum eſſe quod *Maratorius* in hac diſputatione ait: *ſine luminibus preſecto peracta non fuit poſtrema Saluatoris coena*: quamquam vulgo noſtris hominibus idem videtur, qui hanc pueris rationem reddere candelarum ardentium in Euchariftia ſolent. Homines antiquorum coenas noſtris moribus aeſtimant. At apud veteres in coenis nulla lumina, niſi in tempeſtiuis. Nam coenae aliquantum ante ſolis occaſum factae, inprimisque Paſchales tota amplius hora ante ſolis occaſum agitatae: vnde plus ſatis temporis, duae ſaltem. vt opinor, noſtri moduli horae, ad comedendum Paſchalem agnum, antequam luminibus opus eſſet. Immo aut memoriae antiquae vſurpandae cauſſa
lumi-

lumina adhiberi coepta, quod primis temporibus, saeuientibus in Christianos tyrannis, per noctis tenebras & silentium conuentus facti Christianorum, & Eucharistia ad lumina celebrata, vel laetitiae causa, quam & nunc luminibus accensis testari mos est. Quorum vtrumlibet teneas, nihil habent lumina in Eucharistia accensa, quo prudentis animus offendatur.

Sequitur *Oblatio*, quam a *Luthero* abolitam, & abominationis verbo infamatam, adeo indignatur, vt superbiam & furorem, & impotentiam, & temeritatem, & omnia, ei exprobet. Haec tanta mala omnia comprimī posse putat, vnius *Clementis Romani* testimonio, qui quae dixerit, ea vt ab ipsis Apostolis profecta, probanda esse. Quid ergo est in *Clementis* testimonio? Omnia *Clemens* ait (in Epist. I. p. m. 52. : eo ordine agenda esse, quem praescripserit Dominus, & προσηράς καὶ λειτουργίας ἐπιτελεῖσθαι oportere, quo ordine & quo tempore iusserit. Quae sunt istae προσφοραὶ καὶ λειτουργίαι? Noli somniare, inquit, esse dona pauperum. Nemo nostrum hoc somniat. Neque enim nos ita felices sumus, vt ea, quae velimus, somniemus. *Muratorii* & gregalium ista felicitas est. Optimum putamus, interpretem audire *Clementem* ipsum, qui paullo post, ἕκαστος ὑμῶν, inquit, ἀδελφοί, ἐν τῷ ἰδίῳ τάγματι εὐχαρισεῖτω θεῷ, ἐν ἀγαθῇ συνειδήσει ὑπάρχων, μὴ παρεκβαίνειν τὸν ἰσμένον τῇ λειτουργίᾳ αὐτῆς

αὐτῇ κανόνα &c. Ex quibus verbis clarum est, προσφοράς καὶ λειτουργίας esse τὰς εὐχαριστίας, laudes Dei cum gratiarum actione, quas tropice προσφοράς appellat, quia cum Iudaicorum sacerdotum munere comparat munus antistiti-
 tum Christianorum, non sacrificia propria, cum & laicis λειτουργίαν, sed diuerso κανόνι, h. e. fini-
 bus diuersis, tribuat Sed si maxime προσφο-
 ραὶ essent de S. Coena accipiendae, nihil pro-
 fecto lucraretur *Muratorius*. Itaque lubentes
 volentesque largimur, in ceteris locis, quae
 proferuntur, in Canonibus iis, qui Apostolici di-
 cuntur, & Conc. Nic. I. Can. 18. & Conc Arelat.
 Can. 15. oblationis & offerendi verba dici de S.
 Coena. Etenim tota Eucharistia ab illa parte,
 quae ad oblationes panis & vini pertinebat,
 quae erat magna istius sacri in vetere Ecclesia,
 vt e Liturgiis patet, pars, nomen accepit, vt
 a laudum diuinarum celebrandarum, & gratia-
 rum agendarum sollemnitate Eucharistia dicta
 est. Neque vero est, quod tantopere irasca-
 tur *Luthero*, ob sublatam ex Eucharistia oblatio-
 nem. Nam priscae illae & propriae προσφο-
 ραὶ, quae & προσκομιδαὶ vocantur, ab afferen-
 do, hae ergo προσφοράὶ piorum dudum usu
 abolitae erant: quae improprie & falso dice-
 batur oblatio ipsius Christi corporis & sangui-
 nis, pro peccatis quotidianis viuorum, & prae-
 teritis mortuorum, eam quomodo non tollen-
 dam putaret, quam aduersam sacris litteris, ab-
 K hor-

horrentem ab antiquitatis integrae usu, & impietatis, securitatis improbae, & licentiae peccandi matrem ac nutricem cognoverat?

Aequior nobis est in controversia ea, quae pertinet ad genus linguae, quod in Liturgia adhibetur. Non improbat vernaculae usum, nec rationes, quibus inducti maiores nostri eam in Liturgiam receperint: sed eum iudicii inopem iudicat, qui in consuetudinem Romanae Ecclesiae invehatur, servantis linguam veterem. In quo mirabilibus rationibus utitur. Maiestatem, ait, conciliari sacris a latina lingua, in qua instituta fuerint. Praeclaram maiestatem, quae est sine sensu & intelligentia! Hac Deum delectari credibile est, qui solos animi motus ab bene intellectis rebus diuinis natos spectat? Immo nulla sacris maiestas est vera & Deo digna, nisi e diuinae maiestatis & beneficiorum diuinorum magnitudine intellecta & plane cognita: quaecunque aliis rebus sensibilibus mouetur, puerilis est, & a sanctitate Christianorum sacrorum abhorrens. Atque etiam falsum esse patet, in lingua latina instituta esse sacra Eucharistica: & si maiestas vera accedere potest Eucharistiae e linguae eius usu, in qua instituta est, Syriaca vtendum erit, qua Christus usus est, aut Graeca: in qua etiam Romae ab initio Eucharistiam agitatum esse, cum aliis rebus minime dubiis doceri potest, tum, quod graece Christianis, qui Romae es-

sent, non latine scripsit Paulus. At versionibus vernaculis vti, per indulgentiam Ecclesiae, possunt imperiti latinae linguae. Audio: sed quorsum istas ambages? quae & ipsae habent incommodi plurimum, praesertim apud plebem, quae comparare latina cum vernaculis nescit.

Bingamus instituerat facere in Origg. Eccl. XV. 3. 25. quod, vt supra diximus, pluribus fecerat ante *Blondellus*, vt ex ipso Missae Canone ostenderet, veteres a μεταμορφώσεως opinione alienos fuisse, & quidem e. c. ex eo, quod post consecrationem Deus rogatur, vt dona oblata propitius accipiat, vt quondam munera *Abelis*, *Abrabae*, *Melchisedeci*: unde clarum est id, quod nos quoque ante docuimus, post consecrationis formulam tamen adhuc panem & vinum superesse, propterea, quod istae preces in sacrificium C. & S. C. nullo modo convenient, cui nec *donorum* verbum, nec comparatio cum humanis sacrificiis apta sit: item vt haec dona per manus S. Angeli perferantur in conspectum *Piuiinae maiestatis*: cum Christus sedeat iam in coelis ad dextram Dei: denique quod Deus dicitur per Christum omnia illa bona (eadem autem sunt, quae ante dona) semper creare, sanctificare, benedicere &c. ex quo nos quoque supra demonstrauius, consequens esse in μεταμορφώσεως opinione, vt corpus & sanguis Christi semper per Christum a Deo creetur

K 2

in,

In his diluendis partim protrita dudum affert *Muratorius*, partim mirabiliter se implicat ipse. Dona & data primum, ait, (p. 125.) esse victimam coelestem, corpus & sanguinem Christi, quod in iis sit incomparabile beneficium: mox dona (i. e. panem & vinum) in rem divinam conuersa: ad extremum, vota & preces offerentium C. & S. C. p. 252. de quibus etiam intelligenda esse loca reliqua: non victimam corporis & sanguinis Christi cum sacrificiis Abelis, Abrahæ, comparari, sed vota & preces Christianorum, cum precibus illorum; has perferri ab Angelis in aram coelestem: denique per *bona*, quae Deus per Christum creet, sanctificet &c. esse intelligenda beneficia Dei, vt fructus terrae, aut panem & vinum, per quae Eucharistia conficiatur. Sola commemoratio rerum tam repugnantium, & pro libidine confictarum, refutationis vim habet: praesertim lectis iis, quae capite tertio disputata sunt. A principio totius Liturgiae dona sunt panis & vinum, & nunc repente, quia ita lubet *Muratorio*, sicut e carne piscis, cum placet istis rerum arbitris, ex iis fit corpus & sanguis Christi, & cum aliter videtur, votum & supplicatio, & rursus vbi satis profuere, alimenta humana, quae ab initio fuerant. Nullus Vertumnus tam varias figuras sumit, quam huic verbo imponuntur. Non, si non statutum esset, quauis ratione malam causam de-

fen-

fendere, nec plane perfricta esset frons, fateri
 necesse esset, haec dona post consecrationem
 esse eadem, quae ante toties *haec dona* dicta
 erant: haec ascendere ad Deum cum precibus
 & gratiarum actionibus, vt illius Centurionis
Cornelii eleemosynae & preces ascenderant ad
 Deum, vt preces suas *Dauides* velut nidorem
 victimarum ascendere cupiebat: denique haec
 bona esse eadem illa dona a piis oblata, quae
 sunt prius bona Dei (Psalm. L. 10. sqq.) quam
 fiant dona fidelium, quibus Deus, quamquam
 ipsius ante fuerant, tamen delectatur. Haec
 sunt plana, haec unicuique primum totam Li-
 turgiam uno tenore legenti, & a praeiudicatis
 opinionibus integro, nec afferenti secum iam
 & certo, quid in verbis esse velit, sed verum
 sensum e natura verborum, & structura oratio-
 nis indaganti, in mentem veniant necesse est.

Illa etiam bella ratio est, propter quam
 existimari posse negat, Ecclesiam optare, vt
 proprie Christi corpus de altari in coelum per
 angelos ieratur. *Hoc sine miraculo, eoque pe-*
renni, inquit, fieri nequit, & quotidie cernuntur
coelestia dona ex altari terreno non dimoueri.
 Verissime. Sed quis ista dicit? Nempe is,
 qui nos non audit, cum negamus, panem &
 vinum in corpus & sanguinem Christi conuer-
 ti, sublata priori substantia, quod *id sine mira-*
culo, eoque perenni fieri nequeat, & quotidie cer-
namus

namus, panem, & vinum non tolli, sed permanere.
Hoc non iniquum, [non impudens videatur?
Par iniquitas est in eo, quod, vt vidimus statim,
ipse verba Canonis tropice interpretatur,
cum autem nos pariter oblationis, & sacrificii,
& cetera¹ similia verba tropice interpretanda dicimus, in eoque sequimur consuetudinem loquendi sacrorum librorum, & veterum Ecclesiae Doctorum, manibus pedibusque repugnat. Sed hoc est commune vitium omnium, qui nihil minus in docendo ac disputando spectant, quam constantiam, nec certis ac perpetuis rationibus reguntur, sed casu & temere feruntur, quo libido impellit. Itaque quod hodie rectum, verum, aptum, certum, perspicuum est, cum ipsorum opinionibus defendendis prodest, idem, cras, immo eadem die, altera statim hora, pravum, falsum, alienum, dubium & obscurum est, cum obest. Cuius generis multa exempla commemorare possem, si hic locus esset. Sed nobis cum *Muratorio* iam res est, a cuius doctrina celebrata talis inconstantia valde est aliena.

VI. *Supplicationes Coelitibus in Ecclesia Romana, & pro mortuis fieri solitas recte in Augustanae Professionis Formula repudiari, nec firmari antiquis Liturgiæ formulis.*

Quoniam Liturgiæ Eucharisticae pars est commemoratio mortuorum, primum eorum, quos *Sanctos* vocant vulgo, deinde horum, qui *fideles*, famuli ac servi Dei, appellantur: hoc quoque sibi negotii fumsit in hac Disputatione *Muratori*, vt & Liturgiam aduersus *Binghamum*, eiusque interpretationes & reprehensiones, & consuetudinem Ecclesiae Romanae vniuersam vel supplicandi Sanctis, vel precum faciendarum pro mortuis, aduersus Augustanae Professionis placita explicando confirmandoque defenderet. Quem locum etsi molli articulo tractat, omni modo moderans rem, ne quid offensionis habeat: tamen ne sic quidem aliquid proficit, multisque nominibus nobis reprehendendus videtur. Sed quoniam in hac disputationis parte quaedam sunt, ad *Binghamum* proprie pertinentia in eo, quod Liturgiæ rationem non satis accurate perspexisse videtur, ea, quoniam consilium nostrum non attingunt, nec disputatio nostra attingat.

Iam primum *Muratorius* negat, aut in Liturgiis pro omnibus mortuis preces fieri, aut veteres Ecclesiæ Doctores fieri voluisse. Nam eos, qui sint coelo recepti, non indigere precibus nostris, cum summa felicitate fruuntur. Itaque pro iis nunquam preces factas: sed eorum tantum cum laude & Dei & ipsorum fieri mentionem in Liturgia, ut eorum exemplo incendatur pietas. Atque huc pertinent ea, quae p. 263. e latinarum Liturgiarum carminibus testimonia proferuntur. Itaque intelligendum esse, preces fieri tantum pro fidelibus vita functis, qui nondum in coelum atque in chorum coelitum sint a Deo recepti. Pro his autem preces fieri solitas, & Liturgiarum omnium testimoniis, & SS. Patrum antiquissimorum auctoritate firmari. Iam, quod ad supplicationes sanctis fieri solitas attinet, eas negat pertinere eo, ut Dei majestati, aut Christi dignitati fiat iniuria. Nam nec ab ipsis beneficia peti, nec in iis spem beneficiorum impetrandorum collocari, quorum illud Deo proprium esse, hoc Christo: verum ut utile sit, vel de nostra Lutheranorum confessione, commendare se precibus piorum, dum sint in viuis, ita nihil impedire putat, quo minus nos precibus mortuorum, qui in coelo sint, & apud Deum gratiosi, commendemus. Sed utraque hæc ratio, quamquam moderata & lenis, tamen maxima vitia habet: quae age breuiter aperiemus. Ac

Ac illud quidem ei demus, quod ait, pro coelitibus supplicationes nunquam factas esse, quod etiam pugnare *Renaldotium* video, in notis ad Liturgiam *Nestorii* p. 645. nixum etiam satis diserto *Augustini* loco: quamquam & Nestoriana illa Liturgia, & aliorum loca, videntur aduersari, propterea quod, si quid eiusmodi in Liturgiis reperitur, pariter eodemque modo explicari potest, quo supplicationes pro ceteris fidelium mortuorum intelligendas docebimus. In altero autem capite, de precibus pro fidelibus vita functis, vitium permagnum hoc est, quod non firmavit Liturgiarum & Patrum testimoniis id, quod maxime quaeritur. Etenim nostri ubi cum Theologis Romanis de hoc genere precum disputant, quaerunt de precibus iis, quae prosint mortuis hanc in partem, ut eos liberent a Purgatorii ignis cruciatibus: ac suppliciis, impetranda eorum peccatorum venia, quae in illa Vtopia luere dicuntur: has sine auctoritate, immo vero contra praecepta sacrarum literarum, & antiquioris, & incorruptae Ecclesiae inuictas pugnant. Has igitur, tam fructuosas vivis, i. e. sacerdotibus & monasteriis preces debebat *Muratorius* diuinorum ecclesiasticorumque librorum auctoritate defendere, si gratiam ab suis inire, si contra nos aliquid efficere volebat. Sed bene fecit, quod ab ea re se abstinuit, quae nullam facultatem habet. Quamquam quid dico, abstinuit?

Immo verbis disertis illam rem agere veritus est, in principio disputationis. Mox prodidit satis mentem, & omissa Purgatorii cruciatus mentione, defendit preces factas pro mortuis hac de causa, ut iis profint hanc in partem, ut ad felicitatem coelestem perveniant. Hoc vero est, quod nullo modo Liturgiis antiquis & SS. Patrum testimoniis firmari, clare ostendam.

In Liturgia Gregoriana haec sunt verba: (*qui nos praeceperunt & dormiunt in somno pacis*) Domine, & omnibus in Christo quiescentibus, locum refrigerii, lucis & pacis ut indulgeas, deprecamur. Haec verba magnifice ostendat Muratorius, haec neminem non videre existimat, pro vita functis, nondum gloria coelesti donatis, duntaxat dici: comparatque locum Tertulliani notissimum & saepe in hac causa iactatum, e libro de Monogamia (p. 682.) ut a Millesio ad Cyrillum, & aliis, itemque formulam precum pro mortuo in Constit. Apost. VIII. 41. ubi rogatur Deus, ut eum collocet in sinu Prophetarum & Apostolorum &c. Vellem addidisset, ubi eas animas piorum putaret esse, pro quibus fiant deprecationes. Sed quamquam non addidit; tamen quia Ecclesia Romana nullum alium locum intermedium inter coelum, sedem Dei

Dei Angelorumque, & Orcum agnoscit, nisi Purgatorium, ibi illas fidelium animas statuerit necesse est, pro quibus preces fiant. Quod falsissimum esse, & a TE, VENERANDE DEYLINGI in praeclaris *Cyrilli* Vindiciis §. 25. 26. demonstratum est, et nos breviter, demonstrabimus.

Est autem duplex ratio istorum locorum interpretandorum. Prima, quae maxime mihi arridet, & in locum Liturgiae propositum satis convenit, haec est, ut ista precantes fidelium felicitatem laetis ac piis ominibus prosequantur, Deumque rogent, ut eam ipsis augeat, & summa cum suauitate frui sinat: quod nihil habet absurdi. Atque ego saepe olim audiui, talibus ominibus ac precibus profectos sacerdotes pie mortuos in iustis funerum. An quis dubitet, eos, qui, ut hoc utar, in pace et otio vivant, tamen Deum rogare posse, ut sibi pacem, otium, tranquillitatem indulgeat ac praestet? Si in praesenti pace ita precamur, atque adeo, ut det pacem Deus, quis nos reprehendat, nisi quid rideri velit? Neque hoc alienum est a *Tertulliani* loco, si modo inspiciatur recte. *Feminam*, ait, *pro anima mortui mariti orare, & refrigerium ei adpostulare.* Sed addit, quod non omittere in hoc loco commemorando debebat

Mura

Muratorius, addit, inquam, & in prima resurrectione consortium, & offert annuis diebus dormitionis eius. Dico, qua ratione posterius hoc intelligendum, adpostulat marito in prima resurrectione consortium, eadem & priora illa capienda esse de anima eius. Iam, nunquam putauere veteres, nemo Christianus unquam somniauit, precibus nostris effici posse, ut impius particeps fiat primae resurrectionis: contra credidere omnes, qui sanctam vitam ad extremum egerint, eos, vi mortis Christi & promissionis diuinae, primae illius resurrectionis participes fore. Quorsum ergo adpostulat mulier marito pie mortuo primae resurrectionis consortium? Nempe amoris testificandi causa, ut mortuum beneuola memoria, & felicitatem eius piis omnibus prosequatur. Hoc quidem ita euidens est, ut profecto nihil commode contradici possit. Itaque callide solent haec verba omittere, cum superiora illa commemorant. Ex quo efficitur, ut etiam, cum *refrigerium animae* mortui *expostulat*, nihil aliud facere videatur, quam, quod ante dixi, hoc est, laetis & beneuolis omnibus felicissimam eius inter coelites conditionem prosequatur. Nam verbum *refrigerii* si quis opponat nobis, idque recreationem a cruciatu aliquo arguere, dicat, quod foret contrarium interpretationi nostrae

strae, foedam verbi ignorantiam prodat. *Ἀναψυξις*, quam *refrigerium* interpretantur latini ex Act. Apost. III. 19. est, vt viri doctissimi demonstrant, felicitas, atque, vt dies *ἀναψύξεως* est felicissimum tempus, sic locus *ἀναψύξεως* sedes beatissima. Atque etiam si verbum vel graecum, vel hebraicum (חמח) unde graecum expressum est, ad superioris conditionis tristitiam aut miseriam referatur; tamen nulla alia, nisi ea, quae est in hac mortali vita, intelligi debet. Nam & *παράκλησις*, quae pariter de coelitem felicitate, ex eodemque hebraico verbo dicitur, estque *ἀναψύξει* plane *συνώνυμος*, ad solam vitae humanae miseriam refertur, vt e Lucae XVI. 25 patet.

Quod si tamen quis, verborum tenacior, putet esse aliquid amplius in istis verbis, vel Liturgiae, *locum indulgear*, vel *Tertulliani*, *adpostulat refrigerium*: tamen nihil lucrabitur, neque aliud quicquam efficiet, nisi id, quod minime placere video *Renaldotio*, T. II, p. 104. sed placet divino *Erasmo* ad c. XV. primae ad Corinthios epistolae Paullinae, vt ea verba pertinere dicamus ad opinionem, quam veteris Ecclesiae Doctores multos, inque his inprimis *Tertullianum* defendisse constat, e libro de Anima, Apologetico, contra Marcionem, tertio qua

& quarto, in primisque de resurrectione carnis, cum dicerent, animas piorum non statim a morte in coelum euolare, sed venire in locum inferiorem coelo, non vt ibi purgarentur a reliquiis peccatorum, vt volunt Romani, sed qui sit, vt ait in quarto c. Marc. (p. 560.) *temporale animarum fidelium receptaculum, in quo delineatur futuri (h. e. coelestis felicitatis) imago: siue vt in tertio (p. 499.) post decursum vitae in sinu Abrahae refrigerium.* Enimvero primum locus is, in quo futurae felicitatis est delineatio & adumbratio, quomodo potest aliquem cruciatum habere talem, qualem ignis purgatorius habet. Deinde ille locus refrigerii s. refrigerium, contingere putabatur statim a morte, post decursum vitae. Vnde fit, vt etiam in hac sententia verborum, preces pro mortuis nullae aliae esse possint ex istorum mente, quam quas descripsimus ante, bona omnia potius vel congratulationes, quam preces, quas proprie dicimus. Nam in locum eum fidelibus aditum per preces parari, nemo ne somniauit quidem. Atque has preces inuentas esse nullam aliam ob causam, quam, vt honore prosequerentur memoriam mortuorum, eosque vel ipsos sibi caros fuisse, vel virtutes eorum sibi amabiles, & imitatione dignas videri, testarentur, vel ex eo patet, quod pro verbis,

vt

ut animae famuli tui proſit haec oblatio, alibi
 eſt, ut illis (ſc. ſanctis) proſiciat ad hono-
 rem. Itaque Auguſtinus bene non praefidium
 ſalutis, ſed humanitatis officium in iſtis preci-
 bus ponit: quamquam illo interdum fui
 oblitus, ſcilicet in re nugatoria, ut rectiſ-
 ſime Eraſmus vocat, & humani inventi, durius
 loquitur. Sed ea loca ex his verbis, aliis quo
 Tertulliani & Cypriani iudicanda, in quibus eas
 preces & oblationes ευχαριſτικὰς faciunt, non
 ιλαſτικὰς. Nam quod diſcrimen facit Muratorius
 precum pro Sanctis h. e. in coelum receptis,
 & fidelibus, quos Sanctos non putat, ſcilicet,
 & purgatorii ignis cruciatibus addicit, ut illis
 proſint ad honorem, his ad ſalutem, id etſi con-
 ſentaneum eſt diſcrimini Auguſtini, & alio-
 rum quorundam Doctorum veteris Eccleſiae
 ſomniis, qui Martyres non in locum refrigerii,
 ſive Paradifum, ſed ſtatim in coelum aſcen-
 dere putabant, praecipui ſcilicet honoris ac
 praemii aliquid, velut Agonothetae diuini-
 tus conſtituti, Martyribus tributuri: tamen
 ſtultiſſimum eſt: quippe prorsus a ſacrorum
 librorum diſciplina abhorret, & tamen nihil
 prodeſt Purgatorio, ſi mentem veterum ſe-
 quamur, qui animas fidelium, non in coele-
 ſti quidem illa & ſumma felicitate, ſed
 felicitate tamen collocant. Atque haec de
 precibus pro mortuis.

Precos

Preces autem eae, quae fiunt mortuis in choro Sanctorum apud Deum agentibus, etsi molliter explicantur ac defenduntur a *Muratorio*, ut supra dixi, tamen & ea ratio habet vitia maxima. Primum est, duoa nulla nititur auctoritate diuina, sine qua nihil in sacris rectum est, aut probari potest. Nam quod *προσευχαι των αγίων*, e Ioannea Apocalypsi, commemorantur, primum, ut supra diximus, libri sacri ignorant discrimen Sanctorum & Fidelium: deinde quod iis assignatur coelum, non est, ut ego arbitror, qui in illo libro me nihil magnopere intelligere scio, non est, inquam, illud, quod proprie, & in sermone communi, vocamus, sed quod Prophetae dicunt, Ecclesia Christiana, regnum Christi inter homines: ut sancti illi Ioannei commode de viuis intelligi possint. Quamquam quis negauit, aut dubitauit, coelites supplicare Deo pro salute generis humani, pro Ecclesia, sanctis hominibus: immo id facere credimus, sed, ut sancti homines viui, atque adeo multo magis, sua sponte & non rogati. Itaque nec opus erat, hoc testimoniis sacrorum librorum firmare, nedum vti locis alienis: qualis est vel maxime alter e secunda *Petri* Epistola (l. 15.) ubi ne vestigium quidem precum talium. Curaturum se *Petrus* dicit, ut post mortem
suam

suam possint τῶν μνήμην ποιῆσαι, *harum rerum meminisse*, sicuti nunquam vius neglexerit, eos ὑπομνήσκειν περὶ τῶν, *admonere earum rerum* i. e. praeceptorum de studio pietatis & virtutum Christianarum omnium

Quid haec habent commune cum isto genere precum, de quo nobis est disputatio? Quid autem? Hoc non viderit *Muratorius*, etli non ἀκριβῶς doctus graecas literas, attamen non adeo rudis, vt hoc videre non potuerit? praesertim postea quam huius loci auctoritas in hac quaestione dudum repudiata est a nostris. Immo nihil aliud in Theologorum Romanorum libris repererat, aut ei loco in ea re vsurpando e puerili disciplina aduetus erat, cuius commendatione siquid ingeniis humanis persuasum est, haud facile vitium eius agnoscitur. Sed maximum vitium in ea re hoc est, quod non demonstrat id, quod maxime desideratur, quomodo earum precum scientia ad coelites perueniat, vt iis commoti faciant libentius, quod etiam non rogati faciunt, vt pro nobis supplicent Deo: quod secus esse cum viuorum precibus necessitates nostras commendamus, in promptu est. Ita profecto res habet. Quamquam multa in singulis Disputationis huius Liturgicae partibus falsa, aliena, interdum prorsus nugatoria, dixit, vt vidimus: tamen non su-

L

stinuit

stinuit hanc rem attingere, cum nec nugas Theologorum suorum commemorare auderet, vt opinor, nec aliud melius ipse haberet.

Sed, quoniam consilium *Muratorio* fuit, Liturgiarum antiquiorum testimoniis confirmare opinionum rituumque Romanae Ecclesiae antiquitatem, expectabam hic talia testimonia, quibus appareret, Sanctis supplicatum esse, vt Deum nobis suis precibus placarent. Enim vero ea plane nulla sunt prolata, nec e Liturgiis antiquis & in corruptis, nec e SS. Patrum antiquorum iibris. Proferuntur sane loca plurima Liturgiarum latinarum, p. 258. sed iis nihil aliud conficitur, nec conficere velle videtur *Muratorius*, quam morem fuisse, laudare Deum Sanctorum & Martyrum causa, eumque rogare, vt eorum precibus commotus bene faciat viuis. Sed repente, quasi hoc iam clarum esset, (p. 259. med.) *confugium ad Sanctos coelo potitos* commemorat, idque a nobis improbari queritur. Quod quis non videt esse sophistae, quam rem serio agenti & legitime demonstranti similis?

VII. *Pani consecrato post Eucharistiae solemnia male honorem haberi.*

Si pani consecrato, inter ipsa consecrationis solemnia, male honos προσκυνήσεως habetur, neque Liturgiarum ille antiquarum, & veteris Ecclesiae auctoritate firmatur: multo minus profecto probari potest ea ratio post Eucharistiae solemnia. Itaque tota haec disputatio, de honore Eucharisticarum reliquiarum & panis consecrati extra Eucharistiam, superuacua & inutilis debet videri. Sed ne partem aliquam Disputationis Muratorianae praetermisisse, aut ei non occurrere potuisse videamur, patere VENERANDE DEYLINGI, me eam quoque excutere, & quid in ea vanitatis sit, paucis demonstrare. Est autem haec disputatio apud *Muratorium* duplex. Nam primum, C. XXIII. de adseruatis reliquiis Eucharistiae disputat, deinde C. XXIV. de honore pani consecrato post Eucharisticum sacrum habito, eiusque proponendi locis sacris & in supplicationibus solemnibus circumferendi consuetudine.

Cum in vetere Ecclesia pii homines plurimum panis vinique afferrent in Eucharistico sacro idque omne precibus & laudibus sacerdotis consecraretur: fieri non potuit, quin aliquae, interdum magnae, reliquiae

fierent. Nam & hoc spectabatur ab iis, qui afferebant, ut esset aliquid reliquum, unde absentibus, pauperibus inprimis, aliquid mitti posset: eaque erat liberalitas quaedam, quam Deo gratam esse credebant, ut Liturgicae formulae planissime docent. Itaque nihil ab initio aliud factum reliquiis istis, quam ut mitterentur Christianis iis, qui sacro Eucharistico adesse non potuissent. Καὶ ἡ διάδοσις καὶ μετάληψις, inquit *Iustinus*, ἀπὸ τῶν εὐχαριστηθέντων ἐκάστῳ γίνεται, καὶ τῆς ἑ' παρῶσι διὰ τῶν διακόνων πέμπεται. Atque huic beneficentiae iungebatur alia pecuniaria eodem tempore, i. e. diebus Domi-
cis, qua viduae, pupilli, aegroti, alique aliqua necessitate pressi iuarentur; eodem *Iustino* auctore, In ea re subinde aliquid mutatum est, sed ita tamen, ut primis sex seculis non discederetur a distributione reliquiarum, nec id negare sustinet *Muratorius*. Sed labente disciplina antiqua, paullatim alii mores inuecti sunt, quam boni ac probabiles, disputare nihil attinet. In quibus maxime tolerabilis fuit hic, ut reliquiae panis seruaretur in templis: quod arbitror factum reuerentia quadam, & opinione sanctitatis alicuius, quae pani e consecratione adiuncta videretur. Sed eius adseruationis nullum aliud consilium fuit, nisi ut eius panis usus esset, cum iterum Eucharisticum sacrum

crum ageretur. Neque panis ille adseruat-
 us est eo, quo nunc fit in Ecclesia Rom.
 modo, sed in loco eo, vbi cetera supellex
 sacrorum seruabatur, & inter illam supellesti-
 lem, *secretarium* vocant Ordines Romani.
 Id ipsum fatetur *Muratorius*, vsus loco *Hum-*
berti, Sec. XI. scriptoris: de qua re post
 plura dicemus. Sed siue superstitio, quae
 istis reliquiis impie abuteretur, siue caussae
 quaecunque fecere, vt, quibusdam locis, re-
 liquiae plane igni aut alio quo modo abole-
 rentur

Hinc exoritur grauis & magna diffi-
 cultas *Muratorio*, & omnibus μεταμορφώσε-
 ως Paschasianae defensoribus. Negant
 enim eius aduersarii, eos, qui panis con-
 secrati reliquias, post solenne Eucharisti-
 cum, abolerent, credidisse, panem in cor-
 pus Christi fuisse per consecrationis carmen
 conuersum, sublata omni panis substantia.
 Ex hac difficultate se expedire dum cona-
 tur *Muratorius*, & parum subtilem & accura-
 tum disputatorem se praestit, & multis se
 modis ipse impedit. Nam nec factum ne-
 gare audet: quomodo enim neget, in tam
 claro *Hesychii* testimonio, atque etiam *Hum-*
berti, testis sui? sed vel paucorum eum mo-
 rem fuisse contendit, vel parum reueren-
 tiae corpori Christi habentium: nec conclu-
 dendū

diendi modum vitii arguit, vel conuincit: certe in eo ita fluctuat & errat, vt appareat facile, quantopere hic laborarit. Etenim primum (p. 173. sqq.) nihil aliud agit, nisi vt late de veritate corporis & sanguinis Christi in S. Coena disputet, proferendis locis S. S. Patrum, qualia in superiore disputatione, qua hoc proprie agebatur, protulerat: quae sunt omnia ab hoc loco aliena, suntque argumenta quaerentis effugia, & certo loco, pede collato, dimicare detrectantis. Sane fatemur nos, haecenus falsam esse *Albertini*, *Bingami*, ceterorumque earum partium Theol. rationem, ex *Hesychii* verbis intelligi posse existimantium, veritatem corporis Christi in S. Coena creditam ab iis non esse, qui ea consuetudine abolendarum Eucharisticarum reliquiarum vterentur. Etenim hoc modo intelligitur, quod nostri Theologi defendunt, idem veteres illos credidisse, corpus Christi tantum adesse, cum panem in ipso sacro sumimus atque edimus, & dum edimus, neque quicquam sententiae nostrae contrarium ex illo instituto intelligitur. Id secus est in ratione Paschafiana, quae panem prorsus abolet, & in substantiam corporis Christi consecrando conuertit. Ea si vera est, profecto infandae impietatis rei agendi sunt illi, qui igni aut alia vi aboleuere consecratum panem

panem: eaque impietas ita conspicua est, ita in oculos incurrit, vt nullo modo latere veteres istos potuisset. Tandem (p. 279) ad rem redit, post quam (p. 272 273) leuiter, velut per prolusionem, tetigerat, & conciliare institutum illud cum *μεταμορφῶσαι* tentat. Id quomodo ei successerit, age videamus.

Caussam ergo moris illius ait fuisse hanc, quod *sacрати panis species post aliquot dies mucorem & corruptionem contrabant, & aqua, tineis, muribus, alioque modo vitentur. Quibus paria sunt, quae supra, (p. 272. extr.) dixerat, non ignorasse illius moris auctores, species quidem Eucharisticas destruere, sed nihil inde officii incorruptibili Domini corpori.* Hem! quid audio? Species, i. e. ea, quae schola *accidentia* barbare vocat, in quibus nihil est substantiae, nulla materia: esset enim verus panis: haec igitur species inanis mucorem ducit, aquam bibit, tineis muribusque pabulum praebet? Philosophos esse mures illos necesse est, qui cibum tam metaphysicum expetant, & accidentibus sine materia pascantur atque alantur. Profecto si hoc non ridiculum est, nihil vnquam, quo ridiculum sit, nec vidi, nec audiui. Immo vero, o! bone *Muratori*, si post sacrum, in capsula, aut quocun-

Sed vide mihi aliam non minus bellam rationem. Veteres, ait, ex illo ipso vitio, quod contraxisset panis, collegisse, *corpus Christi a pane illo recessisse*: atque ob hanc causam sibi religioni non duxisse, abolere eam. Hic quam multis modis se implicat. Primum ita confingitur prorsus noua μεταμόρφωσις. Nam si Christi corpus recessit, profecto aut illa species inanis vna euanescere debuit, quod nulla subiecta esset materies, cui inesset, aut panis materia debuit rursus redire, & illam speciem destitutam a corpore sustinere: idque sine vi diuina fieri non potuit. Huius autem rei, sine omni idonea causa & auctoritate, confingendae quod ius est? Omnia commentis explebimus, si talium confingendorum licentia concedatur. Sed ante, in prioratione, dixerat, abolitas esse igni reliquias, quod *possent* vitium contrahere: quod committere, scilicet, parum decorum videbatur: nunc propterea id factum, ait, quod ex illo vitio intelligerent, corpus Christi recessisse. Quae sunt prorsus repugnantia. Nam si hoc est, expectare semper debuere, dum putrefactio appareret. Enim vero, ita non potuit caeri, ne putresceret. Atque hoc etiam cadit tantum in eam rationem, cum vitium concipit panis a situ, ab humore. Quid? mures & tineae etiam tum demum

impetum faciunt, cum discessum illum & seiunctionem factam intelligunt? Profecto tota res est falsa & nugatoria.

Atque etiam in eo parum eleganter disputat *Muratorius*, quod docere instituit testimoniis antiquorum scriptorum, panem consecratum in multis Ecclesiis adseruatum post Eucharistiam esse. Nam id nec *Albertinus* aut *Binghamus*, nec quisquam negavit. Immo posteaquam recessum est ab antiquissima illa primae & incorruptae Ecclesiae consuetudine distribuendarum comedendarumque reliquiarum, adseruari coepere: idque concedimus factum esse in plerisque Ecclesiis, ob reuerentiam quandam, superstitionem illam quidem, sed tolerabilem tamen, consecrati panis, ut nunc etiam fit apud nos, cum aliquid superest e pastillis, nec numerus accurate initus est. An post sacrum, & extra usum, adesse creditum sit corpus Domini, id quaeritur: id illa demonstratione non conficitur: Immo id credidere nullo modo, qui istas reliquias vel igni absumerent, vel in puteos abiicerent, atque ita usibus humanis subtraherent.

Sed tamen illas ipsas panis *εὐχαριστίας* reliquias *uiuificum corpus* appellauit. quis? Antiqua & incorrupta Ecclesia, & prio-

priorum seculorum aliquis doctor magnae auctoritatis? Non. Quis ergo? Obicurus aliquis & ignobilis seculi VI, si tamen auctor, qui inducit feminam dicentem Abbati: *Accipe mihi sacrum vas viuifici corporis & sanguinis Christi, tantis mysteriis dignum* p. 23 Hoc ergo auctore credemus, veterem Ecclesiam omnem semper statuisse de reliquiis Eucharisticis ita, vt Romanis placeat? Nullo modo. Nam nec necessitas vlla nos cogit hoc concedere, vt illa verba in hanc sententiam accipi debeant in quam vult *Muratorius*. Panis ille, vt *Chrysostomus* ait, per consecrationem liberatus nomine panis, non modo corpus Christi appellatus est, cum fumeretur, sed etiam eius nominis honorem in vulgari consuetudine loquendi retinuit post sacra solemnina. At reuerentiae plurimum habitum est istis reliquiis in vetere Ecclesia. De hoc iam, quale sit, & quid id profit Ecclesiae Romanae, videamus.

In hac autem altera disputationis parte (C. XXIV.) maxime res est *Muratorio* cum *Lutheri* sectatoribus, qui extra vsum negant esse cum pane coniunctum corpus Christi. Sed in hoc non magis, quam in superiori, nobis latisfecit. Ac prima quidem totius istius capitis pars est plane aliena, nec vilius

vilius vtilitatis in caussa propofita. Nam reliquias Eucharifticas alio miffas, quod clarum effe ait multis SS. Patrum testimoniis, fcimus ipfi: fed vt fupra diximus, ea res pertinuit ad vsum, vt comederentur, & ita vel beneficeret pauperibus, vel beneuolentia, & communio cum iis & coniunctio vtcunque indicaretur. Hoc igitur vt doceret, non defideramus: hoc autem demonftrandum erat, eos, ad quod miffae effent, accepiffe, vt verum corpus Chrifti, & adoraffe eas: quorum nihil factum videmus.

Iam quod reliquiae, quod tamen primis feculis factum non eft, illatae in Paftophorium, vt vocatauctor Constitutionum Apoft. VIII, 13, aut *Secretarium*, (Ord. Rom. I. p. 8. II, p. 23.) fiue quo alio nomine appellatus ifte locus fuit, fiue in ipfo altari repositae & adferuatae funt, id ipfum quoque nil *Muratorii* cauffae prodeft. Nam totum hoc pertinet, non ad eam consecrati panis post Eucharifticum facrum venerationem, quam hodie vfurpat Ecclefia Romana, fed ad reuerentiam eam quam fupra descripfimus, & ad vsum reliquiarum in proximo Euchariftico facro. Id clarum eft e loco *Humberti* fupra commemorato a *Muratorio*: *Si quid e fancla & venerabili Eucharisti-*

charistia superfuerit - - in pyxidem mundam recondunt, & sequenti die, communicant ex ea populum. Cui nos addemus alium ex Ordine Rom. II, n. 35. p. 23. ubi describitur praeparatio Eucharistiae in Missa Pontificali: Presbyteri duo - - intrant Secretarium vel ubi positum fuerat corpus Domini, quod pridem remansit, ponentes eum in patena: & subdiaconus tenet ante ipsos calicem cum vino non consecrato, & alter subdiaconus patenam cum corpore Domini &c. Hic locus planissime docet, corpus Domini esse nil aliud, quam panem consecratum: deinde non propositas fuisse istas reliquias, ut spectarentur, adorarentur, sed in sacrario conditas in pyxide (Ordo I. p. 8. vocat capsam, conditorium) denique cum eximeretur e pyxide, non adoratas esse, nisi quod Pontifex accedens missae celebrandae causa, caput inclinat: in quo nullam adorationem intelligendam esse, supra docuimus. Reliqua omnia sunt superstitione inutili contaminata omnia, quae, ubi semel adseruatio reliquiarum inualuit, mox in Ecclesiam irrupit.

At Cyrillus Alexandrinus (Epist. ad Colosyrium adu. Anthropomorph.) reprehendit eos, qui dicere audeant, Eucharistiam nullam sanctitatem accipientibus conferre posse, si
do

de altero in alterum diem seruetur. Audio. At id non habet hanc sententiam, vt seruatus panis interea, dum seruaretur, corpus ipsum verum Christi. manserit, aut omnino fuerit: sed vt ille panis. etiamsi non iterum consecratur solenni ritu, tamen in altero Eucharistico sacro, vbi edatur, corpus Christi adiunctum habeat. Nam profecto panem illum ab consecratione adseruatum non iterum consecratum esse, etiam superior ille Ordinis Romani locus indicare videtur. Atque per illum ipsum morem nobis videtur sparsum esse aliquod semen opinionis de μεταμορφώσεως Eucharistica, & venerationis superstitionis, vnde paullatim ipsa adoratio religiosa nata est. Neque enim vbi incipit superstitio, ibi desinit. In principio fere est inconsulta pietas, paullatim fit foeda impietas: praesertim vbi huic nascenti lolio sctus & alimenta accedunt a disputationum calore, a pertinacia, superbia, aliisque talibus vitiis, itemque ab ignorantia barbarieque: vt factum est in hac ipsa re. de qua agimus. Nam *Muratorius* ipse docet, post Berengarianam controuersiam, nihil antiquius fuisse Ecclesiis (h. e. Clericis) quam reuerentiam erga augustum hoc Sacramentum quotidie & quouis modo augere: hinc natum Festum corporis Christi

Christi, propositionem panis sacra-
 taribus, circumgestionès, & similia: in
 quibus quoniam confitentem habemus *Mu-*
ratorium, nulla res disputatione indiget. In
 his tamen nullam mentionem facit adora-
 tionis, quae fit, cum consecratus pastillus,
 inclusus capsae, gestatur per publicum, &
 ad quemuis eius conspexit. Sed eam rem
 fortasse putauit confectam supra, quo capite
 de Adoratione consecrati panis actum est.
 Quamquam quae ibi dicta sunt, facile huc ac-
 commodari possunt. hic causam suam dete-
 riorem fecit *Muratorius*. Nam cum supe-
 riori capite (XXIII.) innuerit, recedere
 corpus Christi a panis specie posse: pro-
 fecto incertos ac dubios reddidisse videri po-
 test gregales suos: qui definire non aude-
 bunt, quando illa discessio fiat, atque ita
 in periculo erunt, ne subinde meras species,
 siue panem reducem adorent. Sed cum
 tota illa res sit nugatoria, vix attinet, de ea
 aliquid addere. Et quamquam adhuc re-
 stant quaedam passim etiam in his capitibus
 sparsa, de quibus aliquid dici contra possit:
 tamen, quia non coniuncta sunt magnopere
 cum causa ea, quam disceptamus, ea prae-
 termittere lubet. Atque etiam & ipse sati-
 etate iam defessus sum refellendi ea, quae
 tam nulla cum specie dicuntur, & TE, VIR

VENE-

VENERANDE, legendi. Itaque hic finem
faciam scribendi, nunquam autem TVI co-
lendi, IVAEque doctrinae, virtutisque admi-
randae Quod si quid in hoc libello a me
scriptum inueneris, quod TVO in hoc ge-
nere acutissimo iudicio probetur, tum vero
me operae pretium fecisse, & magnum in pri-
misque suauem huius mei laboris fru-
ctum cepisse arbitrabor.



VAI 1528720



163

at

2-



